

ПЕТӖ 1926 ВОСЯНЬ

ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ
РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

5

ОДА КОРА (МАЙ)
2005

ТАЙӖ НОМЕРЫН:

ЫДЖЫД ВЕРМӖМЛЫ — 60 ВО

Василий ЛОДЫГИН. Победаыс ыджыда кылӖ. Кыв- буръяс	3
Нина КУРАТОВА. СійӖ луныс	6
Геннадий ЮШКОВ. Вилядь сиктса ань. Повесытысь юкӧн...	11
Владимир ТИМИН. Ылын ыпъяліс война...	15
Иван ТОРОПОВ. Регыд дас квайт. Повесытысь юкӧн	18
Юрий ВАСЮТОВ. Кык Саш. Войнаса ветеранлӧн казты- лӧмъясысь	23
Леонид ЖДАНОВ. Орден-медальясыс «эз сотчыны»	42
Александр ЩАНОВ. «Эг наградаыс вӧсна...»	46
Никон ХАТАНЗЕЙСКИЙ. Разведкаӧ кӧръясӧн	52
Алексей ОДИНЦОВ. «Саботажнича». Висыт	57

Максим НОВОЖИЛОВ. «Сейны! Сейны! Сейны!». Пӧль- лӧн висыт. Анна ИСТОМИНА. Ермил. Висыт. Ксения ШУЧАЛИНА. Пӧрысь баблӧн висыт-вӧвлӧмтор. Зоя ЧУПРОВА. Чой. Висыт	62
--	----

Коми литератураын кадпасъяс.....	74
----------------------------------	----

ПОШТА КУДЙЫСЬ

Надежда МАЦАКОВА. ...И муӖдз копыр Тіян водзын!	78
--	----

Обложка вылын снімокыс Фёдор Макаровлӧн.

© «Войвыв кодзув» («Северная звезда»), 2005 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

Михаил
ЕЛЬКИН

Геннадий
БЕЛЯЕВ

Зам. гл. редактора

Евгений
КОЗЛОВ

Ответственный
секретарь

Алексей
ПОЛУГРУДОВ

Владимир
ТИМИН

Александр
УЛЬЯНОВ



Победаыс ыджыда кылө

Митрей Иван пиян

Митрей Иван пиян —
Сөкөл кодъ вит вок,
Сотчис война биын,
Некод бөр эз лок.

Кодлөн гөтыр вөлі,
Кодлөн — муса ныв.
Век на потшөс пөлөн
Бөрдө ссыланкыв.

Нальөм пуртөн вундө
Ловъявылысь лун.
Некод дзик эз вун да
Нинөм дзик эз вун.

Олөм ловъя миян,
Чорзё, но оз чег.
Митрей Иван пиян
Дорйёны на век.

* * *

Морөс тырөн горалө Победа —
Му шар вылын медся ыджыд лун.
Петө нюм, и синва тшөтш жө петө,
Некод дзик и нинөм дзик эз вун.

Медся ыджыд чуймөданаторйыс,—
Мый сө пөлөс йөзлөн өти лов.
Лоас век и кыпөдысь, и дорйысь,
Некод йөзлөн кабырын оз ов.

Олөм ёна куснялө да нальө,
Но оз көдзав борда йөзлөн поз,
Өд салдатлөн ичөтик медальыс
Өзйө ыджыд югыд шонді моз.

Роч Рая

Война вылысь вайис
Пөвсö Сидör Вань.
Кыськö рочысь Рая
Вöлі аттö шань.

Быдтор вöчны кужис,
Эз и ковтöм ло.
Муса кага чужис
Раялөн быд во.

Сьöлöм вылас воис
Татчöс яг и рас.
Коми кывйыд лоис
Аньлы дзик жö ас.

Сöмын ним — Роч Рая —
Сыкöд оліс сквöзь.
Но эз дöзмöд тайö,
Нюмыс вöлі пöсь.

Таысь мудзöм йöзлы
Шедліс чöскыд ун.
Овны енэж лöзын
Коліс öд быд лун.

Мед и пөвсö вайис
Война вылысь Вань:
Кыськö рочысь Рая
Вöлі медся шань.

* * *

Быдмим войнабöрся пиян —
Кодкö тшыг да кодкö пöт.
Гажа шондi вöлі миян,
Вöлі миян чöскыд вöт.

Гортса уджъяс вöчöм бöрын
Чукöртчылім ныр на ныр!
Öта-мöдлы морöс шöрö
Пу наганысь «луйлім»: «Тыр-р-р!»

Паметъ видзö шудаторсö —
Идзас пиысь шоныд горс.
Партизанөн быдөн ворсіс,
Некод немечөн эз ворс.

* * *

Быдлаын эг вöвлы,
Юала ме, час:
Войनावывса вöвлы
Эм-ö кöнкö пас?

Чиböыслы кадыс
Зэв жö вöлі пöсь.
Сійö йöзкöд радын
Бисö вуджис сквöзь.

Сійö гортись ылын
Сідзжö пуктіс юр.
Сійö мырсис тылын,
Вöчис уна бур.

Гожöмын и тöлын
Пыкис мудз да дой.
Войनावывса вöлыс
Морт кодъ жö герой.

Колö, ёна колö
Сылы ыджыд пас.
Вöлыс гажа лолөн
Выльысь гөрöктас.

❖ ❖ ❖

Нелямын витөд вося Ыджыд Вермөм луныс нималана гижысьяслөн казтылөмъясын да гижөдъясын

Нина КУРАТОВА

Сійö луныс

Нэм джынйысь унджык нин кольöма сійö кадсянныс, кор помасьліс ыджыд войнаыд, но сійö луныс, кодi вайис Победа йылысь юöрсö, век на син водзын. Верман-ö мортыд вунöдны сэ-тшöмторсö? Виччысим ми сійö лунсö кузь нель во чöж, мыйта удитім сьöкыдсö и тшыгсö пыкны, мыйта синвасö кисьтім да страксö терпитім. Война заводитчигас öд ми ичöтик нывкаяс да зонкаяс на вöлімö, көмтöг котралім, а помасис — да ме со нин и студентка, педучилищеын медводдза курсын велöдча, ола карын. Общежитиеыс Пушкин нима улича вылын. Öти жырйын олам дас нывка. Ыджыд, кузьмös жырйын стенъяс пöлöныс вит крöвать да öти ыджыд пызан. Крöватьясас, көть и векнийсö, узялам морт кыкөн. Пызан саяс ми дасьтам урокъяс, а корсюрö ставөн öтув пуксьылам пируйтны — кодлыкö гортсьыс ваясны картофелкапуста да мыйсюрö шыд пуыштны. Удайтчас кө ещö пачсö ломтывлыны, öд и пескыс абу. Арнас, кынмалігас нин, раз-мöдысь миянös нулісны Краснöй горкаö пессö заптыны: васьыс керъяссö лэпталім да пилитім-поткöдлім, но ми нö, дас нель арöса нэриник нывкаясыс, уна-ö вöчам? А тöлыс öд кузь... (Öні быть нин лоö пöкайтчыны — войяснас тшöкыда вöчлім пес гусялан походъяссö. Сы йылысь менам весиг гижлысьсöма коркö, «Моздор тыр пес» висьттор).

...Сійö асывнас ми эг ёна тэрмасьöй эновтны вольпасьяснымös, көть общежитиеным важөн нин ызгис-пуис вöрзьöдöм зі поз моз. Миянлы ёна тэрмасьны некытчö: велöдчам дошкольной отделениеын, мöд сменаö, рытнас. Да и водім ми тöрытсö зэв нин сёрөн, көнкö вой шөр бöрас, велöдчöм помасьöм бöрын нин. Ветлім пывсьыны карса баняö, медбöръя сменаас сöмын и веськалім. Бөръя сменаад да, санпропускникыс примитіс мужичöйясös и нывбабаясös öтув. Сэки öд санпропускниктöм пывсяныс эз и вöv. Пока сэні жаритасны көлуйтö, час виччысян. Но и пывсим-мыс-сим да корöсясим кодöнкö эновтöм корöсьнас сьöлöм бурмытöдз. Гортö локтімö леммöмаöсь. А жырйын ыркыд. Көть и тулыс нин, а тувсов тöлыс ёна на ыркöдöма жыр пытшкössö. Öдйö тай дзесим вöсньыдик шебрасъяс уланым.

Асывнас, кыдзи и пыр, комендант гөлöсысь садьмим. Быд асыв сійö чуксалö миянös: чеччöй пö, менам титанын ваыс пуö нин, пöсь чай тіянлы дась. Миян сöмын крöвать пружинаяс дзуртыштисны, асьным ог чеччöй, куйлам. Мöда-мöдös на вильшалыштам

да төрытъя санпропускникад пасьтөм мужичöйяскөд паныдась-
лөмсö казтылам.

— А, нывъяс, кажитчис төрыт тиянлы?— шпыннälö орчча
крöватъ вылын Аня, миян медзбой нывкаыс. Сийö миянысь арöсөн
ыджыд да, буракö, зонъяснас интересуйтчöджык нин.

А ми Дунякöд, öти грездасяс, нюмвидзам:

— Мыйла нö эз? Миян сиктын нывбабаясыд и мужичöйясыд
нэмсö öтув пывсьылöмаöсь да. Сийö шуда кадсö көть öнi казтыш-
там.

А збыль öд, и татшöм казтыштöмыс дойдö и долымöдö, вö-
лөмкö, морттö.

А коридорын талун мыйкö вывтi нин дыр ноксьöны. Быттöкö
и лөнълis нин, воддза сменаын велöдчысьяс мунлисны да, а бара
на со котралöм лыбис. Миян жырным пыран-петан öдзöс дорас
дзик, да ставыс кылö. Öдзöсыс öтторъя клопакылö, сöмын крö-
ватьдорса стеныс дрöгмунлö.

— Мый нин сэнi? Пöжар али мый?— Аня миян медзиль да
медсюсь, сийö первойөн и мöдiс öдзöс дорас.— Мый нö сiдз вар-
тöдланныд да зымакыланныд?— юрсö öдзöс мöдарö гоньгöдöмөн
гораа юалö сийö.

Но кодкö либö пырмунанмозыс зурасис миян öдзöсö, либö
дöзмöмпырысь нарошнö клопкис-пöдлалiс, Анялөн тай чургöдöм
юрыс муртса öдзöс костас эз веськав. Вочакыв пыдди тай збой
нывка гөлöс кылис жö-а:

— Йöй али мый тэ, юасян... Он мöй аддзы?.. Победа!.. Ставыс
митинг былö тэрмасьöны!

Пöдлассьöм öдзöс дорын сулалö Аня: падмöма, быттöкö кöсийö
гөгöрвоны лоöмторсö да некыз оз вермы...

— Кы-ыв-ли-нныд?— мыкталыштö сийö, миян былö паськалöм
синнас дзоргигтыр, а сэсся уськöдчö öдзöс мöдарас.

Ми крöватъяс вылынöсь, пуксьöмаöсь нин, но джоджö век на
ог лэчöй, виччысям мыйя, гашкö, тшöтш вежөръясөн дубалiмö.

Регыд Аня бөр пырö төв ныр моз, горзö:

— Победа! Победа! Чеччöй, йöктыны кутам!— ачыс чеччалö
нин джодж шöрын да мый вермö кекöначасьö.

Повзбöдöм лэбачпиян моз ми ставөн уськöдчим сы дорö, тшöтш
чеччалам да горзам. То кодкö и паськöмнас нин ноксьö, пасьтась-
ны заводитö, а то — кодкö век вошöм лэбач моз лэбалö. Сöмын
Лия, миян жырйын медся шань да лөнъ нывкаыс, век на пукалö
крöватъ вылас да ачыс аслыс висьталö али миянлы кайтö:

— Но и мый, Победа кө... Батьöй вед всё равно оз лок, усьли
сэтчаньö.

Меным юрö сийö жö мөвпыс кучкылис, но мöд мөвп нöшта
öдйö вöтлiс сийöс: «Гортын бабö да чоюкъяс тöдöны оз на Победа
йивсьыс-а?»— и син дорышöс сотыштiс чепöсийöм синва.

Колöкö, и мукöдыслөн менам моз жö пессис сьёлöмныс, но
дыр нюжмасьны некод нин эз вермы. Пока ми мыссьыны да мый
да котöртлiм, көмасим-пасьтасим, общежитиеын лои нин чöv-
лөнъ. Öдзöснас медбөръя клопнитысьяснас ми и лоим.

Стрöйбаяс костi тальöм трöпкаяс вывтi ми шелзьöдам Киров
уличалань. Со и улич выласöсь. Пу плашкиөн вольсалöм, абу
няйт ни абу гуранöсь миян уличаным. Быд лун татi котралам
велöдчыны. Веськыдвылын Киров нима жö парк. Зэв джуджыд

өграда сайын кылö гырысь топольясö поздысьöм лэбачьяслөн шу-
мыс. Тулыс! Со и юыс нин воссьöма, пароходъяслөн да катерь-
яслөн тутöстöм шыыс кывлö. Война заводитчöм бöрас парксö
мыйлакö зэв джуджыд потшöсөн гөгöртöдлöмаöсь. Гашкö, мед ми
вок кодь билеттöмаыс эз пыр паркас гажöдчыныс. А колöкö, и
мöд помка на. Война чöжыс öд тані оліс Ленинградса зоопарк.
Зверьясыслы, гашкö, и быть потшöс-томаныс коліс. Ми найöс эг
нин сулöй, нулöмаöсь нин бöр Ленинградас. Но училищеным дзик
парк дорас, туйсö сöмын вудж. Джуджыд кильчö вывсяныыс вер-
ман пöттöдзыд кывзыны паркса оркестрлысь ворсöмсö. Мыйсö
сöмын сэнi эз ворслыны. И «На сопках Маньчжурии» вальстö,
и краковяктö, и «Синий платочектö». Корсюрö и ми каттысьлім
забор вылас да пыравлім паркас, мудзтöдз гуляйтiм паркса кузь
аллеястiыс. Сэнi верман вöлі паныдасылыны мукöд техникумъ-
ясын велöдчысь ас сиктсакöд да пыравны картинаяс петкöдлан
музейö, любуйтчыштны серпасъяснас. Шуöны, «Комната смеха»
пö вöлöма, да ми эгö жö нин сулöй.

Сійö асывнас ми чавканъяс моз и лэбим улича кузяыс. Педу-
чилище кильчö помö сувтыштлим, эгö и пыралöй. Висьгалісны,
талун пö ог велöдчöй, а öнi пö мунöй митинг вылö НКВД керка
дорö. Та йылысь миянлы и висътавны оз ков. Аддзам, мыйта нин
йöзыс чукöрмöма гырысь колоннаяса НКВД стрöйба дорас, да
весиг миян дорöдз кылö сэтись ызгöмыс. То кодкö речь висъталö,
то лозунг горöдласны, то гудöк шы да сьылöм кылышталö. И сылань
мунысьыс да котöртысьыс миян моз уна жö. Кодкö киас гөр-
д флаг нуö, кодкö гудöк, кодкö сьывны горöдлö. А то олöма нывбаба
кыскö киöдыс ичöтик зонкаöс да чышкалö синвасö. А то кутшöм-
кö пöль, беддя, тшöтш тэрмасьö, öтторъя бедьнас тотшнитö-мунö-
воськовтö. Митингуйтанінад трибуна дорас он сибав, сы мыңдаөн
нин чукöрмöмаöсь. Вильён локтысьяс сулалыштасны, жöдзыш-
тасны да бокö вешйöны. То нö тай кодъяскö бокöджык асьныс
нин гаж вöчöмаöсь. Öти олöма нин дядьö шöрас сулалö да гудöк-
нас няжтö, мöд сыкöд орччөн кокнас топайтö да öтторъя «едрит-
твой» горöдлö. А найöс кытшалöмаöсь нывбабаяс, кодi мича чышгъ-
яна, кодi куш юра, гораа сьылöны «шондiбанöй» да сьölöмсянныс
йöктöны. Эстөн, ылынджык, Орджоникидзе уличаас гудöк шы
жö кылö да сьывны горöдлöм, но сэнi йöктыны окотитысьыс
этшаджык, кок улас няйтыс чавкöдчö, тувсов туй вылыс абу на
шупалöма. Ми неуна жуйялыштим митингуйтысьяс гөгöрыс да
веськöдчим сылань жö, кытчö нырвизынас унджыкыс веськöдчö-
ны — Орджоникидзе улич кузя вывлань. Миян дас нывкаа чу-
кöрысь джыныйс нин кытчöкö разаліс. То öти аддзöма тöдсаяссö,
то мöд. Миян дорö лестехникумса тöдса зонъяс öтувтчисны. Сэсся
аддзим кооперативнöйын велöдчысь нывкаясöс. Найö корсисны-
юасисны медицинскöйын велöдчысь пöдругаяссö.

Татшöм праздникид ставсö ывла вылö, йöз дорас, чукöстöма.
Радлунсö öд быдөн зильö юкыштны и мукöдъяскöд. Петöмаöсь,
миян моз жö гуляйтöны, гажöдчöны да аддзысьöны.

Тöдлытöг кутшöмкö тöдтöм нывъяс гусялісны миян дорыс Аня-
нымöс, лестехникумса зонъяс ылалісны жö миян дорыс. Кватит-
чим да, ми нельöн нин сöмын асланым жырсаыд; куимөн миян
грездсаыс да Пальса Маша. Драмтеатр дорынöсь нин. Драмтеатр
кильчö помын гудöк шы кылö да гора гөлöсьяс.

— Гашкӧ, артистъясыс и сьылӧны да?— тэрмасьӧ сылань Пальса нывкаыд.— Гашкӧ, миян артистканым, Сидорова, сэнӧ жӧ да? Миян грездысь ӧд сійӧ. Москваын велӧдчис артиставнысӧ. «Салдаты Сталинграда» пӧ регыд кутам петкӧдлыны, волю пӧ быть видзӧдныс, меным шуис.

Гажӧдчыштны драмтеатр дорын эськӧ и абу лёк, но ми, тӧдса зонкаяскӧд торйӧдчӧм бӧрын, друг быттьӧ гӧгӧрвоим: лешмыссьӧма. Мудзимӧ, и кынӧмъясным сюмалӧ. Училищеса столӧвӧйын ӧбедайтлім тӧнлун кык часын, а сы бӧрын эгӧ на няклясьлӧй. Вайӧ, мися, бурджык лэччам Интернациональнӧй улич вылӧ да кержалам «ИТӧӦРӧ». Тадзи шулісны сэтись нянь вузалан лавкасӧ. Нянь карточкаяс миян сьӧрысь, сійӧс некор, некытчӧ ог кольлӧй, питшӧгын новлӧдлам. Мӧд ногыс ӧд воштан. Ми сиктса челядь, бабӧяс велӧдлісны виччысьӧмнад овны, торъя нин кор карад мӧдӧдӧны быдтасьяссьӧ.

...Гажыд гаж, но кынӧм сюмалӧмьд, вӧлӧм, сюсьджыка на индалӧ, кодарлань чепӧсйыны. Ӗдйӧ ӧд драмтеатрсянь лэччӧдысь пӧкатӧдыс лавкаланьыс мӧдім. Шуам, нянь паёкнымӧс ньӧбам да пырмунанмоз нуръясьыштам дай. Пӧт кынӧмнад сэсса водзӧ на позяс гуляйтны да гажӧдчыны. Этатшӧм праздник ӧд талун, гортӧ огӧ на жӧ мунӧй.

Интернациональнӧй да Бабушкин крестасьланінын (ӧні на сэнӧ ыджыд топольыс сулалӧ) топольбокса важиник пу керкаысь петісны миян дорӧ Аняным да эсійӧ кык тӧдтӧм нылыс. Анялӧн мыш вылас картофель нӧбовтас, нывъяслӧн тшӧтш кушӧмкӧ тубрасьяс да туисьяс. Анялӧн синъясыс ворсӧдчӧны. Аддзис миянӧс да радлыштіс:

— О, нывъяс! Отсасьысьыд лои! То, картофель мамӧ ыстӧма! Парокӧдӧн вайӧмаӧсь нывъяс! Ті кытчӧ мӧдінныд?

— Ми «ИТӧӦРӧ», лавкаӧ нянь ньӧбны кӧсйим пыравны да сэсса гуляйтнышты на,— вочакыв сетам Анялы.

Сійӧ инмӧдчыштілӧ Дунялы сояс, шуӧ:

— Тэ на дорысь эбӧсаджык, давай миянкӧд, отсыштан меным картофельсӧ нуны. А мукӧдыс мед няньсӧ ньӧбӧны да гортӧ жӧ локтӧны. Пир вӧчлам, картофель пуам, сола тшакӧн чӧсмасьыштам. Победаыс нӧ мый вылӧ!

Найӧ вуджӧны Бабушкин улича да мӧдӧны карса базарлань (ӧні сэн стадион), а ми Интернациональнӧй вывтӧ мӧдарланьыс.

Нянь лавкаын ми нӧшта паныдасим тӧдса нывъяскӧд да накӧд варовитігтыр лэччим Бабушкин кузяыс парк дорӧдз. Митингуйтанінын некод нин оз кыв, зато пристаньӧ лэччанінын да Сыктыв берегас пукалӧны йӧз, сысянь сьылӧм шыыс ылӧдз кылӧ. Миян пӧдругаяс сэтчӧ и веськӧдчисны, а ми мӧдім гортӧ, общежитиеӧ. Тасянь дзик нин и матын общежитиеным. Шойччыштам кӧть.

Гортӧ локтім да ышловзим быдӧн. Чӧв-лӧнь. Аня да Дуся кындзи некод абу. Мукӧдыс миян моз кӧнкӧ лӧбалӧны на жӧ. Ломтысьӧ пач. Аня пачсӧ лӧдсаланмоз ошйысьыштӧ:

— А тӧданныд, пессӧ кытысь босьтім? Некыз он тӧдӧй!

— Лун шӧра луннас кӧ гусясьны эн петав,— сералам ми.

Аня дзӧрӧдӧ юрнас, эн пӧ тӧдӧй, эн.

— Комендантлысь гусялім, титан ломтанінсьыс. Сэнӧ пескыд пыр эмышт. Ачыс талун гаж, муніс гортас, гӧтыр дорас. Ме-ед ветлас!.. То, картофельыд пуны нин кӧсйӧ...

Анялөн гөлөсис кыпыд, ывла вывсянныс кыпыд гөлөсъяс жö кылöны и шондйис öшиньö швачкö. Пусьыс кáртупельöн дукуы гильöдö ныр розьясöс. Ми пуксим крöвать выланым, легöдам кокъясөн. Аня шыасьö мян дорö:

— Прöста пукаланныд, сьылыштöй мыйкö гажаöс. Часлы, ме сола тшак туисыс тасьтö ректышта.

Ми горöдам öтырышъя: «Вставай, страна огромная..!»

Аня шенасьö кинас:

— Öнi сийöс мый нин. «Мича нывъяс Эжва дорö лэччиснысö» бурджык. Помасис нин öд войнаыс.

Но ми мыйлакö заводитам сьывны бара жö война йылыс, мян музыка велöдысьыс радейтана сьыланкывсö: «Он убит у города Медыни, боль моя слеза, птицы смолкли, небо помутилось...»

Аня бара на öлöдчö:

— Но и сильöпиян! Дзикöдз нормöмаöсь... Кыскыны лоö кáртупель чугунсö. Гашкö, пусис нин...

Кыскö тай пöсь кáртупель дорад другөн чукöрмим-а. Пызан гөгөр нин, кодi сувтсөн, кодi пукалö, мурзам да кáртупельсö, пö-лялiгмоз, пызан шöрас кабыр солö чуткыштам-тульöдам.

Аня кöзйякаалö:

— Паньыс нö абу тiяны? Сола тшак то туис тыр да. Нöк кö эськö, но мамöлөн мöскыс пö век на сулалö.

Ми ушъям нин пöсь кáртупельтö сола тшакөн да чöскыдысла юмбыралам воннымöс, мурöктыштам. Доладысла мян дзирдалöны синъясным. Öд тайö бөръя каднас, туйяс лёкмисны да, ю воссьытöдз некодлөн эз вöв витсё грамм нянь норма дорад содтöд нурыс. И со, ю воссьöма... Збыль, праздник талун! Победаыс тö-дöма, корджык вонысö! Тулысыскöд да шондйискöд öтув!..

Победа йылыс юöрыд аскинас нöшта на вайис мянны выль радлём. Училищеса нянь вузалан буфетö вайöмаöсь сьöд нянь пыдди еджыд пызьыс пöжалём пушыд сайкияс. Витсё грамм нянь пыдди кык ыджыд, пушыд сайкиөн. Ми ставным, даснан нывкаыс, вайимö да кузь пызан шöрö пуктiм найöс, быдса ыджыд чукөр артмис! Босьтнысö ог убöлитöй, любуйтчам. Со öд, Победаыд ку-тшöм!

Еджыд булки чукөр мянны лои бур, пötös олöмлөн символөн, кöть и тöдiм — сийö кадöдзыс дыр на. Но надеяыс вöли нин, да тайö и ловтö кыпöдiс. Мортыдлы кыпыд, кор эм бур олём вылас эскöм-надеяыс. Öнi ме сийöс казтыла и завидьтышта на сийö то-миник нывкаясыслы. Налөн вöли водзö олём вылас бур эскöм.



РЕДАКЦИЯСЯНЬ: *нелямынысь унджык во сайын нин петалис тайё повесытыс «Войвыв кодзув» журналын. Авторсё весиг мыжавлісны олёмсё съөдөдөмысь, көть эськё шөр геройсылён, Анна Конаковалён, висытасьёмысь ньоти абу съөд да мисьтём.*

Йёзёдам тайё гижёдсьыс кык неыджыд юкөн: война пансьём да кусём йылысь.

Геннадий ЮШКОВ

Вилядь сиктса ань

«Силос гу ми кодийм буретш сійё луннас, кор Гитлерыд ассьыс пеж аравасё миян вылё усьөдөма. Почта Нина (сійё эз миян сиктысь вөв, да эгё и батыс кузя шуёй, а Почта Нинаён) локтіс силос гу дораным да висыталіс. Звөнитлісны пё да тшөктісны юортны ставыслы, мый Германия войнаён миян вылё петіс. Райкомсянь пё звөнитлісны. А сэсся военкоматсянь, лыддьөдлісны, кодъяслы аскомысь кежлө военкоматё локны. Тшөктісны пё гижавны, да ме гижалі, мед не вунөдны.

Нелямын сизим мортёс вөлі корёмаось. Степанушкоос тшөтш.

Кутшөм али удж та бөрын? Кутчысьёмён и муналім гортаным — ми, гозъя, и мукөдъяс.

Гортын энйкалы тшөкті ноп да туй выв көлуй лөсьөдны Степанлы, а ачым пывсян ломтыны петі.

Зэв мича вөлі рытыс. Бытьё выльён на дзимбыралёмаось, дзирдалё сөмын шоңдыс. Сырчикпиян өти потшөсысь мөдө лэбалёны да долыда тивзёны. Кыдз пу муртса кышакылыштө юкмөс дорын. Оз и эскыссьы, мый война көнкө.

Но он на зэв кузя асьтө ылөдлы, көть и көсьян. Думыштан, мый верөстө нуёны, дай ыджыда ёкмунлас сьөлөмыд.

А кадыд, кор оз ков, кутшөм өдйө кольё. Мукөддырйиыс асывтө виччысьны он вермы, а сэки — эг и төдлы, кыдзи рытыс да войыс коли. Кватитчи да, асыв нин. Вөрзян кад воис Степанлы. А сійё, гашкө, вала петалём дыра на сөмын ныровмунлі, сэсся ме моз син эз на жө куньлы. Сэтшөм жаль вөлі коньөрөс чуксавнысё. Кодкө кө шуис, мый сетышта пё на сылы узынысё, ачыд кө пё сы пыдди сё вой помся он узь, дерт, көсийси. Но коді нө тадзтө шуас? Лои чуксавны, мед ог сёрмөй катан пароход вылё. Ме өд тшөтш мөдөдчылі: мися, көть военкоматөдзыс колльөда.

Зэв өдйө пызан лөсьөді, да сёйыштім. Ми, гозъя, сөмын панясыштім, а энйка эз и видлы, сідз пукаліс. Нинөм пё талун менам вомё оз пыр.

Ольөксан нистіс-узис на. Мый нө сылы, өкмыс—дасөд вылын, оз на пыдөдз шогтө гөгөрво. Мися, садьмөда, колөкө, мед көть мунөмтө аддзылас? — юалі Степанлысь. Оз пё ков, мед бурпөт узяс. Бандзибас небыдика окыштөмөн и прөщайтчис ськөд.

Сэсся, керкаысь петгөдз, недыр кежлө чөв пуксылім. Чеччим, да энйка сыркмуні-бөрддзис.

Эн пё, мамө, бөрд, эн, бөр на воа, — такөдыштіс сійөс Степан. —

Воан, дерт!— вочавидзис энька.— Батьыд уна-ö воис, воддза германскöй вылад мунліс да?

Та бöрын и ме тшöтш бöрддзи, татчöдзсö быттö кызкö кутчыси на-а.— Вєсьшöрö на эськö бöрданныд да,— кайтыштіс Степан, но аслас гөлөсас ньöти нин эз вöв чорыдлуныс. Бöрдтöг ог олöй, мися, он öд вотчыны мун.

Кутчысим энькакöд öтар-мöдарсянныс сойбордьясас да сідзи и петім керкаысь. Правление дорын вöлись мынтöдчим. Тырыс нин сэн йöзыс вöлі. Коді бöрдіс ырзöмөн, коді вöрзывтöг чöв да жугыль сулаліс — зэр улö веськалөм скöт моз. Öтнас Митрей Семö швачкис-йöктіс; гуранассьöма нин вöлі кок улыс пыр öти-лаас сизьдöмысла. Максö Васька сылы гудöкаліс, гöтыр пельпом вылас юрсö лэдзöма да.

— Колö эськö мунтöдз мыйкö висьталыштны да,— шыасис ме дінö Степан.— Мед кольччысьясыс сьölöмнас эз усьны.— А висьталышт, мися.

Степан сувтіс правление кильчö пос вылö да горöдіс:

— Ёртьяс! — эз ло мича горöдöмыс, небыдджыка коліс татшöм здукад. Ачыс, буракö, казяліс жö, лэдзыштöм гөлөсөн сэсся водзöсö висьталіс.— Ми талун мунам ылі туйö. Миян му вылö уськöдчис враг, и колö сійöс бөр вöтлыны. И ми вöтлам. Краснöй Армия ёнсьыс-ён, некодлы оз сетчы. Энö маитчöй, олöй да уджалöй, а вундыны ми бөр воам. Вот аддзыланныд.

Тадзи Степан ышöдіс-ловзьöдіс йöзсö. Некод эз чайт, мый зэв сьöкыд лоö войнаыс, мый пöшти став мунысьыс ловсö сетасны, да та вöсна нин содтöд пыдди и пуктылісны йöзыд Степанлысь кывъяссö. Ачым ме пуктылі и. Вундыны и виччысьны кутім верöсьяснымöс.

Но кöть и ылалöма лои, лысьтам öмöй мыжавны найöс сыысь, мый эз воны урчитöм кад кежлö. Кыдз эськö вот ме Степанушко-öс мыжала, пöръясьысьөн шуа?

Сулалыштім на сэки мыйкö дыра, мед став мунысьыс чукөрмас, и вöрзим-мöдöдчим пристањö. Муртса на воим сэтчö, а тыдовтчис нин катысь пароходыд. Сатшкысис нырнас кыркötшö. Йöзыс, видзöдам да, жуö палуба вылас и пытшкас. И ставыс мужик. Оз, мися, босьтны и?— шуи Степанлы. Сувтіс нин пö да. Миянös, мися, бабаяссö? Ог пö тöд, гашкö, и оз. Вай прöщайтчылам-а.

Ог вöлі думайт, а пристањад и лои прöщайтчыны. А мый нö вöчан, эз босьтны миянös, нывбабаяссö да. Кодсюрö вöтчылісны трап кузяыс верöсьяс бöрсяыс, да кутшöмкö паськыд ныра матрос бөр лёкысь тойлаліс.

Катіс пароходыд, а ми ымзыны колим. Лун шөр гөгөрöдз, гашкö, олім сэн кыркötш йылас, пуксялім да. Сэсся тай разöдчим жö.

А аскинас, рытладорыс, бара лэччалім сэтчö, мед кывтысь пароходсö суны. Быдөн, видзöдан да, тубраса — пöжыштöма мыйкö содтöд верöсыслы ли пиыслы кузь туяс. Чайтім, мый сувтлас пароходыд кывтігад. А сійö эз сувтлы, Эжва шөрöдыс гыпкöдіс-шывгис.

Эг и аддзыв Степанушколысь чужöмсö. Воддза дорсьыс уна вöлі палуба вылас йöзыс, да кысь эськö ме сылысь муса чужöмсö казяла?

Кинаныс öвтчöмнысö кывтысьясыдлысь и аддзылім сöмын. А код-

лы коді өвтчис, мыйён төдан? Ми кыркөтшас өтчукөрынось, и найо сэн, гашкө, кымынён!

Письмө Степансянь воис, да сэки сөмын гөгөрвои, мый аддзылөма менө кыркөтшсьыд. Вөлөгдаын вөлі письмөсө гижөма да чөвтөма. Визя ковтаа пө эн вөв сэн? Визя ковтаа кө вөлін, сідзкө, ме тэ вылө и дзорги да өвтчи кинам. А ме буретш визя ковтаа и вөлі. Бурмыштіс быдён сьөлөмөй, лыдди письмөсө да.

А сэки, кор эз сувтлы кывтысь пароходыд да кор саялі дзикөдз Эжва чукуляс, сэтшөм заведнө менө босьтліс, сэтшөм сьөкыд лолі сьөлөм вылын, көть парсала вөлі ачымөс. Степанлы вылө шаньга тубрас лэччөдлі, да став шаньгасө вөлі посни торпыритөдз чабравсьөма. Но метө мый на?! Митрей Семө гөтыр ваас заводитліс пырны. Кыдз пө ме вит челядсьө быдта? Эз кө кутны, гашкө, и пырис. Мый босьтан сэтшөм мортыдлысь, коді шогысла ас вылас ыджыдунсө воштылас?

Оз, нэм оз вунлы тайо ставыс».

«Сизимдас өкмыс мортөс ставсө война вылад миян Вилядсьыд нулісны. А бөрсө воысьыс квайт морт сөмын петі. Да өд дзоньвидаось кө, а то коді коктөм, коді китөм. Отнас Якө Толя дзонь воис.

Матө нель во муніс войнаыд. Та дыранад кымыныськө нюкыртчыліс жө коньөр аньяслөн сьөлөмныс. Эз өд куш верөсьяс кузяыс ков шогсыны. Уна пөлөс шог ковмис шогавны налы. И компаськөм пондаыд — аслас и челядыслөн ротмунөма, шыбитан выйөдз воөма, но бара лоө дөмлыны да шогмөдны; и керка пондаыд — вөйөма да вужынь-вежыньмунөма, колө эськө керйөн өчапавлыны да веськөдны, вөйөмсьыс из суйны, а коді сійөс вөчас; сөйөм-юөм пондаыд — пызан саяд пуксян да, мед эськө бурпөт чеччан, а кысь сійө абутөм вывсьыд.

Няньнад эськө ми вермим и не сэтшөма дзескөдчывны, куш кө быттө поставка мынтім, но өд сыысь на вывті нулім. Көйдыс вылө да йөзыслы ичөтикаөн сетыштавны сөмын кольөдлім складаным. Гожөмнас быд вежон вөлі нянь ведомость вөчам. Ачым и пуктала, коды кымын кило. Ог жө, дерт, сідзи, мый юрө воас. Кыктор век артышта: коді кызди уджалө и кодлөн кымын челядь. Кодсюрө эськө этша челядяыд шуасьны заводитлісны, мед пө сөмын удж серти няньсө сетапны, да ме эг кеж на синөмланы. Челядыслы, мися, сөйны жө колө. А Епрем Ольош гөтырыд эльтчыштис та кузя: мед пө эз лөсьөдны сы мында челядсьө дай, позис пө өд думыштыны. Тэ, мися, абу кө тыр сюсь-а? Думышт бурджыка да вөлись шердын вомтө восьты.

Зэвтчөмөн война чөжыс олім. Ог норасьөм понда ме гарав, а казтылөм могысь. Мед няньным лым улө веськавлі либө видзыным эндыліс — ачымөс и йөзсө эськө увтырта, тадзтө кө шуа. Ичөт ластва өтчыд йи вывсянь нин ытшкөді: мися, көть сор вылө, а пуктам сэсь эжөрсө. И пуктім. Ачым тшөтш сувтлі ытшкынысө. Дерт, нинөмла таысь калькьявнытө, но мича дырйиыс эгө удитөй сэки, а сэссия кузя зэрласис, и ойдіс ластваыд, дізыгун ва быд вутш костын сулаліс. Кытчө сэтчө пыран? Кымалөмсө и ковмис виччысьлыны.

Ыджыд-ө эськө быттө и вөлі миян колхозыд?! Код төдас, кытчөкө төдчыліс эз государствоыды, мый ми сетлім? Но, мөдарө кө шуны, эгө жө пайкөй сійөс, а мый вермим отсалім на.

Война кусомтö ыджыд пыкös писътöм моз лунысь-лун вич-
чым. Кывсис Берлнтö босътöмьд, да эг нин ылысь и арталöй.
Май 9 лунö со сэсса и тшукис.

Сэк ме водз асывнас Игö тыла йөрö кайли: арнас сю кöдзлим,
да видзöдлыны, кутшöма тöвйöма. Тöвнас джуджыда лымъявлis
и нинöм абу лоöма öзимыс, пемыдвез рöмөн пуритö. Öтилаын
сöмын пызан нель пасьта кымын вижöдöма: арся зэр ваыс, бура-
кö, сэн дыр пукалöма, сэтчö и кынмылöма. Гашкö, босътчас на
овнысö вижöдöминыс, ме киön паръялöмөн гежöм кодь вöчыштi
му вылас. Век на, вöлöм, ковтöм ваыс сэн пукалö, да зарава моз
сöдзöдчыны пондiс, тюрöбөн гежöм помланыс мöдöдчис. Бур вы-
лö лоöма парьясьöмьд менам: мöдысь кайли, да босътчöма вöли
вижöдлöм öзимьд. Вужйыс да му берд заыс, буракö, быд петаслөн
на ловъя вöлöма.

Манитчыштöма лои менам сэк, воддза кайлигад. Вылын шон-
дiön нин лэччи сиктаным. Максö Васька öшинь увтi мунiгөн
гудöкасьöм да йöктöм кыли керкасьыс. Час, мися, кезала. Пыри,
а сэн, гашкö, кызь кымын баба йöктöны кытшөн ветлöдлöмөн.
Максö Васька гöтырыс и гудöкалö налы, оз сяммы да куш кызла-
дор мольяссö личкалö.

— Талун, Анна, эн и думайт уджöдны,— пырöмөн тшöтш ме-
ным шуисны.— Талун — Победа лун, кусöма войнаьд.— Мыйöн,
мися, тöданныд? Почта Нина пö висьталis, сылы звöнитлöмаöсь
да ставыслы тшöктöмаöсь юöртны.

Радиоьд миян сэк эз на вöв.

Сидзкö тай, мися, зэв ыджыд праздник талун. Да пö, ми пö
сельпо востöдлим да ньöбыштим и юыштим нин. А меным, мися,
энö и кольыштöй?— серам сорөн шуи. А гашкö пö, и коли на.
Кыськö стöкан джынийысь унджык еджыд вина вайисны. Ю пö и
ставыс. Лои юны. Нэмөн на еджыдтö эг видлы, да муртса бөр
эз пет. Кодкö няньтор вомö удитis суйны.

Төрöдчи кытшас, öтбөр швачöдны заводитi. Сьывны горöдисны.
Медводз войнаöдзся частушкасьсö ливкйöддисны, а водзö выль-
ясöс. Йöктигмозыс и лöсьöдасны. И пыр шогджыкös и шогджыкös.
Бöрыннас бöрдöм сорөн нин пондiсны сьывны. И ме тшöтш. А
бöрддзытöг он ов, кор веськыда сатшöны сьöлöмад кывъясыс:

Кöни менам мусаöй да,
Кытчö сийö бырöма?
Война вылö мунöма да
Кыз му улö пырöма.

А медбөръя частушкасö со кутшöмös сьылим:

Мунлытöгыд лёк-лёк-лёк,
Дöваавны сыысь лёк.
Вöльнöй светас кö эг чужлы,
Эг и тöдлы тайö шог.

Та бöрын ставөн ырöстим и пуксялим. Бурпöт сэсса бöрдим. Шу-
дöдис и шогöдис öттшöтш миянös Победа луныд».



Ылын ыпъяліс война...

1

Ылын-ылын ыпъяліс война. Но абу судзтөм ылнаын. Пуляяс, бомбаяс да снарядъяс воодчывлісны и мянөдз: кадысь кадö сикт пасьтала кывмөн шога горөдывліс коми ань — усьöма батыс, пиыс, вокыс, верöсыс... Гарья сиктным вöлі, позьö шуны, и тылөн, и фронтөн. Мыйта пöсь вöлі кисьтöма колхоз муяс да видзьяс вылын, мыйта синва! И кымынөн гарьясаыс уси! Дерт, быдлаын тадзи вöлі, но мян, Гарья сиктса челядлөн, синным судзліс сöмын Сыктив ю сайөдз. Коді уси — тöдiм, а код ки помысь — ылöсас. Тöдiм сöмын: усьöмаыс бöрсö некор нин оз во. Ыджыд мамъяс да мамъяс матялöны вöлі пеж немечöс быдсяма кывнас. Раминик анъяс кө нин матькöны скöрысь, сідзкө ыджыд мыж аддзöны гаралана немечыслысь. Куим юра Гундырөн чайтiм сійöс, кодöс быть колö вины.

2

1945 вося тулысын ыджыд удж вöчи — помалі первой класс. Öнөдз на син водзын сёйысь вöчöм чернила доз — кыклы öти, кийн ручка, а ныр улын тетрадь. Сэтчö гижам зэв этша. Быд асыв ставсö тайöс кык дежурнöй ваясны, разöдасны, а урокъяс бöрын нуöны бөр учительскöйö. Некодлөн аслас ручка абу, мый пуктасны парта воргаö, сійөн и гижам. Анна Николаевна Кокшарова, велöдысьным мян, ок и стрöг. Весиг вывтi. Быд «дваысь» урокъяс бöрын рытöдзыс кольöдö школаын. Классö вöлі игналö, а ачыс гортас мунö. Та вöсна ыджыд мам, сы ордын вöлі ола, асывъясна пуктö дöра сумкаö кык-куим пуом картупель да көвдум джын. Анна Николаевнаыд, гашкө пö, бара кольöдас. Кизяла сумкаöс да школаö котөрөн!

Воас кө фронт вылысь письмö, Анна Николаевна сысянь и заводитас велöдöмсö. Письмöыс верöссянныс. Петкөдлас письмöсö, паськөдас сійöс, ылö кыпöдас, со пö öд кутшöм бумагаыс фронт вылад, кыз, еджыд. Сэсся корас ас дінас. Ми сьöрсьөн-бöрсьөн матыстчылам пызан дорас, видзöдлам, кйөн весиг инмöдчылам. Фронтас татшöм бумага. И чернилаа карандаш.

Анна Николаевна пуксьöдалас ставнымöс бөр партаяс сайö (письмö воан луннас ни öти «два» некодлы оз пукты). Урок нуөдö. «Ноко, висьталöй,— юалас,— мыйла став фашистыслөн нимыс заводитчö «Г» шыпассянь: Гитлер, Гиммлер, Геббельс, Геринг да

сідз водзё?» Ми, дерт, огё тёдй. «А сы вёсна,— водзё висьталё Анна Николаевна,— мый найё ставныс гадъяс! Гадъяс!» Ми кывзам лов шы кутёмён да шензьёмён óta-мёд вылё видзёдам. Мыйла нё татшём ним бёрйёмаось аслыныс, асьнысё гадъясён лыддьёны? Сідзкё, найё збыльыс гундыръяс, лёкджыкось на. Помся виалёны бур йёзсё.

Верёсыс Анна Николаевналён уси война помас нин...

Онi миян 2005 во. Тавося рака (март) тёлыс 7 лунё ми колльё-дiм бёръя туйё, дзёбим менсьым медводдза велёдыс Анна Николаевна Кокшароваёс. Ачыс сійё койгортса, велёдчём бёрас ыстёмаось учителявны Гарьяё. Менам медводдза велёдыс... Сэки вёлі сылы 28 арёс. Верёс сайё эз сэсса петавлы. Геня писё быдтiс-велёдiс.

3

1945 вося тулыс...

Ыджыд мам водз сувтліс. Колхозад дыр улыны эз лэдзыны. Ыджыд пач ломтыліс. Школаё мунігкежлё картопельыд век вёлі дась. Ме сувта на, а пачыс ваймёма нин. Разавтёдзным удитам на гадайтчыны. Кутшёмкё кабалатор нямралас сарёга кинас, пуктас пач водзас кёрт тасьтiё да ёзтас сартаса биён. Сюся пё видзёд, кодарё би киньыс котёртас. Ме, дерт, нинём ог гёгөрво, а ыджыд мам шуасьё: «Анна нылёй (сійё менам тьёт) доймалёмаясёс бурдёдалё, со трачнитiс — тайё кысянькё немечьясыс лыйлёны, антикритьясыд, а со ёти би кинь зёв кузя исковтiс — тайё миянлань туйыс, воас, сідзкё, регыд гортё. Пасибё, Енмыс видзё...»

Анна тьётёс дыр на кутiсны армияс, сёмын 1947 воын гортас воис. Фельдшералiс, кыдзи и фронт вылас. Республикаса медся войвыв сиктьясыс ётиын. Во сайын дзёбим сійёс. Гарьяын.

4

Шондiа асыв. Гарьяын мыйкё лоёма! Аньяс нимкодьясьёны, кутлёны óta-мёднысё, инас оз ёшйыны. Кодсюрё бёрдёны и сералёны — нинём он гёгөрво. Микёла Речкёй лун али мый? Сійё Гарьяса празник. Но быттьё водзджык на. Синмё шыбитчё: некод оз уджав. И дивёыс сыын, мый некод оз видчы таыс. Бригадир-нывбаба кутлё радёвёй аньёс, кыкнанныслён верёсьясыс усьёмаось. И ыджыд мам. Медводдзаыс аддза: абу колхоз удж вылын, а радлё йёзыскёд тшётш. Уджалан паськёма, кыдзи и быдён.

А шондiыс югыд. А вёр-ваыс ловзьё. Гёгөр кылам: Победа! И олёмыс ловзьё. Кыпыдлуныс йиджё и миянлы, зонпоснилы. Верстьёяс гажаось кодсюрё. А-а... талун йёз некодыс оз повны. Ыджыд странаным злёдліс став вынгяссё ассьыс и венiс лёк гундыр-фашистёс. Быдлаын талун тадзи.

Со и нимкодьясьё Гарья сикт. Ёд и сійё мукёдыскёд тшётш венiс фашистёс. Зёв дона-доныс. Быд чужём вылын югыд синва.

Венiм! Венiм! Венiм!..

Война кадся нянь

Өчередыд кузь, но абу помтөм,
Вески дорөдз воин — сувт да ланьт.
Гирясөн кылан тэрыб ковгөм,
Аддзан тэныд торйөдыштөм нянь.

Нянь...
Кор петан йөз косттыс ортсө,
Кокни сумка оз пык мунан өд,
Торпыригсө бырөдан на гортөдз,
Эм кө нөшта —
Бырас на и мөд.

Газетъяс ми, зонпосни,
Эг лыддьөй,
Но өд ставсө төдім —
Война кад!
Классөн тэчлім сыланкывъяс пыдди:
«Ми-ян де-лө пра-вөй,
Гит-лер — гад».

Нывбабаяс эскөдлісны мудзтөдз,
Ордйысьөмөн өктывлім кор шеп:
«Врагөс вөтлам — и не сөмын рудзөг,
Шобді көлач сөйны кутам сэк».

Война кад!
Руд енэж,
Көдзыд школа.
Нянь карточка шымыртөма ки...
Ас костаным шог юким да олім
Нывбабаяс, пөрысьяс
Да ми.



И.Г.Торопов война кагö верстьö арлыдагдзыс вотöгдз на кайис вöрö сортовка кер лэгзны. Асьö вергис, висысь мамыслы, ичöтгжык куим воыслы да чойыслы няньöн отсалис. «Регыд дас квайт» повесытын шöр герой Федя Мелехинлöн да мукöд персонажъяслöн öблик-öбича пыр Иван Григорьевич петкöгдис, кызди война кагö тылын «горисны» Ыгжыг Вермöм. «Победа! Победа! Победа!» — радлисны вöр лэгзсыяс. Повесытсö вöли йöзöгöма «Войвыв кодзув» журналын 1971 вося 7, 8, 9 номеръясын. Йöзöдам повесытсыс юкөн.

Иван ТОРОПОВ

Регыд дас квайт

...Уджаланинö бöр мунигчöж ме мөвпалі сы йылысь, кызди водзö овны, мый водзö вöчны. Но сідзи немтор эг и вермы думыштны. Ладнö, мися, виччысьышта мыйтакö, а сэсся видзöдлам.

Вои — а сэнi бара на юр выв тыр удж. И лунгъясыс бара пондiсны төвзыны пуяс вылысь арся коръяс моз.

Öтчыд пукала вöли Шура Рубакинлöн кабинетын, отсая лöсьöдны сплавконтораса директорлы делöвöй письмö. Друг таркнитiс телефон, да сэтшöма, мый повзöдiс менö и Шураöс.

— Федя, вай кывзыв, кодöс-мый сэн косявлöны! — шуис Шура да нюжмасьыштiс. Тайö лунгъясö öд миянлы узьöм ни олöм, кылöдчöм заводитчис.

Ме матöдi сьökыд трубкасö пель дiнö и пырысь-пыр жö чечыштi места вылысь, быттьö менö öтпырйö чушкисны витсö мазі. Трубкаас шемöсмöм гөлöс помся горзiс:

— Победа!.. Победа!.. Победа!.. Победа!.. Победа!.. Победа!.. Германия капитулировала! Победа... Победа... Братцы, победа наша! Победа!.. Победа!.. Победа!..

Ог веляв, мый горзö Шура. Сийö нетшыштiс киысь телефон трубкасö, мöд пельсö ыджыд кинас тупкöмөн ляскысис сы бердö... Сингъясыс ыджöны-паськалöны, нёпкысьöм чужöмыс гөрдöдö, ойдö вöвлытöм шудөн... Гольскис-пуктiс трубкасö, кыкнан кинас öдöбтöмөн чечыштлiс пötөлöкöдз да горöдiс:

— Иэхх!

Топöдiс менö ён сывнас, пондiс окавны вомöс, чужöмöс, юр пыдöсöс, пондiс гöгрöдлыны кабинет пасыта. Горзö:

— Федя, босьт флагъяс, öшлы быдлаö! Тшöкты быдөнлы, мед кодлөн эм гöрд чышгъян, öшöдас жö бедь йылö. Сэсся пырав пекарняö, тшöкты, мед рытöдзыс — көть синсыныс би петö! — а вöли еджыд нянь. Мед быдөнлы пötтöдз вöли! Ме босьта ас вылö магазин-столöвöй, рытнас став йöзöс чукöртам столöвöйö. Тэрмась, браток!

Ме кватитi водзвыв нин дасьтöм флаг чукöр и — шондiа ывлаö. Бухгалтерияса нывъяс танi жö мырддисны менсьым флагъяс-тö — асьным пö öшöдам. Котöртi столöвöй дiнö и давай клёнöдны-кучкавны көрт листö, весиг би саякйö сэтысь.

Быдладорсянь шызьöм бабаяс котöртöны, мужикъяс и, чужöм

выланыс повзём-юасём: мый нё лоёма, абу-ё пёжар? А ме швач-
кёда да горза: «Победа!.. Победа!.. Победа воис!..»

— О Енмёй... Енмёй!

— Да збыль ёмёй олім сэтчөдз?

— Да мун сэсь, кутшөм нин удж талун!

— Бабаяс! Лешакъяс! Челядьнытё босьталёй садикусь, челядь-
тё босьтёй...

— Ок, и юся ме талун, став война пайсьыс...

Бабаяс бөрдёны да усиг да чечигтырйи, повзём сёлаяс моз,
сюв-сявмунёны отарё-мөдарё.

Ме котёрта пекарняё, висьтала олёма пёжасьысьлы еджыд
нянь пөжалөм йылысь приказ. Сійё мыйкө пондө лөвтны: «Кыз
ог!.. Но, Кристос... Пөжала, Федя...»

Сэсся ме котёрта бонаяс кузя ойдөм Ыбын вомөн мөдлапөлө,
важ посёлокө. «Динаяс керкаё өшөда флагсө!»— ас кежысь шуа
ме. Вот эськөн Динайс кё гортын вөлі, но сійё уджалө.

Гортас отнас Диналөн батъыс, Тэрыб Олёш. Сійё муртса на
воёма чери кыянінысь.

— Победа, Алексей! Победа, Михайлович!— горза котөртигмоз.

Сійё мыйлакө кутчысьё паськыд тош дінас...

— Да збыль али мый, Педөр?.. Эн-ё тэ ылав, детина?

— Збыль, збыль! Рытнас столөвөйын пондам пасйыны! Черидь
шедіс эз?

— Шедіс, детина, шедіс... Мича сиръяс пырөмаөсь кулөмө.
Тар эм и... Ёна койтісны, гажа поводдяыс да; кык асылөн өкмыс
тар уськөді!.. Час, өні жө котөртөда столөвөйө...

Молодеч жө начальникным! Тайё лун-войсө ми, дерт, кылім
нин, мый Победа лун матысмө. И Шура вежон сайын нин тшөктіс
Тэрыб Олёшлы: тэ пө миян отнад кужаңжык вөравны да чери
кыйны. Вай пө отсав бурджык пызан дасьтыны. А дон вылад пө
огө сувтёй...

— Кутшөм сэн дон, Павлович,— дөзмис весиг Тэрыб Олёш.—
Ме өмөй ог гөгөрво, кутшөм лун матысмө! Мед сөмын Енмыс
отсалас-а.

И мойвиёма со мортыдлы! Ёкмыс тар! А луныс, луныс кутшөм
мича талун! Шондіа, гажа, жургыштёны Ыбынө котөртись тувсов
шоръяс, ва сора ыркыдөн, сир дука ыркыдөн өвтө парма ягьясысь...
А сынөдыс кутшөм! А сынөдыс мыйтөм! Некор на татшөмыс эз
вөвлы! Некор! Ньөтчид!

— Федя, Федя, вай ме тэнө окышта!..

— Федя, сулав, вай ме тшөтш!

Менам чужөмөй дзикөдз нин көтасёма. И ог төд ёнджыкасө
мыйысь — окасёмысь-ё, синваысь-ё, лапыд тувсов сынөдсьыс-ё...

— Бабаяс, бабаяс, рытнас ставныд столөвөйө локтёй!

Меным сэтшөм окота котөртны улыс складө, Дина дінө. Ме
шуа начальниклы, мися, лэчча да кора сэтчөсьясөс.

— Ме мөдөді нин, Федя, мөдөді. Быдлаө мөдөді. Тшөкті ценнөй
вөр плиткястө бурджыка домавлыны и... Федя, збыль өмөй нө
победа? Збыль өмөй нө ми вермим? Збыль өмөй нө эз нин ло
войнаыс?! И ми ловйөн колим, а, Федя?

Сэсся ми нуөдім медбөръя военнөй сөвет: коді мый вермас
сетны победа пызан вылө. И заводитчис некор вөвлытөм на кон-
дысьөм-ректысьөм, сэтшөм, кор окота сетны отувья пөртиё став-

сö, мый тэнад эм. Сійö лунас весиг зэлыдкодь завмагным ёна небзис: гашкö пö, и немтор оз ло Победа лунсьыд, мыйкö кöть и лишнöй лэдзяс.

И быд керкаын муніс кондысьöм-ректысьöмыс. И йöзыс ась-ныс ёна и шензисны сыысь, кутшöм лышкыд сьöлöмаöсь найö вöлöмаöсь. Да öд сэсся татшöм луныс некор на эз вöвлы...

Столöвöйö шöтöмөн суюим куим рад пызан, и быд рад чегö сёян-юанысь. Кузь нель во чöж ми эгö аддзылöй та мында сёян-юансö...

Мыйыс сöмын тані эз вöв!

И улиса дзирдалысь пувйыд, и пемдыштöм нин сола тшакыд, и сола трескаыд, и жаритöм картофелыд, и шома капустаыд, и пызан пасьтаыс сир чериняныс, и банйöм вылыса еджыд пирöгъяс, кодъяс йылысь ми весиг и думайтнысö нин эгö кужöй... И тайö лышкыда сöвтöм, быд лунъяджык сёян пöвстас чур-видзисны, мед кöть и вель ылынöсь öта-мöдсьыныс, жаритöм таръяс...

А шыд вöлі пуöма менам важ другысь, öтувъя козёл Яковысь. Эг и удит ме сылысь водзöс босьтны... Да и кыз нин öні скöралан сы вылö: Яков, кыз ыджыд сьöлöма патриот, ошйысьтöг-горзытöг пырис öтувъя пöртйö.

А юанторъясыс вöліны: югыдгöрд пув ва, сöмын на вийöдöм зарава и, дерт жö,— спирт...

Со кутшöм пызан ми лöсьöдiм öти лунөн!

И öдвакö сюрис эськö сэки сэтшöм морт — пöрысь ли том ли, мужик ли баба ли,— кодi эськö, столöвöйö пырöм бöрын, эз шатовмун татшöм озырлунсö казялöмысь, татшöм пызан водзас веськалöмысь. И ставсö тайöс вайис миянлы сэтшöм дженъыд, но сэтшöм нин виччысяна кыв — Победа!

Чужöмъяс, чужöмъяс, чужöмъяс... Шудаöсь, норöсь, пöся дзирдалысь синъясаöсь, тшыгла югъялысь синъясаöсь; и став чужöмыс — топалöм бандзибъяса, омöльтчöма, ёна омöльтчöма...

Ас кыöм ковтаяс, ситеч платтьöяс... горзöм-сёрнияс, и какод пыдöсьясысь лыбöм нафталин дук; шензьöм и радлöм, ёнджыкасö радлöм, сьöлöм тырөн радлöм...

И мича чужöмъяс, ловзьöм чужöмъяс, омöльтчöмаöсь, но мичаöсь, быттö весалöмаöсь ас вывсьыныс кузь война чöжөн чукöрмöм сасö.

И ставсö тайöс вöчис öти кыв — Победа!

Шура Рубакин сувтiс, мыйкö кöсйö шуны, ставлы мыйкö кöсйö шуны.

Кутшöм сьöкыд мортыслы — вом доръясыс тiрзьöны, быдсөн чеччалöны, синъясыс, буракö, оз аддзыны, тырöмаöсь синваөн. Стöкансö кутысь кийс дзöрö, и спиртыс визувтö чуньяс кузяыс.

Ставөн лöньöмаöсь и чöла видзöдöны миян начальник вылö, Александр Павлович Рубакин вылö. И тайö сьöкыд здукас некод оз вермы отсавны сылы, некод.

Дерт, Шуралөн лов пытшкын öні нöйтчöны-чепсасьöны уна сюрс кыв, лöсьыд кыв, но найöс некыз он вермы кутны тайö здукас, некыз он вермы кутны...

— Ми вермим, ёртъяс...— лöня шуис Шура да кузя видзöдлiс гөгöр, быдөн вылö видзöдлiс.— Юам победа вöсна...— Сэсся сылөн быттö бырисны кывъясыс.

Спиртыс талун ньоти абу курыд. Абу спирт, а — зарава! Кыдз пулөн юмов ваис, муысь сысьялём ваис. Кутам юны талун! Юны, мыйта лоо, мыйта мыччасны! Ставыскөд отвылысь! Юны ловьяяс вöсна. Юны куломаяс вöсна. Юны победа вöчысьяс вöсна!

Кутшөм чöскыд жаритөм тар кокыс. Кутшөм меліа тöдмасьö сэнi, пытшкөсам, чорыд спиртыскөд... Кутшөм шоныд лои, пöсь весиг... Кутшөм долыд лои, кутшөм шог, кутшөма ыззьöма лолöй... А эстчаньын со Дина пукалö, батыскөд орччөн. Веж идзас кодь юрсиыс усьысь ва моз сямунöма пельпомъяс вылас, личкö найöс, мед көть оз жö лямöд. Кыйкнитліс ме вылö синъяссö и, менам синъяскөд вочаасьöм бöрын, бөр лэдзис. Эз лысьт мекöд орччөн пуксьыны. И ме ачым эг лысьт... Ме весиг эг и думыштлы, мый колö орччөн пуксьыны. Ме сöмын көсйи, мед ставöнкöд öтлаын вöлім, ме талун став йöзсö радейта...

Мекöд орччөн, веськыдладорын, пукалö Марина Кирикова, дженьыд соска вöсньыдик платтьöа, венеч улысь воысьлөн кодь югзысь чужöма. Ме став вир-ййөн кыла, кыдзи дзескыдінад менам кокöй инмöдчывлö Мариналөн топыд яя пöсь лядвей дінö, и таысь менам пемдылöны синъясöй.

Марина тшöктö ёнджыка сёйны меным, ачыс судзöдалö ме водзö чöскыдджыкторъяссö, мыйкö меліа сёрнитö. Сэсся сійö ачыс сувтö да тшöтш гораа шуö тост:

— Бабаяс, вайö юам миян вöсна, став бабаясыс вöсна! Öд мыйта лои терпитны миянлы!..

Юим бабаяс вöсна.

Юим Берлинöдз воысь салдатъяс вöсна.

Юим салдатъяс вöсна, кодъяс эз воны Берлинöдз.

Юим весиг миян вöсна, зонпосни вöсна. Ме ёна нин гажа вöлі, но тайö тосттö кылі на и — юи. Кыдз нö он ю. Öд ми, устөм мерлинаяс, сэтшöма ружтим-мырсим, гөгъяснымöс вөрзёдалім, косъяснымöс чегим, сплав вылын кынмим, сись картупель сёйим,— но бертім мужичöй удж! Верстьö мужичöйяс пыдди бертім!

Сэсся кодi сылö, кодi бөрдö, кодi азыма вензё, а кодi некыдз оз вермы дугдыны сёйöмысь, сёйö, сёйö...

Шура Рубакин ывла вылын нин няръялö-ворсö хромкаөн «Барыня». Йöз чукөр, горзиг-ливкйöдлігтыр, майкöны кокъяснас муртса на вежöдны босытчöм ластва. Менам синъясын йöзыс кык пöвстаöсь нин лоины, но ме век жö казяла, кыдзи начальниклөн гöтырыс, кузь тушаа Нюра, азыма воськовтö Лизалань, фельдшеричалань. И менам пöлөстчöм вежöрын друг быттö ыпнитлö: «Сулав, Нюра, сулав, бур аньöй, оз позь öні сы йылысь, кадыс оз лöсьав...» Ме босьта вильыша сералысь Лизаöс кйöдыс да кыска йöктысьяс шөрöдз. И ачым тшöтш йöкта, зэв сьölөмсянь йöкта, көть эськö ньоти ог куж. Ме сöмын зіля кыдз позьö вылөджык чеччыштавны, мед ставсяыс вылөджык чеччыштны. Ме вылö видзöдігөн Лиза нöшта ёнджыка ваксьö-сералö, куснясьтöдзыс сералö. А ме зіля нöшта на вылөджык скокнитны да йöзлөн юръяс весьтöд видзöдлыны, оз-ö лок миянлань Нюра, Шура Рубакинлөн законнöй гöтырыс...

Бөрьяысö чеччыштөм бöрын ме воштi кок улысь мусö. Быттö муыс кытчöкө вешийс ме улысь, кытчöкө бокö вешийс, и ме дыр лэби сійöс корсигмоз...

Бөр вои ас садьё морёсын сатөк дойысь. Куйла зэв небыд вольпась вылын. Татшөм вылас ме нэмөн на эг узыывы... Кылыштө сөстөм прөстынялөн да пөдушка эжөдлөн свежөй көрыс. Кодкө пөрчөдө менө, гырдазанас личкыштіс морөсөс. Видзөда — Марина.

— Мый, мусаникөй? Палялыштін?..— сійө дугдіс менө пөрччө-дөмысь, сійө друг вылын морөснас ляскысис ме вылө, увсянь шымыртіс голяөс пөсь кияснас, топөдіс да пондіс окавны, окавны — вом дорьясөс и чужөмөс, и синъясөс, и голяөс.

И ме муртса бара эг вошты садьёс. Ме вунөді став йывсьыс. Ме, кутюк моз, тшөтш воча окаси. Ме нинөм эг кыв ни эг аддзы... Став вир-яйөй сотчис менам...

Друг бара доймис морөсөй, и ме шуи, ачым ог төд мыйла:

— Морөсөй зэв ёна доймө... Марина...

И мыйлакө лөсьыд меным вөлі тадзи норасьнысө.

— Кыті нө, кытіджык висьө?— пөся шөпкө Марина. Сійө разис дөрөмөс, небыда малыштіс чорзьөминьяссө, серөктіс да шуис:

— Йөюк...

Сэсса окыштіс кыкнан нёньөс да мелісьыс-меліа бара шуис:

— Йөюк... Тайө тэнад бур висьөм... Быдман тэ... Та бөрын регыд бритчыны кутан... Нывьяс дінө котравны...

Друг сійө пондіс тэрыба пөрччысьны, а ме, яндысьтөм син, гусьоникөн видзөді ме водзын кушалысь, енлөн кодь мича, вирөс шызьөдысь нывбаба вир-яй вылө, и менам дзикөдз вошис лов шыөй. Сэсса сійө тэрыба водіс мекөд орччөн, топөдіс менө ас діна-нас, и ме ачым топөдчи сы дінө. Гөгрөс кынөмыс сылөн и ыджыд морөсьясыс вөліны пөсь пачысь кыскөм небыд тупөсьяс кодьөсь, и кыліс, кызди наын ёпкө-тіпиктө вирыс... И лов шыыс сотө и чуксалө, чуксалө...

— Лок ме дінө, йөюк, лок, — пөся шөпкис Марина.— Эн пов... Некод оз төдлы... Мися, код вөлі Федяыс, да узьтөді джоджын... А мужиклы, волас кө коркө, верма и веськыда висьтавы. Мися, кузь война чөжыс өтчыд, куш өтчыд... сибөдлі ас дінө зонмөс. Андел кодь сөстөм да мича зонмөс... Да, буракө, некор нин оз и волы сійө... Вошис кытчөкө, без вести пө, сөмын на төдмалі... Ланьт, Федя, немтор сэсса эн шу... Оні абу тайө главнөйыс...

Ме сэсса немтор нин эг вермы шуны. Менам став кывьясыс вунісны. Сы вөсна, мый ме быттө эг нин ло ачым ачымөн. Менам ыпьялысь вир-яйөй ойдіс-йиджтысис сьолөмөс сывдысь мус-лунөн да шудөн, и ме быттө понді лэбны кытчөкө, вөвлытөм шудаинө лэбны...

Ой, мый ме!.. Ме, буракө, важөн нин лэба, асивсянныс лэба... Сійө здуксянныс, кор медводзөн участокын кывлі шемөсмөдысь, кодзөдысь... Победа кывсө. Буракө, и Марина тшөтш лэбө. И мукөдыс тшөтш...

А гашкө, ме, Федя Мелехин, сьөкыд кадөн быдтөм-нюжөдөм леторос, өнісянь век понда кытчөкө лэбны — өнөдз төдтөм на шудаиньясө лэбны...

Од войнаыс помасис!..



Кык Саш

ВОЙНАСА ВЕТЕРАНЛӨН КАЗЬТЫЛӨМЪЯСЫСЬ

Редакцияö, көні сэки уджалі, пырис олома нин мужичöй: «Эм кө кад, кывзыштöй менö, пасйыштöй... Гашкө, коркө и сгөдитчас. Ас йылысь ме... Тшөтш и война йылысь. Абу герой, ог ачымöс нимöдны ни ошкыны көсйы. Кыдзи вöлі, сідзи и висьтала. Овöс абу быть быдöнлы тöдны... Ёрт выlö надейтчи-а, эз гиж, сідз и муніс... Куліс тай. Редакцияаныд уджавліс...»

Пуксьöді ветеранöс орччөн да лöсьöдчи гижны, мися, газетад век нин мыйкө туяс.

— Эз кө вöв партия, миян ленинскöй партия, ми эськө эгö вермöй тайö войнаад,— тадзи паніс олома морт, дай унаысь на и шуліс тайö кывъяссö сэсся.

А висьтасьöмыс эз кут помасьны. Дзонь тетрадь нин тырті, магнитофонö кассета тыр гижы, а сійö пыр висьталіс и висьталіс. Сёрнитіс ньöжмыда, унаыськодь дугöдліс гижöмысь: тайö пö абу йöзлы выlö, тайö пö сідз. Эськө оз позь, но медым пö тöдін, гижысь морт.

Коркө помаліс жö олома мортыд, шапкаасис да шуис: «Öні позьö и... Ог öд лоой ми регыд. Некод оз коль. Коді сэки висьталас, кыдзи ставыс вöлі».

Мортыс Ыджыд война вылас парторгөн вöлöма. Партия да парторгыд талунъя оломы быттöкө и абу ас кадся сёрни. Но не-важөн лыдди газетысь: кулома Александр Кириллович... шуам сійöс Ждановөн. А öд буретш сійö и вöлі висьтасьысьнас. И сэтшöма нормис сьöломöй, көть бөрэдзы: көсйыси öд гижны висьтасьöмсö. Көнкө, виччысис мортыс, а пörьялома лои. Войбыд унмöй эз лок, думысь виді ачымöс. А сэсся и шуи: «Мый нö, абу нин кө мортыс, и гижны сы йылысь оз позь? Аслыд лыддьöм выlö али мый сöмын гижлöны морт йывсьыс?»

Аддзи öд уна кабала пöвстö саймовтчöм тетрадьсö, да и кассетаыс абу вошöма. И со, уна во мысти нин, мөд пöв лыдди да гижы ставсö сідз, кыдзи висьталіс сійö. Дерт, кытісюрö лöсьöдышті, мед шыльыдджык быттö лоис. А мый партия да парторг — оломыс сэтшöм вöлі. Кыдзи нö олом оломсö киритан аслад вежöрысь?..

Жданов Саш, кыдзи сійöс шуисны сиктса, туис-быдмис ичөтик Жук грездын. Вöлі сэтшöмыс Удораын. Дас кымын керкаысь и петавліс тшыныс водз асывьясö да сёр рытьясö. Тöv и гожöм. «Виль вын» нима колхоз на вöлі котырталöмны. Öні тайö вынсьыс сöмын нимыс кольöма. Виль оломыс тшыг мөс моз нюлыштіс ставсö, мый сюрис кыв улас.

А коркө Жук грезд шөрөд мир туй на мунліс Ёртомсянь Яренскө. Но өні и сійө вөрсяліс, а керкаяс местаас воййив да петшөр быдмө.

Жданов Саш быдмигөн Жук сиктын школа эз вөв, да зонкалы велөдчыны эз вичмы. Но 1924 воын вөлөсьтысь воом комсомолечьяс восьтасны ликбез, и Жданов Саш, коды сэки ар дас вит нин вөлі, пондас жө велөдчыны. Төдмалас медводдза шыпасьяс, лыдпасьяс. Ойө и велалас лыддысьны-гижны. Сюсь зонкаос сэки индасны пошта новлөдлыны вөлөсьтысянь ас сиктас. А регыд Жданов Саш лоас Жук сиктын медся төдысь мортөн. Көн-мый вөчсьө светас, медводдзаөн төдмалө, а сэсся и быдөнлы юөртө, лыддыны оз ков. Кор вөлөн, кор подөн, пөшти быд лун кызь верст сайө ветлө. Служитө Веньдінын, а олө гортас, кытчө рыт-вой кеж-лө сөмын и воывлө.

Веньдінса комсомолечьяс казяласны зонкалысь сюсьлунсө да пыртасны морттө комсомолө. А комсомолечыд абу нин прөста поштафон,— быдлаө сылы мөг: мый усьөма — лэптас, мый вошөма — корсяс, мый дзебөма — эрдөдас... Быдөнөс велөдө виль ног овны... Перна оз новлы, Енмөс оз төд, мукөд том йөзсө кыскө ас бөрсаяс. Регыд и Жук сиктын лоис асланыс комсомол ячейка. Юрнуөдны, дерт жө, индісны Жданов Сашөс.

Неважөн на помасис гражданскөй война. Коми му сөмын на кокныда лолыштис. Книга-газеттө эз на быдөн судзөдны, дай эз на быдөн и куж лыддысьнытө. А радио йылысь и сёрни на эз вөв. Но йөзлысь юр вемсө позьө югзөдны и электричество битөг, карасина лампа да сартаса би югөр улын. Виль олөм виль ног и корис овны. Кутисны воссявны изба-читальняс. Сиктъясын найө лоисны и библиотекаөн, и клубөн, и виль олөмө велөданінөн. Весиг районысь, а коркө и Сыктивкарысь, волісны лекторъяс, сиктысь сиктө ветліс кинопередвижка, немөй кино видзөдны во-ывлісны дзонь семьясөн.

Воссис татшөм изба-читальняыс и Жук сиктын. Бара жө сэнй кыпакылө комсомолеч Жданов Саш. Но дыр избачавны эз артмы. Мөдөдісны велөдчыны Косланө, юрсиктө, мед бурджыка төдмавын виль уджсө. Куим төлысь чөж велөдісны Сашөс да сы кодь нывзонсө. Унатор төдмаліс Саш. Медводдзаысь сэки босьтис киас баян, гудөкнад да балалайканад ичөтсьяныс нин ворсіс-а. Помасис велөдчөмыс, но гортөдзыс эз во. Сельсөветын шуисны кольны сійөс Веньдінө, бура пө велөдчөма да. И лоис сійө вөлөсьт пасыта медся нималана мортөн. Видзөдан да, бара нин кытчөкө мөдөдөны Сашөс. Оні нин Сыктивкарө, совпартшколаө. Во да джын оліс сэ-ні Жданов Саш. Воис гортас, да индісны велөдчөм мортөс сельсөветө секретарөн. Мый он думышт, сійө и гымыштө.

Біджыд тушаа, вөй ки-кока, мелі да шмонь кыв-вора, абу шог-сьысь, век аския лунө видзөдысь, Жданов Саш вөлі вөлөсьтса быд керкаын дона гөсьтөн. Кага чужө, гөграсьоны-ө, вензьоны-ө — быдлаын Жданов Саш, кызди сөвет власьтлөн морт, вежөра да төлка, өттшөтш судья и прокурор. «Районөдз ылын, сө сайө верст, Ен дорөдз ылын, сод он вөч», со и воөны сельсөветө пөрысь и том, корөны бур сөвет. Жданов Саш ставкөд аддзас колана кыв. А рытнас изба-читальняын и агитатор, и сылысь-йөктысь, и гудөкөн ворсысь. Нывъяс сибалөны зон дорө, кыскөмөн кыскөны

быд войпукö, вöзйысьöны верöс сайö. Но оз эшты семья лöсьöдны Жданов Саш, сійö топыда кутчысьöма выль олöм кыпöдöмö.

Кык во лэбыштис сиктсöветын ноксьöмөн, быттö эз и вöвлы. «Призыв востисны, Сашöс босытисны»,— горöдис Жданов öти рытö да ворсис-йöктис пöттöдзыс. А асывнас нин подөн вöсьлалис ёртыасыскöд райвоенкоматö, сё верст сайö. А сэсянь нöшта 170 верст подөн жö Айкинаöдз. Кокниа и лэччис кузь вöлөксö. Ни коклябöрсö эз зырт, ни пидзöс йöзвияссö эз дойд — велалöма пошта новлігад. Да и мукöдыс эз лябны. Удорасаястö оз повзöд татшöм вöлөкыд: Коптюга-Латьюгаяссянь кымынысь Косланöдзыс 200 сайö верстсö вуджлöма.... А вөр-ваті келалöмыс! А пурйөн кывтлöмыс! Мезень карöдз кывтлісны, а бöрсö Вашка йылöдз подөн жö.

Гöрд Армияын служитігөн Жданов Саш уна жö тöдмаліс вель-торсö, торъя нин политзанятиеыс вылын. Армияыд, вöлөмкö, зэв бур велöдчанін том мортыдлы. Сэні сэсса и партияö примитисны Сашöс. А воис служба вывсьыс да районөн веськöдлысьяс лыдын лои: Осоавиахимөн юрнуöдны индіс райком. Колöны пö мянлы тэ кодь йöзыс! Коммунистлы и ноптö сьöкыджыкöс шуöма нуны.

Сюся босытчис велöдны удораса том войтырöс, мыйö ачыс велаліс: кызди видзчысьны бомбаысь, газысь, кызди бырöдны танк... А лыйсьыны удорасатö и велöдны оз ков — пицальтö кианыс босытöны ар сизимсянь нин, оз кö водзджык. Ачыс тай Жданов сійö арлыднас, сирöта мортыд, пицаль помысь мамсö нин вердіс-а.

Но эз удитны пöртны олөмö ыджыд могсö. Страналөн öдзöсö вөрöг йиркöдчис... Бомбаяс киссисны Брест, Минск, Киев вёлö...

Осоавиахим удж кузя бур отсасыськöд, Вильыб сиктса учитель Александр Михайловичкöд, шуам сійöс Размановөн, кык Саш веськалісны Великой Устюгса пехотной училищеö.

— Овны позьö!— нюмъялö Жданов Саш.— Квайт тöлысьөн и помасяс, гашкö, войнаыс. А оз кö, абу жö лёк — комсостав лоам. Кыдз кöть шу, а младшöй лейтенант.

— Водзджык эн гаркъяв,— быттö тöдöма ёртыс, мый лоö водзö.— Петук кичурулласис да пöртиö веськаліс.

— Ок, эськö петук шыдтö кö öні!— оз сетчы Жданов. Сійö эз кöсйы шогö усьны. Мый кöть оз ло: а олан öтчид и кулан öтчид. А петука шыдсö и öнöдз на эз сёйлы вашкатас. Курöг ни петук Вашка йывса сиктыасын некор на эз видзыны — вöрыс орччөн, звöз вывсянь и тар-дозмöртö лыйны шедö, сьöла лэчтö жытник горуланыс октöны. И сэтшöма гудыртіс морöспань увсö, кор ёртыс кайтіс петуктö — быттö дозмöр шыд дук кыліс.

Тайö лунсяныс Жданов Саш пыр тшöкыджыка и тшöкыджыка кутіс вöтасыны гортсö, öтка мамсö, Вашка йылысь пармасö, сьöла-дозмöра яя шыд, чери-чоля*. Став войнасö муніс, уна и аддзыліс, сёйліс-юліс быдсямасö, а вөр-ва сыв-сорсö эз и вунöдлы, пыр аскöдыс нуис.

Пöшти нель тöлысь чöж «маршируйтöны» Ыджыд Устюгын курсантыяс. Разманов кыкысь нин шыöдчыліс, мед ыстасны фронт вёлö. А Жданов Саш сералö:

— Командирөн он кöсйы лоны? Зіб кузя тушаыд, да дзик сы вöсна, дерт. Командирлы колö мунны взвод водзын — вөрöг сö-

* *Чоля* — чери пöк, нек, мус, сьöлөм, сыв öтлаö солалöм вёлöга.

мын тэнсьыд юртö и аддзыны мөдас. Сы вöсна и нывъяс оз радейтны тэнö, полöны, дөваöн колясны да.

— А тэ быд карö колялан ассьыд «патретьястö»... Кутшöм ныв оз паныдась, сійö и тэнад,— дөзмытöг вочавидзö ёртыс. Сылөн öд гортас том да мича гöтыр колис. Сöмын на удитісны гижсьыны.

— Вашка берёт!— сералö вашкатас «мозынчи» вылын, кор аддзö ёртыслысь нормöм чужöмсö. Вашкаса, кор вермöны мыйöнкö мозынсаös, пыр и рочалöны тадзи, ошйысьöны аснаныс. А тани явö вермис Вашка: кияссö абу домалöма, гöтыр йылысь мөвпавны оз ков. Эз удит семьясö лöсьöдны Жданов Саш. Ёна эз жö и вöтлысь «кузь бöжаяс» бöрся, да и некор на вöлі, весиг сьölöм дойдысьыс эз коль сиктас. Вöлі эськö öтик, Сыктывкарын велöдчигөн вөрзьöдліс сьölöмсö öти ныв, но «ёкыш тшöтя» вölöма да сöмын омöль казгытöмъяс и колисны.

А сідзсö Жданов Сашлы вöлі öткодь, кодкөд рыт колявны, медгыкö юбкаа вöлі-а. Ёртыс мөдарö дай — весиг сёрнитны оз кöсйы Устюгса нывъяскөд, пыр мича Дарьяыс син водзас.

— Петалам карö, увольнение талун сетöны,— шыöдчис öти лунö Жданов Саш.— Ветлам вурсьысьяс дорö.

— Тэнö, тыдалö, вурöмаös кизь моз нывъясыд, а менö вурны сунисыс жеб,— эз кыпав Разманов.

— Йöй кö тэ-а,— оз сетчы Жданов.— Тэнад Дарьюшкаыд важөн нин, көнкö... мөдкөд...

— Нöшта öти кыв, и тэныд пом, Жданов!

Төдö Жданов, дөзмö ёртыс, кор Дарьюш йывсьыс тадзи шуалö. Көть шуöмнад мый вежсяс? Кутшöм эм... Бур кö и бур. Сöстөм кö и сöстөм. Шулöны тай: мича нывлөн пö сьölöмыс тöщö. Гашкö, сідзи и эм да...

Мунö ёртъясыскөд Жданов общежитиелань, кöні салдат паськөм вурьысь нывъяс олöны. Восьлалö кар кузя, а воча нывъяс — военной формааös. Кыдзи колö, кавалеръяс честь сетöны, и водзö. А Жданов сувтіс: «Оз вермы лоны...» Эсійö нылыслөн синъясыс сэтшöм төдсаös. «Аня?!» Ныв быттьö тайös и виччысис, бергөдчис, чепöсйис воча: «Жданов? Саша?!» Сывъясисны. Весиг синва моль гöгыльтчис төдсакөд паныдасьöмысь...

Сыктывкарын на некымынысь кино видзöдны ветлісны öтлаын, Сыктыв дорö лэччывлісны. Субöтникъяс дырйи, позьö шуны, орччөн пуяс садитісны ю берег дорö, кытөн öні Киров нима парк. Öтчыд весиг окыштны кöсйис тайö шоңді кодь гöгрös чужöма, сэтөр синма нывсö, но Аня öлөдіс: «Тэ кытөн велөдчан?!» Саш, дерт, сетчис. Кутшöм нин радейтчöм, кор выль олөм колö тэчны да нöшта кор велөдчан партийнöй школаын. Мөдтор йылысь колö төждысьны. «Эк тэ, дявöl пи!»— видіс сэки асьсö Жданов Саш.

Да и öні Саш да Аня костын нинөм эз артмы. Юасисны öтамöдныслысь быдторсö, казгытісны, а мый аски лöö, некор сы йылысь вöлі мөвпавны. «Сідзкö, тэ курсант жö?» «Да». Со и ставыс, мый удитісны төдмавны öта-мөд йывсьыныс. Жданов сетіс адрес, та вылын и торйөдчисны. Кöсйысисны аддзысьны прöстджык кадö, а талун Аня тэрмасьö. Но муніс война, вөрөг зырис Москва дорö...

Индөм кадö Аня эз лок, и адрессö сэки эз коль... «Ме локта»,— сöмын и шуис. Шуис, и эз лок. И курсъяс помассисны кык тө-

лысьён водзджык. Младшй лейтенант пыдди сетісны младшй сержант звание да училищеса 600 морткөд өтлаын Размановс да Жданов Сашс нуйсны фронт былө, Москва дорйыны. И дорйисны өд. Чегис Гитлерлөн пиньыс Москва дорын. Верховнй Главкомандующойсянь вичмис аттёалана кабала кыкнан Сашыслы. Унаён, дерт, морёсаныс өшөдісны орденъяс да медальяс. А кык ёртлы и Верховнйлөн аттёаломыс вөлі зэв нин дона.

А сэсса найөс став дивизиянас мөдөдісны дорйыны Сталинград. На водзө сувтөдісны мог: дорйыны көрт туй станция. Сталинградсянь 15 верст войвылынджык сулалө тайө станцияыс. Босьтас кө станциясө немеч, и карсө вермас кытшовтны. А карыс ылісяньыс тыдаліс, быттё би сюръя. Волга пөлөн карыс зэв кузя нюжөдчөма, лун и вой сотчө.

«...Чайтлі, мужичөй рөд оз коль Россияын. Дзевавны-гуавны огө удитөй куломаяссө. Взрывөн кодйом муас и гуалам ёртъяснымөс. Вируля яя доймөм йөзыс — сюрсясөн. Ойзөны, бөрдөны, сералөны... Гашкө, и йөймөмаось нин өткымынөн.

Сулалім тані сентябр 24 лунөдз. Миян пулемётнөй ротаын вөлі 270 морт, а колим сизимөн. Сизимөн 270-ыс. Öтик командир дзоньвидза, сержант Пархоменко, коймөд отделениеөн командуйтіс. Öтик, но овыс кутшөм — Пархоменко! Гашкө, сійө и кутіс миянөс. Öд ми быттё эновтөм ді вылынөсь лоим. Некутшөм йитөд ни юөр некысянь. Степь шөрын. Сөйлім сөмын өтчид, вой шөрнас. Ва пөшти эз вөв. Взрывөн перйылөм гуад волө ваыс, но өдйө и косьмө. Öти кружка ва морт былө. Би пестыны оз позь. Вөлөгаыс — вөв яй, ульөн. Яндзим и висьтавыны, но менө босьтіс ош висьом: мыт, веськыда кө шуны. Со тэныд и уль яй... И эз сөмын менө. Разманов орччөн куснясь. Нөшта и бомба осколокөн кокчөрйөс чашнитіс, коклябөр и. Размановлысь пельпомсө жугөдөма. Кок пөлалы да ки пөлалы командир тшөктіс петны тылө, санбатө».

Куим верст ковмис кыті кыссыны, кыті өта-мөд былө мыджсьөмөн куим кок вылын чеччавны кык Сашлы.

«Ме ойза, и Разманов ойзө. Он көсйы горөдны, пиньтө мурч курччөмыд, а он и төдлы, бара нин ойкнитсьө. Кыті сөмын оз доймы. Весиг быттё юр джынйыд абу, непөштө кокыд. Сідз и кыссим. А сэсса вөла паныдасис. Кавшасим телегаас. Раненөйясөс и өктысьө, вөлөм. Нуөдіс ямщикыс нөшта верст куим. Воис сэсса ставнас сотчөм сикт. Зуев нима совхоз пө тані коркө вөлөма. Сылөн ыджыдсьыс-ыджыд овощехранилищын полевөй госпиталь.

Төбисны миянлысь вира дойяс, мыськисны. Но кыськө главнөй врачыс воис да горзыны кутіс, абу пө миянлөн ті — «не нашей части» пө. Нөшта на верст куим пө ас госпитальөдз колө мунны. А миян вын абу. Да и ывла вылас сувтса зэр. Главнөй врачыд зэв скөр: «Раненых вынести». И петкөдісны өд. Пөль кутшөмкө адзис миянөс... Куланныд, шуас, тадзитө, кысьсөй пө туй дорланьыс, воськов ветымын кымын сайын эм гу, ме пө тупка тіянөс идзасөн. Кувнытө тай абу окота некодлы. Кыссим. Тані пө и машина кутшөмкө вермас босьтны тіянөс, шуис сэсса тошка пөльыд. Вевтис миянөс идзасөн, ми и унмовсим. Садымам ли, ог ли, дум абу. А Разманов на и шуө: «Бур йөзыс тай эмось на му вылас». Сэсса он и төд, коді бурыс... Садымим взрывъяссь, самолёт увгөмысь. Веськыда ми былө пикируйтөны. Öти бомба, мөд...

Сэтшөм матын укнитіс, быдсөн чеччөдліс. А сэсса ме быттьө вöйи кытчөкө. Ставыс лөнис. Нинөм ог кыв, но аддза бура. Видзө-да, а овощехранилище вылө öти бөрся мөд вит-ö-квайт бомба укнитіс, пусь-паськерис ставсө... Быттьө немöй кино видзөда аслам изба-читальняын... Вөлөмкө, менö контузитөма да нöшта на и шыбитөма гусьыд метра куим-нель сайö. Размановөс мөдарö нөбөдөма, но ловья жö быттьө, вөрөшитчө... Да-а... Мыйта морт вöлі куйлө госпиталяс... Гашкө, сюрс. Сöмын вируля яй коли. Шпион пö вөлөма көнкө матын немечыслөн, висьталісны бöрын-нас, юөртөма ракетаөн госпитальсö бомбитны. Госпитальсö?! Абу öд штаб ли мый ли! Сэсса и гөгөрво да тышкась этатшөмыскөд... Госпитальтö бомбитас?! Фашистыд фашист и эм!..»

Тадзи висьтасис Александр Кириллович. Эз, сійö ньöти эз скöрав, эз мурчки пиньяснас, эз зэвт кабырсö. Сійö сöмын вись-таліс, мый вөлөма, мый аддзылөма, мый пыр мунөма ачыс.

Да, ловйөн колины кык Саш. Шуö тай ачыс, ог пö и тöд, коді сэки отсаліс: главнöй врачыс-ö, коді вöтліс найöс овощехрани-лище-госпитальсыйс, Енмыс-ö, коді зэрис да пальöдіс, тошка пö-льыс-ö, коді дзевасö вайöдіс, вевттис-шонтіс идзасөн, но сы пыдди ректіс налысь зепъяссö — узиганыс ставсö нуöма, мый вöлі сал-датъяслөн, мед не кувны тшыглы?..

Муыс паськыд, а овны дзескыд... Куйлөны кык коми зон туй дорын, лэптылөны кинысö фронтсянь грымöдысь-локтысь маши-наяслы, тыраыслы и тыртöмлы. Но найöс быттьө оз и аддзыны, некодлы, тыдалö, оз ковны. Быдөн кытчөкө тэрмасьö, да и гөгөр-воана: война. Ставлөн асланыс мог, боевöй задание. Но и на пöв-стын веськавлөны небыд сьölөмаясыд. Со и сувтіс öти. Кабина-сыйс кокныдыка чеччис боец.

— Тиянлы кытчö, ёртъяс?— юалис нывбаба гөлөс. А гөлөсыс сэтшөм тöдса.

«Аня! Анюта!»— Жданов Саш эз кыв, но аддзис... Тайö вöлі Анюта. Но Анюта сійöс эз тöд. «Ті кытысь менö тöданныд?»— вом вөрөм сертиыс гөгөрвоис Жданов. «Но мыйла сійö юасьö? Эз ли мый тöдмав? Тайö жö ме, Жданов... Саша Жданов...». Но оз вермы тайöс шуны, горшас курыд ёкмыль, синваыс, вөлөма тай на көнкө, ойдөдіс синъяссö. Салдат, мужик морт... Некор синва эз петлы, а öні, ныв водзын, бөрөдзис. И гөгөрвоис Жданов Саш, мый му вылас тайö нылыс сылы медся дона да муса, мый коляс кө сійö ловйөн, то дзик тайö ныв пондаыс...

Шофёр да Аня отсалісны налы кайны кузолö, ладмөдчисны ыджыд ящикъяс костö. Сэсса Аня пуксис орччөн, топөдіс Сашлысь юрсö морöс бердас, чышкаліс тошсялөм, нйит чужөм вывсьыс синвасö аслас небыдик киясөн:

— Парма вад кодь синмыд сöмын и кольöма, коньөрöй...

Сэсса нинөм эз вермы шуны, и ачыс бөрөдзис. Оз позь эськө жалитны салдатöс да. Да нöшта и сэтшөмөс, кутшөмөн вöвлі Жданов Саш. А сійö öні вöлі сэтшөм, мый и повзыны позьö: брөд ва, нйит, быттьө пөдөм мортöс ваысь кыпөдөмны. Төдмаліс жö сэсса Аня салдатöс, но некыз эз көсйы эскыны, мый тайö Жданов Саш, сійö Сашаыс, кодкөд коркө гуляйтісны Сыктывкар уличьясті, сэсса аддзысылісны Великой Устюгын...

— Тайö збыль тэ? Збыль?.. Сашук...

А Жданов сöмын синнас лапнитлас — збыль пö.

Машина сувтіс кутшөмкө сиктө, яблоняа ыджыд сад дорө. Быд пу горулын куйлө некымын морт... Тайө и вөлі «налөн» госпитальыс. Став раненөйыс енвевт улын, он кө лыдды яблөк пуяссө. Сад шөрас өти палатка — медперсоналлөн.

— Ми тэрмасям, Саша. Прөщай!

Анялөн кийс пачысь кыскөм нянь тупөсь кодь. А Сашлөн, тыдалө, некор нин некыті оз шонавлы.

«Аня...» — көсйис шуны Жданов Саш: — «Окышт менө, Аня!» Но кылыс оз бергөдчы. А ачыс окыштны эз лысьт, өд сы вылө өні зывөк и видзөдны, көнкө.

— Анята, копыртчы ме пыдди Коми мулы, парма-мамлы... волан кө, дерт... Ме нин... ачыл адзан, кок пөвнам гуын...

Машина тутөсталис нин. Шофёрыс, дерт, гөгөрвоыс жө мортыс, но төдчис и сідз, мый ёна тэрмасьө. Бара топөдліс морөс бердас Сашөс муса нылыс, быттьө сьөлөмнас окаліс зонлыс сьөлөмсө, и котөртис, чеччыштіс кабинаө. Машина чушнитіс бензин дука тшынөн и регыд вошис син водзсыс. Быттьө вөтын вөлі ставыс. Весиг и адрессө бара эз коль нылыс, тыдалө, вунөдіс, а гашкө, эз нин и чайт ловйөн адзывны мусмыны пондөм зонсө, да и ачыс нылыс пуляяслы жө копрасис. Коді төдас, кымынөдыслы оз кажитчы тэнад копырыд.

— Тэныд мый, Ольөксан, — курыд нюмөн шмонитө өрт вылас Жданов Саш. — Вундасны ки пөвтө и бара здоров, школаад водзө велөд. А ме, кок пөла кө лоа, уджтөм коля. Помасяс войнаыс да мый кута вөчны? Рөдина дорйысьяс оз кутны ковны. Осоавиахим бырас.

— Вомыд кө дзонь, уджтөм он коль, — такөдө өртсө вөвлөм учитель. Кутан ветлыны сиктысь сиктө да мойдны йөзыслы, кызди ме вошті сой пөлөс, а тэ кок пөвтө.

— Тэ тай со вомнад жө кынөмпөт корсьны велөдчылөмыд... Меным кө эськө велөдчыштны... учительөдз, шуам. Кызд чайтан, Ольөксан, артмас меысь учитель? — оз нин шмонит Жданов Саш.

— Воан учительөдз, Сандыр, воан. Эн шогсьы. Мед сөмын ловйөн кольны да немечөс вермыны.

— Вөтласны, эн пов... Александр Михайлович, — ыдждөдлө учительөс Жданов. — Кызди чайтан, паныдасям-ө ми нөшта коркө?

— Ме да тэ? — быттьө оз гөгөрво Разманов, а ачыс нюмдыштілө, видзөдлө, кытчаны неважөн Аня төвзис автомашинаын.

— Ми — мый, эштам на өта-мөд дорө гөсти волыны, — нормө гөлөсыс Ждановлөн. — Анякөд, шуа.

— Сотчө сьөлөмыд?

— Эз кө дзикөдз нин пөймө пөр. Быттьө вөтын ставыс...

Кодкө зургис Сашлы пельпомас.

— А тіяны мый, торья команда колө?

На водзын сулаліс старшина: ыджыд усьяса, олөма морт. Дөзмөма мыйыськө, горзө, но пөдөма гөлөсыс, сёрнитө киргөмөн. Вөлөмкө, коді вермө сулавны, сувтөдөны стройө.

Сюрс да кыксө морт чукөрмөма раненөйясыс тайө енвевтүвса госпиталяс. Öтияс дырджык нин куйлөмаось, мөдьяс сөмын на воёны. Ставөн уль му вылын: коді пукалө, коді куйлө. Көть и абу Коми му, но сентябр помланыс и татөн төдчө ыркыдыс.

Командованиеысь кодкө ыджыд морт воөма. Ёна и горзис, мыйла осьясаинын йөзыс куйлөны. Быттьө мыжаясыс вөліны

асьныс раненёйяс. Но ыджыд начальник воёма ас кадö. Аскинас жö и воис сё автомашина. Ставнысö сөвтисны да нуисны километр нелямын сайö, тылö. Сэтöн эз нин кыв лыйсьöм шыыс.

Вайöдисны Александровка көрт туй станцияö, сөвтисны вагонъясö. Тшöктöны пыр жö нуöдны, а станцияса начальник оз вермы тайöс вöчны — станцияыс тырöма эшелонъясöн. Зыкöдз воисны.

— Гөгөрвоёй тi! Ог вермы ме тайöс вöчны, ог вермы!— кевмысьö станцияса начальник, неыджыд тушаа, тупыль кодъ том морт.— А онö кö мунöй, асьныд мыжманныд. Менам шуöма: вой шөрнас, дас кык часын, немеч бомбитны кутас.

— Да кытысь тэ тöдан?— оз кывзысьны сылысь.

И стöч вой шөрнас ывла вывсö югзьöдис ракета. Кутисны журъявны самолётъяс, шötöмөн шötисны бомбаяс. А станцияас öд эз öти эшелон вöв. Тырöма став туйыс, сы вöсна и оз вермыны петны тыра эшелонъясыс.

Гөгөр сотчö. Кодi вермис, дерт, чеччалiс вагонъясысь да котöртiс степö. Но ывлаыс лоис сэтшöм югыд, мый гөгөр ставыс тыдалiс. Самолётъяс — чотiгтыр кыссысь салдатъяс бöрся. Шырисны да шырисны.

Жданов да Разманов петисны жö вагонысь. Мöда-мöдыслы отсасьöмөн позис котöртны и степö, ловтö тай дзебны көсьян, кыгчöдз ловъя. Эз и тöдлыны, кыдзи тiмбыльтчисны кутшöмкö гуö. А гөгөр грымгис, увгис, сяргис, трачкис, ойзiс да горзiс...

Дас сизим вагон дзикöдз сотчис. Куим сюрс бердö раненöй. Станцияыскöд орчча колхознöй му ылö, братскöй гуö колисны найö... Станцияса начальник мыжа морт моз сулалö братскöй гу дорын, кутö фуражкасö киас: «Шулi öд, шулi... Эз кывзысьны...»

Вөлöмкö, быд вой бомбитöны, öти и сiйö кадö. Немечыд и виавнытö кужö стöча, бур механизм моз.

Нöшта мыйтаöнкö кулисны туйын да найöс öтувъя гуö жö дзебисны. А кык Саш, кык коми морт ловъяöсь, пессöны, но кувны оз көсйыны. Разманов со вöt пырыс ойзö: «Киöс, киöс энö вундöй!»

— Здравьеыд кö эм, и юртöг позьö овны. А тэ ки понда бöрдан,— шмонитö Жданов Саш да малалö бинтөн тöбöм юрсö: пельыс воссыштiс неуна, кывны кутiс салдат.

— Империалистическöй война дырйи сэтшöмтор вөлöма,— кутчысьö сёрниö садьмöм Разманов.— Бать висьтавлiс... Полевöй госпитальö локтöны раненöйяс. Тадзи лун и вой. Хирургыс öтик. Вундалö сöмын, некодöс оз жалит: то ки, то кок, то ки, то кок. Дöзмас сэсса: «Мыйла нö тiян сöмын ки да кок, сöмын ки да кок ранитчö?» А öтик сэнi тэ кодъ жö, тыдалö, вөлöма. «Господин доктор,— шуö,— ме бöрся салдат локтö, юрсö киняулас вайö. Вурны ковмас, а оз вундыны». Салдатыд шмонитыштас да и вунöдас. А рытнас докторыд корсяс сiйöс да юалö: «Браток, а көнi нö сiйö раненöйыс?» «Кутшöм раненöй?»— оз гөгөрво салдат. «Но, кодi тай юрсö киняулас вайö?» «Э-э, доктор,— жалыс пeтас салдатлөн.— Тыдалö, ёна мудзöмыд». Вөлöмкö, докторыд лун-тыр мөвпалöма сы йылысь, кыдзи кутас вурны салдатлысь юрсö.

— Да-а, оз сöмын ми воклы мөрччы, медициналы тöдчö жö войнаыд. И кодлы колö öта-мöдöс виöмыс? Вот, шуöны, дикаръяс пö öта-мöднысö сёйöны, көнкö Африкаын да Австралияын. Но найö дикаръяс. А Германия? Образованнöй Европа. Гёте, Бах,

Маркс, Энгельс... Тэ гөгөрвоан, Александр Михайлович, мыйла найö виаlöны йöзсö?

— Да мый тэкöд, Александр Кириллович?— быттö оз гөгөрво ёртсö Разманов.— Кöин мыйла виаlö ыжъясöс?

— Э-э, другö, кöинлы сёйны колö. Оз кö тшыгыав кöин, и ыжсö оз сёй.

— А фашистлы оз ков? Капиталлы оз ков сёйны? Найö кöть менсьым лыöс и оз вильöдны, кыдзи тэнад дикаръясыд, но менам му вылын нянь быдмö, му улын из шом куйlö, нефть, кöрт. А вöрыс миян низя да моя, Мозын да Эжва юяс сьöмгаа да кебöса... Сйö и колö налы... А тэ — «оз сёй». Кынöмыс буржуйлөн некор оз пöтлы.

Дыр чöv олöны ёртъяс. Мөвпалöны ас кежаныс. А поезд зутшкö-мунö водзö, Москва дорö воö. Матыстчылис столица дорö, но эз пыр, а асывыввлань сетчис, шондi петанладорлань, Коми мулань. Но и Коми муö эз кеж, водзö гöгыльтöдiс. Урал вуджис, и пыр водзö и водзö мунö эшелон.

— Тэ со докторъясöс жалитан, а менам сьöлöмöй потö, кор аддза шынеля нывбабаöс. Найö мöй воуйтысьяс? Аня со кöнкö сэнi жö. Мый эськö öнi вöчö? Меным кажитчö, эз санитарнöй машина вöv. Сидзкö...

— Эн и юав али мый?

— Эг.

— Анюшыд тэнад, тыдалö, фронтöвöй гöтыр кодлöнкö...

— Эк тэ, жöник. Дарьюшыд дум вылад уси, оз-ö нин кодöскö вольпасяс шонты.

— Сэнi и мужикыс эз коль.

— Сы вылötö кодкö сюрас, велöдны сэтчö оз ков...

Бара чöv усьlöны кык ёрт.

Вагонын кодкö лывкйöдланаа сьылö:

**А завтра приедет главный до-о-ктор
Ванюшины раны зашива-а-ть.
Проща-айте, папаша и мама-аша,
Прощай, милосердная сестра-а-а...**

Новосибирскын кык другöс суйисны баракö, заразнöй госпитальö. Кыкнанныслысь аддзисны дизентерия.

— Öти гундыр вомысь петiм — мöд гундыр вомö веськалiм,— оз нин шмонит Жданов Саш. Танi и шмонитнытö он кöсйы. Жданов да Разманов куйлисны орччөн, пöшти öдзöс дорас. На дiнтi быд лун петкöдiсны 20—25 шой. Быд лун!..

— Татысь, тыдалö, сöмын таdzi и петöны,— шогö усис Разманов. Сйö эз радейт шмонитны, но и шоглы эз жö сетчыв. А öнi дзикöдз нормис, весиг сёрниö оз сетчы.

— Сюзь Матвей адысь петöма, а ми татысь огö мöй петöй ловйөн?— ёртсö такöдö Жданов Саш.

Лун бöрся лун кольö, шойяс век петкöдöны, регыд наöдз воасны... Но бур йöзыд эм на му вылас. Видзöдö Жданов öтчид, а тöдса старшина пырис, кодi тай яблök пу увсьыд найöс чукöстiс стройö сувтны. Ыджыд ускаыс.

— Земляк, табакөн он гöститöд?— шыödчис старшина дорö Саш. Эз öдорт старшина, сетiс чигарка вылö и ачыс накöд пес-

тысис. Сійö, вöлöмкö, пельшар тані. Саш и корис:— Другö, мезды миянöс татысь. Кыдзи кöть, а мезды. Аддза, бур сьöлöма морт. А буртö Ен оз вунöд,— эз тöдлы Жданов Саш, атеист, коммунист, кыдзи Енмöс отсöг вылö корис. Весиг яндзимысла гöрдöдiс пель йылöдзыс.

Старшина нюмдыштiс да и шуö:

— Висьталöй главнöй врачлы, мый онö висьöй. Лэдзас. А сэ-ки и ме верма отсавны, инда мöд госпитальö. Колö сöмын дзик сөйтöг овны...

Куим лун да вой эз сөйны сiдз нин тшыг да косьмöм Жданов да Разманов. Куим лун чöж кевмысисны докторлы, мый оз нин висьны.

Лэдзис öд главнöйыс. Дöзмис-ö налөн норасьöм-горзöмысь, старшинаыд-ö кыдзкö отсалiс, но лэдзис. И веськалiсны найö мöд госпитальö. Нöшта куим лун дзебисны висьöмнысö кык Саш. Но дыр-ö дзебан. А мыйкö сөян — вирөн мунö. И найöс кыкнан-нысö томналiсны торъя жырйö да куим тöлысь чöж мöритiсны лекарство вылын. Куим тöлысь чöж! Лы да ку сöмын и коли Жданов Сашлөн. Эз ёнджык вöв и мöд Сашыс. Жданов и кывны бара омöльджыка пондiс. Коркö сэсся ичöтикаөн и кос нянь сетны пондiсны. Сэсся пыр унджык и унджык. Вын кутiс содны. Воис кад, и кык норма вайисны ныр уланыс.

«А тэ шуан, ловйөн огö петöй»,— гижис бумага вылö Разманов да мыччис дзикöдз пельтöммöм Ждановлы.

— Колö вöлi эськö öтнамлы пышйыны, мед сэтчö и колин... да Дарьяыд жаль лои,— нурбыльтö Жданов, а сэсся другысь гораа серöктö. Важөн нин эз петлы серамыс шог тöдтöм мортлөн, дзикöдз выныс бырлiс. А со тай, бара на морт: «Сiдзкö, овны позьö!»

Дöйяс бурдiсны, дизентерия венöма жö лои. А вот пельтöм салдат — кутшöм сiйö воин? Но, вöлöмкö, «эскулапъяс» и тайöс вермöны бурдöдны. Торъя госпиталь эм сэтшöмыслы. И ылö мунны оз ков, тайö жö карас. Нöшта кык тöлысь чöж ковмис валь-масьны. Öнi Жданов Саш öтнас нин, Разманов другыстöг. Сiйö кытчöкö вошис воддза госпитальысь петöм бöрын. И сэтшöм гажтöм Ждановлы, быттö сирöтаөн колис. Но шудыс вöлöма на. Петiс госпитальсыс, да индiсны сiйöс 280 запаснöй полкö. А Разманов сэнi жö вöлöма, быттö сiйöс виччысьöма:

— Кык мортöс политшколаö ыстöны. Мунам?

— Грамматикатö омöлякодъ тöда,— падъялiс Жданов.— Политшколаыд öд...

Дум вылас уси, кутшöм сьöкыд вöлi совпартшколаын. И алгебра, и геометрия, и философия — ставыс сетчö кокниа, а гижны — öшыбка вылын öшыбка. Но и торйöдчыны Размановкöд абу нин окота.

— Эн пов, отсала,— такöдiс ёртсö вöвлöм учитель.

И со бара лоины курсантъясөн, öнi нин военно-политическöй училищеын, Иваново карын. Воддза курсанталiганыс кö чайтiсны, войнаыс помасяс натöг, öнi гöгöрвоисны, мый удитасны на и велöдчыны, и вöрöгкöд тышкасьны. Дерт, натöг Паулюсöс «пöрт-йын пуисны», но водзын вöлi на сымда кар, сымда сикт да ичöтик грезд немеч улын. Тайöс öнi ставөн гöгöрвоисны.

Велöдчан кад лэбовтiс, эз и тöдлыны. Сетiсны налы младшöй лейтенант чин и вит мортöс мöдöдiсны 3 Украинскöй фронт вылö.

«Воим Будапештö, пырим штабö. Командующöй Толбухин дорö, дерт, эг веськалöй, но вочаалис мянöс генерал жö. Бур,— шуö,— резервын лоаныд. А столуйтчыны пö кутанныд танi, фронтлөн командование кытөн сёйö. Ёнмöдчöй пö... Талонгяс сетисны. А сэнi — сёй, ю мый колö, винаыс сöмын дас пöлöс, венгерскöй и французскöй... Но — сё граммөн морт былö. Позыö и овны тадзтö...»

Пукалöны младшöй лейтенантгяс генеральскöй столовöйын, том нывгяс налы сёян-юан вайöны, кывнысö кеслöны — кытысь пö былъ «майоргясыс» усисны? Гашкö пö, киноö мянöс новлöдлыны мöдасны? Гигзöны. А «майоргяслөн» кывныс абу жö косъмöма, воча шмонитöны...

И вот, öтчыд столовöйö кык военнöй пырисны: полковник да лейтенант. А лейтенантыс — нывбаба... Аня. Да, Сашлөн Анятаыс, кодкöд куимысь нин паныдасьлис и торгьявлis. Полковник эз кут сойбордöдыс нывсö. Матыстчисны тыртöм пызан дорö да кутисны пажнайтны. Ждановлөн синмыс быттö крукачис Аняö, крукачис да и сибдis. Кутшöмкö лöглун весиг кутis лыбны полковник былö, сёлöмыс зöргыны пондis, дульыс горшас сибдis. Былөн казялис младшöй лейтенант, мый кöть и военнöй морт, кöть и война мунö, а сйö радейтö тайö нывбабасö, радейтö, кöть мый сэсся вöч. Гашкö, полковникыс сылөн верöс нин, либö фронтöвöй «верöс»... Уна «гашкö» чужлис вежöрас. Но Аняыс, Анятаыс öтик. Но мый нö тайö? Анялөн сингясыс дрöгмунлисны, кор видзöд-ласгясныс воча лолыны, öзйылисны, но бöр кусисны... И здук мысти ныв дзик веськодя видзöдлис Ждановлань, быттö эз и тöд сйöс. Жданов кöсйис виччысылыны, кор помаласны пажнайтны, да сэки матöдчывны, но öнi сёлöмыс пузис. Ёртгясыс петисны нин ывла былö, а сйö колис öтнас пызан саяс, и эз вермы чеччыны некыдз, став вир-яйыс быттö сёлкis, пельпом вылас лэдзисны пызь тыра мешöк, кутшöмгясöс коркö кыскавлis баржа вывсаянь сельпо складö. «А, юрам оз кучкыны!» — збоймöдчис Жданов да кольмöм юра кыпöдчис пызан сайсгыс. «Полковник ёрт, разрешитöй шыöдчыны лейтенант дорö»,— шуис младшöй лейтенант (тадзи тшöктö Устав). Но эз виччысь, мый шуас полковник, нюмсö пычкөмөн шыасис нывбаба-лейтенант дорö комиөн:

— Видза олан, Аня!

— Тияны мый колö, младшöй лейтенант ёрт?— друг дöзмөмпырысь юалис Аня. Дерт жö, рочөн.

— Анята, тайö жö ме, Жданов!— сэсся рочалис.— Это я, Саша!

— Извините, младший лейтенант, вы обознались. Мы с вами не знакомы.

— Как?..— кöсйис на мыйкö бара висгьявны Жданов, но полковник чеччис да нюмтöг, но мелia шуис:

— И не то бывает в такой заварухе. Извините. Пошли, Тамара Васильевна, нас ждут.

И петисны.

А Жданов пуксис улöс вылас, кытөн пукалис таöдз Аня, кодöс мыйлакö шуисны Тамара Васильевнаöн. А мый сйö збыльысь вöли Анна Ивановна Забоева, кодкöд Жданов Саш велöдчылис Сыктывкарса совпартшколаын, тöдis стöча. Но мыйла... Мыйла Анялөн мöд ним?.. Эк, война, война...

А рытлангыс кык Сашöс мöдöдисны фронт былö.

«...Командование ачыс тӱдӱ, мый вӱчны, налӱн могъясӱ ме эг пырӱдчыв. Батальонса командирӱн вӱлӱ майор Смирнов, тӱлка морт, кыскӱ Москва дорыс ачыс. Ар комына, ыджыд тушаа, сьӱд синъяса кадрӱвӱй военнӱй. Замполитнас — капитан Нестеров, неыджыд тушаа, лӱз синъяса — Архангельскыс вӱвлӱм учитель. А ме батальонса парторг. Первойсӱ ротаын вӱлӱ, а сӱсся батальонӱ вуджӱдӱсны. Комсоргнас вӱлӱ Козлов, кыскӱ Айкинала-дорыс, вунӱдӱ нин, кутшӱм сиктыс, эскӱ и висътавлӱс да. Сыкӱд кыкӱн ми подчиняйтчим замполитлы.

А могыс миян вӱлӱ сӱтшӱм: ышӱдны боецъясӱс вермана тыш былӱ. И партияӱ да комсомолӱ примитны.

Эз кӱ вӱвны коммунистъяс да комсомолечъяс... Эз кӱ вӱв партия, ми эскӱ эгӱ вермӱй... Ме тадзи чайта...»

Ӯтчыд локтӱс Жданов Саш дорӱ Разманов, кодӱ ӱнӱ вӱлӱ разведчикъяслӱн парторгӱн.

— Анятӱ аддзылӱ,— вашнитӱс пеляс.

— Но и мый?

— Кыдзи «мый»? Чолӱм ытӱс.

— Колантор,— столовӱйын аддзыслӱмыс сьӱд саӱн пуксис Сашлы сьӱлӱмас.

— Да тӱ эн дӱзмы, эн лӱгав сы былӱ. Сӱйӱ абу мыжа.

— Полковникыс мыжа, да?

— Разведкаын служитӱ тӱнад Аняыд.

— Но и мый? Тӱ со разведкаын жӱ. Сӱдзкӱ, тӱянлы быдтор позьӱ?

— Вот эскӱ сетӱ кӱ пель бокад, эн тшӱкӱлдывайт... А нӱшта парторг... Тюни гындыны тӱныд колӱ. Аняыд — настӱящӱй морт.

— Гашкӱ, тӱ нин сыкӱд... сы вӱсна тадзи ошкан?— Ждановӱс быттӱ чущканзӱ чущкӱма, оз бурасъ.

— Эк тӱ... а нӱшта другӱн шусьылӱн... Ме, сӱдзкӱ, сӱдз и висъ-тала Анялы,— дӱзмис жӱ разведкаса парторг.

— Висътав, колӱкӱ... Синва ог кут кысъяны.

Ждановлы колӱ вӱлӱ эштӱдны бумага уджъяс, да сӱйӱ весиг юрсӱ эз лӱптыв. Сӱдз и мунӱс Разманов ӱртыс, сӱмын колис улӱс вылас неыджыд коньяк доз — плавкӱс сулея, кодӱс зептын бур новлӱдлыны. Американечъяс татшӱмсӱ вайлӱсны, кор волӱсны частьӱ.

Батальон сулалӱс неыджыд сиктын. Штабыс пӱдвалын, кӱтъ керкаыс и эз вӱв жугалӱма. А враг сулалӱс ю сайын, но кык лун чӱж нин некодарсянь эз лыйсьыны: мыйкӱ шойччан кад модаа пуксьылӱс, быттӱ сӱрнитчӱмӱн. Но снайперъясыс пыр колӱс виччысьны, да керкаас некодӱ эз и овмӱдчы.

Документъяс эштӱдӱм бӱрын Жданов петӱс аслас жырйыс, босьтӱс бинокль да кайис керкаас, мед ӱшиньӱдыс видзӱдлыны ю сайсӱ. Разманов мунӱм бӱрын сӱйӱ, дерт, гӱгӱрвоис, мый лӱка вӱчис, да ӱнӱ видӱс асьсӱ. Ӯд мый лоӱ накӱд аски, кодӱ тӱдас. Со сулалӱны оборонаын. Мунӱсны, мунӱсны водзӱ и друг сувтӱсны Балатон тысянь войвылӱ, Раба нима ю дорӱ, Папа кар бокӱ...

Ю таладорын, верст пасъта ковтысын, куим радӱн окопъяс. Ю сайын немечлӱн — пӱшти сӱдз жӱ. Сӱнӱ и танӱ — салдатъяс. Виччысьӱны... А мый виччысьӱны? Приказ? Письмӱ гортсяньныс?... 18 километр кузьтаӱ нюжалӱм траншеяс. Найӱс кодйыны мобилизуйтлӱсны весиг сиктса олысьясӱс. Татшӱмторйыс важӱн нин

эз вöвлы. Тöрыт на самолётсянь шыблалісны листовкаяс. Немеч повзёддö: «Толбухинöс купайтам Дунайын, Жуковлы сетам Берлин». Мыйла Жуковлы көсйöны Берлинсö сетны?.. Толбухин — тані командующöй. Сідзкö, тані лоö медся пöсь.

Разведка юöртіс: татчö содтöд шыбитöма 13-öд СС дивизия да танкъяса 4-öд дивизия. Ставыс ю сайын нель дивизия пö сулалö. А юыс ичöтик, Ждановлөн сикт горулын Вашкаö усьысь Лопи кодъ. Тöрыт миян командование вöчис манёвр, мед пöръявны прöтивникöс — быттöкö сьлөн выныс абу этшаджык: ю кывтчöс и катчöс 40 верст паськөдчис армиялөн группа. Командование, вөлөмкö, оз тöд, мый буретш таті, 18 километр пасьта ковтысöдыс, көсйö зырöдны немечыд. А миян тані öти дивизия и сулалö. Омöльдзыка уджалöма разведкаыд. Сы вöсна и эз воны ас кадö противотанкöвöй пушкаяс.

И со пансис тыш. Шуйгаладорын Балатон ты — венгръяслөн море, кыдзи нöшта шуöны сійöс. Водзвылын и мöдарладорын — ю. Ю сайсянныс и зырöдіс немеч. Медводз мöдöдчисны «Тигр» танкъяс. Пöшти пехотатöг. Миян авиация на вылö шыбитчис — помтöг көдзис вылысаныс бомба. Жданов чайтіс, ни öтик танк оз письт тайö би-тшыньсыс. Авиация лэбис бөр, разаліс тшыныс, а танкъяс век мунöны. Пель чунöдана залпөн босьтчис танкъяслы паныд 75 да 45 миллиметраа артиллерия. Но снаряжьясыс, быттö лё-киник истöг тувъяс, сöмын чиркнитлісны танкы кымöсас, би кинь муртса и чеччыліс.

Жданов, вöвлөм пулемётчик, радейтіс бергавны пулемёта ротаын. Тыш пансигөн сійö тані жö вöлі. Сöмын на чукöртчылісны, примитісны партияö куим мортöс: салдат Аввакумовöс да расчөтса кык командирöс, Морозовöс да Суржкоöс. Аввакумовöс, Сибирса кержакöс, ротаын шуисны «батюшко Аввакумөн». Эз прöста сибды салдатлы тайö нимыс. Савва Аввакумов вöлі этша сёрниа, но уна тöдысь морт.

— Бать-мам менам староверъясөн вöліны,— öтчыд висьтасис сійö.— Олісны скитын, ыджыд нюр шöрын, йöзысь бокрын. Быдми сэтшöмөн жö, кыдзи найö: Ен, видз-му, вöралөм — со и ставыс, мый колö вöлі меным. 1937 воын, буретш 17 арöс тырис, вöрын паныдаси геологъяскöд, и эг бергöдчы гортö. Бать-мамлөн меысь кындзи вöлі на кык ныв да кык пи.

Экспедицияын «шöйтігөн» Савва, дерт жö, лоöма мöд мортөн. Аввакумов ёна лыддьысьöма, босьтчылöма велöдчыны. Но дзугöма война... Тані сійö ёна матысмис Захарычкöд, вöвлөм учителькöд. Захарыч некор эз тöдчöдлы, мый сійö коммунист. Но öти атакаын комиссар горöдас: «Коммунисты, вперёд!» И Захарыч медводдзаяс лыдын чеччас да пыр жö усяс... И тайö атака бöрас «батюшко Аввакум» чорыда шуис: «Парторг, примит менö партияö...»

Жданов кыссис Аввакумовлань, а сійö öтнас пулемёт дорас. Чужöмыс вирöсь.

— Гадыд, лыйис, быттö синмам видзöдіс,— пинь пырыс сөдзöдіс Савва.— Öтнам коли. Санитаръяс нуисны командирöс и коймöд номерöс.

— Вай отсала.

— Лейтенант радöвöйлы?

— Чудак! Абу мöй öткодъ, коді гашетка личкалö, а коді лента мыгчалаö?

— Ог...

— Но, мед, ме командирён лоа, а тэ отсась. Позьё тадзи?

— Тадзи позьё,— зумыша видзёдліс парторг синъясё салдат.

Танкъяс дзик нин матынёсь, сюра-сяракылісны гусеницаяс, укайтисны пушкаяс, пель дорті чива-чувакылісны пуляяс. Пехота, коді мөдөдчыліс танкъяс бөрся, пөшти эз нин вөв: коді куйліс, коді бөрыньгчис. Но дас кымын танк кайөмаөсь нин воддза бруст-вер вылө. Со өтик бергөдчис да мөдөдчис траншея пөлөн. Но сэк жө ыпнитіс.

— Танк! Танк!— кодкө шуйгаладорын нин горзіс.

Веськыда на вылө, сідзжө траншея кузяланогыс, локтіс «Тигр».

«Ставыс. Эштіс»,— сөмын и кужис мөвпыштны Жданов. Кодкө йөткыштіс сійөс окоп пыдөсө. Ныр-вомсө тыртіс порок тшына да бензин-маслө дука уль му. Кыскис восөдны. И сэки муыс бара вөрзыліс.

— Парторг, тэ ловъя?!— быттё му пыдөссяньыс, горөдіс кодкө. Сэсся Ждановөс нетшыштісны пельпомөдыс. Одва и мездысис му увсьыс. Дзик неылын, налы мышкөн, сотчис танк. И водз-выланыс, и мышканыс тыдалісны котөртись йөз.

— Танкысь эз повзыны, а йөзсьыс повзисны, гадъя!— Аввакумовлөн вомыс быттё эз вөр, пинь пырыс сёрнитіс.

Парторг гөгөрвоис, мый немеч куйлөма ю дорын, а кор танкъяс кутісны утужитны медводдза траншеяссө, уськөдчис атакаө. Танкъясөн повзёдөм воддза эшелон, дзонь батальон, чепөсийс бөрлань. Тайөс казялөмөн вөрзис ставнас 350-өд полк. Быттё бушков пөлыштіс окопысь и Ждановөс да Аввакумовөс. Налысь пулемётсө таляліс танк, а медбөръя гранатаясөн Савва өнтай на өзтіс на вылө зырөдысь танклысь бензобаксө. Коли сөмын карабин. Парторглөн и сійө абу — полевөй сумкаын документъяс да пистолет, и ставыс. Котөртіс Жданов да аддзис, кыдзи полк пырис мөд траншеяө. А немеч лыйсис нин сэсянь, кытөн сөмын на сулалісны найө. Быдторйыс овлө война вылад. И водзлань мунөм, и бөрлань косөм төдө салдат. Но өні, йөз му вылын, татшөм позорыс, тыдалө, дойдіс эз өтнассө Ждановөс. И эз төд, мый вөчны. «Көні командиръяс? Мыйла чөв олөны? Кытөн комбат Смирнов? Кытчө вошис замполит Нестеров?» И сэки воис мөвп кыпөдны салдатъясөс аслыс, кыдзи коркө вөчис комиссар: «Коммунисты и комсомольцы, вперёд!» Немеч эз на удит чорыда пуксьыны эновтөм траншеясө. Чеччасны кө коммунистьяс, гашкө, бөр позяс вөтлыны. А чеччасны-ө? Коді сійө сэтшөмыс, мед кыпөдны салдатъясөс? Лейтенант, кодөс төдөны сөмын өти батальонын. Но Жданов став пытшкөснас гөгөрвоис, мый нөшта здук, и лоө сёр.

— Парторг,— зургис сэки бокас Савва Аввакумов.— Ме тэ бөрын чечча, давай... «Коммунисты, вперёд!»

Сөмын чеччисны, бергөдчыліс Саш, а полкса командир сувтөма жө нин, киас знамя кутө:

— Командиры! Бойцы! Отступать некуда! Вперёд, на первую траншею!

Эз на удит помавны, полк зырөдіс водзө. Траншея лои бөр босьтөма...

Но «батюшка Аввакум» оз нин во аслас Сибирө. Сійө колис Балатон ты дорө, мадьяр му вылө.

А Жданов со ловъя. Бара виччысьö атака. Гөгөрвоана, мый враг тайö пöрйö зырöдiс сöмын разведкаö моз, тöдмавны воча сулалысь вынсö. Сотчыны колис сöмын кык танк, но вөрöг «тöдмалiс», мый «Тигрлы» паныд 100 миллиметраа артиллерия абу. Öнi, дерт, зырöдас, мед пырны армия тылö... Но тайö и лоö немечлы виччысьтöмторйөн...

Парторгкöд боецъяс öнi сёрнитöны сьölöмсяннысджык: быдөн аддзылiс, кыдзи сийö тупкис пуляысь полкса командирöс, а сэсся киас знамяён котöртiс водзын. Полкса командир ранитчöма шуйга киас, но ловъя, кöсйысис награда выlö юöртны парторгöс. Но лои мöдарö — шедалiс замполитсянь, штрафной ротаö муртса эз мöдöд.

— Медаль ни орден тэныд оз ло! Партияысь вöтлыны колö! Партийной дисциплина дзуган! Слава коvmöма! Зырымбедь. Документъяс тэ ордын, на йылысь он мöвпав! — горзiс сийö.

Да, полевöй условиясын став партийной документыс парторглөн сьöрас. Веськалас кö враглы, и штрафной батальонөн он мын. Но öд ставыс помассис бура. Ждановöс весиг пуля эз вөрзьöд. Но учётной карточкаас гижисны выговор: «За нарушение партийной дисциплины».

«Сэсся и воют. Помассяс войнаыс, а ни öти медаль абу парторглөн морöсын. Он мöй дöзмы. Бурджык штрафнойын, весиг сэтись геройяс петöны... А танi... быттьö муош, пыр окопын да землянкаын».

Аввакумовöс Жданов дзедис торйөн, эз братской гүö. Гижис гортас письмö. Волас кö, дерт.

Ю сайын öзйис нель ракета: кык гөрд да кык еджыд — качисны пöшти öттшöтш мöдлапöвса сикт сайысь. И пыр жö муыс быттьö вөрзьыштiс да кутiс тiравны, а лөнъ ю веркöсыс серассис. Недыр мысти сиктладорсянь петiсны танкъяс: öти рад, мöд, коймöд, дасöд... прицепъяс, автомашинаяс. Чайтсис, помыс некөн абу налы.

Пыр гораммö и гораммö ургöм-юргöмыс. Жданов виччысис... Сылы талун стрöга шуисны: пырны тышö сöмын сэк, кор коvmас дорйыны сылы дöверитöм документъяс. Куим противотанкöвöй гранатаысь медбöръяыс бумагаяс бырöдöм выlö, и дерт, аслыс выlö. Жданов некор эз сёрнитыв аскöдыс, но öнi друг казялiс, мый гораа сёрнитö: «Гадъяс!.. Но мыйла нö оз лыйны?..»

И казялiс, мый сёрнитö вомсö осьтылтöг, кыдзи неважөн на Аввакумов.

Сьöд кымөр локтö и локтö, а миян оз лыйны. Кажитчö, сё метрыс эз нин коль медводдза танкъясöдз. Но сiдзи сöмын кажитчö. А со и миян гөрд ракета.

И мый сэки пансис! Гыпöдöны пушкаяс, таргöны пулемётъяс, автоматъяс, шутъялöны-лэбöны минаяс. Повзьöдчысь «Тигръясыд» — öтилөн башняыс бергöдчöма-чашнитчöма, мöдлөн розялöма кыз броня кымöсыс. Öти сотчö, мöд бергалö гусеница пöв вылас. Пехота ставнас водiс му выlö. Кытыськö уськöдчисны миян гырысь самолётъяс да бомбитiсны юсö, кытi век на вöлi вуджö враг, тшöтш и ю сайсö, кöнi пыр на локтiс «кымөрлөн» помыс.

Кор Жданов аслас батальонкöд овмöдчис тайö ю дорас, гөгөр лöзалiс рудзöг öзим — зарни нянь виччысисны йöзыс. Öзим

руалис-дöлалис гыөн-гыөн, веж тувсов быгйөн. Öнi гөгөр вöли сöмын няйт, сöмын путкыльтöм эжа да сьöд няйт.

И со тайö сьöд няйтыс кутiс исковтны бөрвыв. Немеч öдйö бöрынтьчис да сiдз жö öдйö вуджис юсö. А мян воисны ю до-рад, да вуджны нинöмөн — абу дасьтысьöмaсь. Кодлы мый веськалö — пöвтор, чальтор, понтоншой кольöма немечлөн... Код-кö шынелсьö нин пöрчöма да вартчöмөн уйö, сы бöрысь и мукöдыс сапöгьяссö чужъялöны коксыныс да вуджöны.

И сэки кутiсны мöдлапöвсяныыс пызйыны, немечладорсянь. Пулемётгьяс вöлöмaсь берег пöлöныс — би шерөн резöны быд вомысь. Но и тайö эз сувтöд ни пышйысьöс, ни вöтöдысьöс...

Парторгöс чукöстiсны улö. Телефон дорö, вöлöм, корöны.

— Лейтенант,— Жданов тöдiс батальонса командирлысь гөлöс-сö.— Кора примитны первой рота. Делöястö сдайт старшина Поповлы. Аддзысям бой бöрын...— гөлöсыс неуна мытшасьлис да содтiс:— Комиссар мекöд орчöн. Эн пов.

Командир эз вермы не тöдны, мый парторг сöмын замполит подчинениеын. Но мыйла эз сёрнит ачыс замполитыс?

Сикт кузя локтiс транспорт, вайисны ю вуджан көлуй. Пуле-мётчикьяслысь ротасö Жданов аддзис немеч траншеяысь нин. Со вуджисны мöдö, коймöдö...

Пурт да пистолет... Велöдчигөн вöли бур, розьöдан и лыян пилипызь тыра мешöктö, сийö тэнö оз ви. А танi... Александр Жданов эз кад коллялöм могысь уджав Осоавиахимын. Быттьö ставыс, мыйö велöдлiс коркö том йöзöс, öнi öтпырысьөн ловзис вежöрас. Немечыд öд абу пилипызь мешöк, сылы овны жö окота. Со ыджыд тушаа немеч, штыка винтовкаөн сы вылö ырыштчö. Көть и лыян, сийö удитас на бытшкыны тэнö, а гашкö, и пезьдöдö нин куроксö... Веськыд кийн пурт, колö пöръявны, быттьö увсянь көсьян кучкыны, а веськыдыввлань сетчыштöмөн колö удитны вешйыны пуляысь да вывсянь кучкыны винтовка стволас. Немеч-лөн штыкыс пырас муö... Öнi сöмын содты пистолетысь... Та-а-адз! А со мöд нин зырöдö...

Кор гөгөр лөнис, Жданов видзöдлiс часi вылас: вöли стöч 12 час. Енэжын югъялис шондi. Буретш тадзи жö сулалiсны стрел-каясыс тöрыт, кор мöдлапöвсянь мöдöдчисны танкъяс. Эз-ö сувт-ны? Трофей часi мунiс-точкис. «Сiдзкö, тыш нюжалiс вой да лун, лун шöрсянь лун шöрöдз. Тöрыт вöли март, талун нин апрель. И ме пыр на ловъя. Плешкын ёнтö, кийö вирöсь, кок пöлам мый-лакö сапöгöй абу... А, тайö кор сывйөн вермасыны кутчысим. Абу и ыджыд тушаа, а винёв, велöдчöм, тыдалö. Мынтöдчи, а сi-йö кок пöлам кутчысис. Чужйыны ковмис, көмкöд öтлаын торъялис».

— Лейтенант ёрт, рота сулалö стройын!— юөртiс старшина Курочкин, Эжва йывса сюсь зон.

— Аттьö, старшина. Рота, за мной, шагом марш...

Жданов эз лысьт видзöдлыны ротаысь кольöм кызь морт вылö. Но воöма коймöд Украинскöй армияөн командуйтысь Толбухин. Кодi вермö сулавны кок йылын — пыр жö стройö. Ачыс коман-дующöй пö көсйö видзöдлыны геройяс вылö.

Сулалö батальон. Джынйыс, тöрыгтя серти. Унджыкыс көмтöг, гимнастёрка кежысь, кодкö весиг улыс гач кежысь. Шапкаяс — сöмын некымынлөн. Тöвся обмундирование на эськö быдöнлөн вöли, но ю вуджигөн ставсö шыблалöмaсь. Сöмын оружие быд

киын. Кияс, чужомъяс, киссьом дөрөм-гач — ставыс вир. Быттьо
ош начканінысь петөмаось.

Толбухин батальондз эз лок. Воисны корпусса да дивизияса
командиръяс, генерал-майор Погодин да полковник Иванов.

Муноны война помалысь командиръяс строй пөлөн и оз тодны,
мый шуны...

* * *

«Менө корисны штабё. Замполит Нестеровос пö госпитальö
нуöмаось. Эм приказ: вежлавны ставлысь, кодлөн котасис, пар-
тийнöй да комсомольскöй билетъяс. Ми и босьтчим тайö уджас
Козловкöд. 600 билет ковмис вежны. Да нöшта выль йöз шыöд-
чисны партияö пырны. Сöмын на уджкöрталім, полкса командир
батальонö воис да юöртіс, «Краснöй Звезда» орденөн пö менö
наградитöмаось. Мися, сетас. Эз сет. Сöмын юалис:

— А мыйла тэ бара штабын? Ме öд тэнö ротаөн командуйтны
тшöктылі, лейтенант Жданов. Оз кажитчы?

— Менö сöмын тыш кезлö мöдöдлінныд, полковник ёрт, кыз
коммунистös.

— Аски и тышыс оз нин ло?— нюмуніс полковник.— Ком-
мунистьяс оз ковны? Тэ кöть и парторг, лейтенант, а омöля гö-
гөрвоан, коді сійö коммунистыс. Миян колöны повтöм коман-
диръяс, кужысь командиръяс, лейтенант. Эн вунöд.

...Сідз эз и лэдзны менö сэсся командуйтны ротаөн. Сэтшöма
кösйи, но политуправление эз лэдз. Апрель 13 лунö ми босьтім
Вена кар, Австриялысь столица. Первой ротаса выль командир
Назаренко лоис Сöветскöй Союзса Геройөн... А меным сідзи эз
и во «Краснöй Звезда» орденыд, мыйөн наградитöмаось вöлі вод-
дза тышгъясысь на.

— Оз ков орден йылысь мöвпавны,— шуис кызкö выль зам-
полит,— а йöз йылысь, салдат йылысь. Накöд колö уджавны...
Быдлаö он тырмы.

Он и тырмы. Йöзыс воюйтöны, тэ лун и вой на дорын жö, но
мöд ног воюйтысь. Тэ öд век мыйöнкö мыжа: «Почему, тов. Жда-
нов, плохо работаете? Почему боевой листок не выпущен? поче-
му этот к награде не представлен? Почему не оформлен доку-
мент?..» Сы мында «почему»? Абу жаль и наградаыд. Сы вылö
тэ и партийнöй работник. Вит лунөн колö вöчны ставсö, мед
примитны партияö. Видлы эн примит, эн оформит документъяс...

Йöзыс кö эз тöдны, мый вöсна воюйтісны, кодкöд воюйтісны,
кызди да кытөн öні мунö тышыс... Эз кö вöвны бур агитаторъяс,
Коммунистическöй партианым эз кö вöв, победаöдз эськö эг и во-
й... Ме таdzi чайта...»

Александр Кириллович Ждановлөн военнöй службаыс дыркодь
на эз помась и Победа лун бöрын. Фронт вылысь эськö и лэдзис-
ны, но ыстісны Политуправлениеö. А сэнi веськыда шуисны: ку-
тан служитны дас вит во. И ыстісны резервö. Нэмтö военнöй
мортөн лоны — та йылысь öмöй мöвпавліс коркö Жданов Саш?
Дас лун олö Москваын, кызь лун... И друг демобилизуйтісны сі-
йös, мыніс военнöй службаысь!

Вөлöгдаын ныр на ныр люкаси Размановкöд. Тököтьö оз нöйт-
ны öта-мöднысö радысла, кучкалöны и кучкалöны мышканыс да

пельпоманыс: «Кытысь тэ усин?» Разманов кӧстыля, ки пӧлыс ӧшалӧ морӧс вылас сьӧд чышгян йылын. Ёна дойдӧма мортсӧ неылӧ усьӧм снаряд: коктӧм и китӧм.

Жданов перйис коньяк доз.

— Да тайӧ жӧ...— оз эскы Александр Михайлович.

— Да, стӧч сійӧ, тэнад сулеяыд. Эг ю сэки, сы вӧсна и ловъя коли,— сералӧ Жданов Саш.

И дыр казтылісны, кызди ылі Венгрияын, ыджыд тыш водзвылын, лӧгасьлісны.

— А менӧ Аняыд сэки ой-ой кызди видіс, эг висьтав да, мый муна тэ дорӧ. Сёрнитны оз вӧлі кӧсйы.

— Пӧсь ни кӧдзыд меным,— кӧсйис сьӧлӧмсӧ бурӧдны Жданов, но эз вермы.— А тэ сійӧс збыль аддзылін?

— Разведчик сійӧ вӧлі, разведчик... Вӧрӧг тылӧ ветліс.

— Вӧлі? Сідзкӧ, гортас нин?

— Эз во... Ӧти задание вылысь эз во... Пӧлинӧ! Со, письмӧ тэныд. Шуис — ветлан мӧдысь, сетан. Да со тай кызди артмис...

Жданов Сашлӧн киясыс тіралісны ичӧтик треугольник-письмӧ восьтігӧн. «...Дона Сашук! Парма вад сингясӧй менам, тӧд, ме радейта тэнӧ... Радейта!!! Тэнад Анюта».

— Аня весиг гортсаыскӧд эз письмӧась. Шоча воывліс штабӧ. Оліс йӧз ним-вичӧн, быд лун разнӧй паськӧмӧн... Оліс торъя условиеясын... Гӧгӧрво тэ.

Жданов Саш нинӧм эз куж шуны. Кисьтіс кружкаысӧ коньяк-сӧ, кодӧс та дыра новлӧдліс мешӧкас, тотшнитчисны, юисны. «На вӧсна, кодгяс эз воны»,— думнас шуаліс Александр Кириллович.

Кызди мунлісны ӧтлаын, сідз ӧтлаын и воисны сэсся гортаныс. Шудаӧсь, мый ловйӧн колисны...

Позис эськӧ тадзи и помавны батальонса парторг да сылӧн ёрт йылысь висьтсӧ, мый водзӧ олісны-вылісны, шудаа да гажаа. Но помыс абу тадзи. Разманов эз бурд. Сылӧн том гӧтырыс, мича Дарьюшыс, омӧля казтылӧма фронтовикӧс война кад чӧжыс. Ӧтик уполномоченнӧйӧс коркӧ узьтӧдӧма аскӧдыс, абутӧм верӧсыс пыдди. А сэсся вайӧдӧма тайӧ уполномоченнӧйыд том аньӧс райцентрӧ, мед матынджык вӧлі воыны. Кажитчӧма сылы мича Дарьюшыд. Воис жебиник верӧсыс фронт вылысь да кӧть и дінас лоис, Дарьюш и водзӧ кутіс вошласьны войяс кежлӧ. Челядь ни бокиянь, ни асланыс гозгялӧн эз ло. Торйӧдчыны мыйлакӧ эз жӧ торйӧдчыны дай. Сідз и олісны. А ӧти асылӧ Дарья воас гортас да весьӧпӧрлас: верӧсыс ӧшӧдчӧма крӧвать юрас домалӧм вӧсны-дик гез помӧ...

А Жданов аддзисис мӧд Анякӧд. Быдтісны пиӧс дай кык нылӧс. Гортас воӧм бӧрын сійӧс босьтісны партийнӧй удж вылӧ, а сэсянь индісны веськӧдлыны вузасян организацияӧн, кытӧн и уджаліс пенсия вылӧ петтӧдзис. Дыркодь на и пенсия вылас оліс. Кыйсиг-вӧраліг падвежасьлісны миян туйяс тшӧкыда. Но мыйлакӧ некор эз висьтасьлы. Редакцияӧ пыравтӧдзис...

Со и абу нин Александр Кириллович.

...Ӧтчыд юӧртасны, пырав пӧ военкоматӧ. Мунас, а сэнӧ «Краснӧй Звезда» орден сетасны. Дыр пӧ корсьысьӧма тэнӧ наградаыд, шуас военком. Балатон дорын тышгясыяныс на...

Воас гортас Александр Кириллович, Аня гөтырсö сывъялö да окалö: со пö, видзöд... висътавлі öд тай... И друг съöкыд лоö, съöлöмыс морöсас оз кут тöрны. Врачыас нинöм нин абу вермöмаöсь вöчны.

Тадз и бырöны миян ветеранъяс. И ми огö нин кылöй ловъя кыв унасянь, коді дорйис Москва, Ленинград, Сталинград, бось-тіс Прага, Будапешт, Берлин... Кывзыны эськö колö унджыкöс, коді колис на, гижны, да мед гижöдъясыс эз вошны уна бумага пöвстö. Дерт, бурджык ас овъясөн. Но редакцияö воысь тайöс эз тшöкты: абу мöй пö öткодь коді, мед пö сöмын тöдісны сідз, кыдзи збыль вылас вöлі-а.

Со и гижи, кыдзи да мый висъталіс Жданов Саш. Александр Кириллович. Удораса удал зон...



Орден-медалясыс «эз сотчыны»

1945 вося апрель помын Удораё, Путшкымдін сиктса колхознича Екатерина Дмитриевна Калинина ним вылө, фронт вывсянь воис письмө. Полевый пошта 51089 номера войсковой частьюсь командир, подполковник Тарасов юөртө:

«Ваш сын, Калинин Алексей Данилович, за образцовое выполнение боевых заданий командования на фронте борьбы с немецко-фашистскими захватчиками и проявленные при этом доблесть и мужество награжден орденом Красного Знамени. Основание: приказ войскам армии № 0110 от 27.03.1945 г.»

Екатерина Дмитриевна, повтөм воинлөн мамыс, да Раиса Алексеевна, гөтырыс, медся ёна радлісны сыыс, мый Алексейныс дзоньвидза да регыд воас гортас. Но аддзисысны сөмын 1946 вося гождөмын.

Земляклөн фронтөвой туйяс да наградаяс йылыс меным уна висьтавліс КПСС Удора райкомса секретарь Н.В.Немчинов. Вель кузь кад кольөм бөрын гижи герой-фронтовику аддзисьлөм йылыс сөрнитчана письмө. Воча юөрын Алексей Данилович зэв шогпырыс юөртіс:

«Путшкымдін сиктын вөлі зэв ыджыд пөжар. Сотчис жар гождөмын уна керка, тшөтш и миян. Казьтылөмтьясөй нөшта на содтасны сьөлөм дой. Аддзисьлөмлы ме, дерт, абу паныд, но петкөдлыны тиянлы немтор: весиг орден-медаляс сотчисны биын...»

Татшөм курыд юөрсыс шөгөдіс и менө. Коліс мортыслы отсыштны. А.Д.Калининлөн «Личной делөыс» военкоматса документъяс серти лөсьөдім да мөдөдім Оборона министерствоөй письмө. Коли мыйтакө кад, и Москвасянь мөдөдомәсь вөвлөм офицер-фронтовику вель орденъяс да медальяс. Победа лунө Удора районса военком уна йөз водзын өшліс А.Д.Калинин морөсө наградасө, а на дінө нөшта на содіс и Красной Знамя орден*, мыйөн пасйылөмны взводса повтөм командирөс 1945 воын март 27 лунся Указөн, но наградаыс ас кадө абу аддзөма мортсө.

Биын сотчөм наградаяс местаө вель орден-медаль воөм бөрын Алексей Даниловичкөд аддзисьлөмным лои кыпыдөн. Вөвлөм фронтовик вель кузя, вөвлөмторъяс стөчмөдөмөн, висьтасис война кад йывсьыс.

Алексей Калининөс служба вылас босьтөмны дас өкмыс арөсөн, 1940 вося октябрын. Удораса призывникъяс веськалөмны Мурманск обласьтса Кильдин ді вылө. Мирной кадся служба дырйиыс, көкъямыс төлыс чөжнас, том салдатъяс унаторийө велалісны.

1941 вося июнь 22 лунө, водз асылын, фашистъяслөн авиация бомбитіс Мурманск. Тайө чассяныыс и пансис страна войвылын

* Указ пасйөдсө сетөма улынджык.

война. «Норвегия» группировка армияс став вынсö веськöдисны Кольской нырд вылö, мед босьтны Мурманск.

Война öзйöмсянь мöд вежон заводитчигас 325 номера стрелковöй полк, кöнi служитiс Алексей Калинин, пуксис корабльяс вылö да би улын фронт визьсö вуджöм бöрын чеччис враг тылö. Десант водзö вöли сувтöдöма мог, мед Мурмансклань зырысь фашистьяслы эз вермы вони содтöд вын. Тайö медводдза чорыд косясас ефрейтор Калининлөн отделениесь салдатъяс петкöдлисны ыджыд повтöмлун: враглөн би улын эз бöрынтьчыны ни öти оськов, некод эз эновт дорйысян рубежсö. Алексей Калинин тайö медводдза косяс ранитчис. Нуисны Полярнöй карса госпитальö. Бурдöм бöрас аслас частьö веськалис. Сылы сетисны сержант чин да индисны взводса командирөн. Тайö жö кадас сийöс лои партияса шленö кандидатөн, а недыр мысти мöдöдисны Беломорск карö, офицеръясöс дасьтан курсъяс вылö. Велöдчöмсö помалöм бöрын Калининöс колисны школаас. Ачыс кутiс велöдны курсантъясöс.



Алексей Калинин.

1944 вося арын пансис Петсамо-Киркенесскöй операция. Могыс — весавны врагысь Карел му. Гитлеровецъяс эз жалитны некутшöм вын, мед сöмын кутны ас кианыс кынмывлытöм Баренцев саридз, Петсамо кар бердысь никель да ыргөн рудникъяс, бронза сывдан завод.

«1944 вося октябрь 7 лунö,— казъывлис Алексей Калинин,— 14 армиялөн частьяс, кытчö пырис и миян гвардейскöй стрелковöй полк, петiс наступлениеö. Миян водзын посныидик гежöд пожöмъяса зыбуч нюр. Сы сайын — мыльк вылö куим визьөн кодйысьöм, уна лыда ДОТ-ясö дзевсьöм враг. Кöдзыд, кизьөр няйтö коскöдз вöйласигтыр миян рота медводзын вуджис нюрсö. Автомат да пулемёт би улын кодйысим кыркötш подулас. Фашистьяс некымынысь кыпöдчылисны атакаö, мед бөр зырны миянöс нюрас да гежöд вöра осьсаинас бырöдны. Но миян пиысь некод эз бöрынтьчы, атакаяссö кусöдлим öтувъя водзсаян биөн. Кутчысим, кытчöдз эз вуджны миян дорö дивизияса главнöй вынъяс, а сэсся асьным кыпöдчим атакаö, орöдiм фашистьяслысь куим визя дорйысян рубеж да октябрь 15 лунö штурмөн босьтiм Петсамо (Печенга) кар.

Во гөгөр кынмывтöм ыджыд морскöй порт босьтöм бöрын, миян водзын воссис Норвегиялань ва туй. Регыд командованиесянь воис приказ: «Врагысь гусьөн, виччысьтöг матыстчыны Норвегияса Киркенес дорö да штурмөн босьтны карсö».

Приказ, дерт, быть ковмылис пöртны олöмö, но виччысьтöг уськöдчöм некыдз эз вермы артмыны. Киркенес кар сулалiс зэв визув, гöраясянь визувтись вель паськыд Патси—Иока ю сайын. Вуджны сийöс ковмас враглөн би улын, и медводз — миян полклы.

Разөдчим берег пасьтаыс, чукөртім пурьяс вылө мый позис: керьяс, пөвьяс, тыртөм бөчкаяс — ставсө, мый өшйө ва вылас. Менам пурйөй артмис медся ыджыд, крепыд да надёжнөй. Ёд армияөдз и вөр лэдзлі, и пурьясьлі — төді төлксө. Полкса командир Поваренков, медым ышөдны салдатьясөс, сетіс меным знамя да автоматчикьяскөд медводз тшөктіс петны ва вылө.

«Лейтенант Калинин, паськөд знамятө, мед ставөн аддзөны!» — горөдіс полкса командир, кор неуна ылыстчыштім берегысь.

Фашистьяс аддзисны жө гөрд дөратө да ёнджыкасө миян пурлань и веськөдісны бисө, шөтісны и минаяс. Но юсө ми вуджим, кодыисим берегас, воча лыйсям патроньяс жалиттөг, мед сетны позянлун вуджны полклы и дивизияса мукөд подразделениеяслы тшөтш. Асланым берегсянь миянлы отсасьоны пушкаяс, миномөтьяс, винтовкаысь лыйлөны, мед фашистьяслы весиг кыпөдчыны эз позь. Отарсянь и мөдарсянь — биа бушков кыптис. Норвегияса Киркенес порт миян войска мездіс фашистьясысь 1944 вося октябрь 25 лунө.

Кор мөдар берегсө лои дзикөдз весалөма врагысь, полкса командир матыстчис ме дінө, топыда кутліс киөс да шуис:

«Лейтенант Калинин, ті заслужитінныд Геройлысь Звезда!»

Но ми өд эг орденьяс да медальяс вөсна воюйтөй, а мездім фашистьясысь чужан му да тшөтш и мукөд войтырлысь муяссө. А война помыс эз на тыдав. Война помассьөм бөрын уна во мысти видлалі военкоматысь война кадся личнөй делөос и аддзи татшөм гижөда награднөй лист:

«Гвардии лейтенант командир взвода 1-й стрелковой роты 326 гвардейского стрелкового полка Калинин Алексей Данилович 13.12.1944 г. в боях за освобождение г. Петсамо взводом успешно отбил четыре атаки противника и, форсировав на подручных средствах водный рубеж, в числе первых ворвался в город. В боях на подступах к г. Киркенесу в решающий период боя сделал из подручных средств плот и под ураганным огнём с развёрнутым знаменем полка первым форсировал водную преграду. Своим самоотверженным подвигом воодушевил весь личный состав полка на форсирование реки».

Документ сертиыс тайө подвигсьыс А.Д.Калининөс представитөмаөсь Краснөй Знамя орден вылө. Указыс петөма 1945 вося март 27 лунө.

Европа войвылын война помассис, а врагөс помөдз жугөдтөдз ковмас на кисьтны помтөм уна вир. 326 номера гвардейскөй стрелковөй полк вуджөдісны Мурманскө, а сөсся, мед шойччөдыштны да вынсьөдны йөзөн, вооружениеөн, петкөдісны Рыбинскө.

Тылын недыр кад олыштөм бөрын көрт туйөн мөдөдісны Белоруссияө. Гродно карын сійөс йитісны мөд Белорусскөй фронтса 19 армиялөн мөдөд ударнөй бригадаө.

Враг бөрыньтчис рытывывывлань, и кымын матысмис пеж позланьыс, сымын ярджыка, дзескыд тшельө топөдөм көин моз, водзсасис.

«1945 вося мартын воөдчим Асыывыв Пруссияө,— водзө казътылө Алексей Данилович.— Автоматчикьяслысь взвод сувтөдісны полк нырө. Меным сетісны компас да топографическөй карта, тшөктісны петны көрт туй станция дорө да босьтны сійөс. Вөра

местаясод мунім водз асывсянь сёр рытөдз, шойччыштны пуксьывтөг. Станция дорас петкөді стөча, но веськалім автомат би улө. Куим боец усины. Ковмис бөрыньтчыны. Гөгөрвоим: ыджыд воштөмъястөг, веськыда уськөдчөмөн, станциясө босьтны он вермы. Полкса командир Поваренков менам взводлы тшөктіс кытшовтны станциясө да уськөдчыны враг вылө тшөтш и мышсяньыс. Кытшө веськалөм врагөс бырөдім штурмөн. Көрт туй станция, этша йөз воштөмөн, сійө жө луннас лои босьтөма».

Гдыня кар дорын завод босьтігөн, чорыд косьын, сьөкыда ранитчис ротаса командир. Командованиесө ас вылас босьтіс лейтенант Калинин да ачыс медводдзаён кыпөдчис окопсьыс. Сы бөрысь кыпөдчис рота да сувтлытөг и босьтісны немечьясөн ыджыд вынөн доръян завод. А.Д.Калинин сьөкыда ранитчис, но командованиелысь приказ лои пөртөма олөмө. Тайө подвигсьыс сійөс наградитісны Отечественной война II степения орденөн. Ранитчөм командирөс мөдөдісны Бромберг карса госпитальө, а сылөн боецьяс зырисны врагөс рытыввылө, воисны Бисмарк карө (тайө немеч му вылын нин). Сэтчө жө, бөр аслас частяс, бурдөдчөм бөрас веськаліс и Алексей Калинин. Тані и паныдалісны да пасйисны Ыджыд Победа.

«Регыд лэдзасны гортө!» — нимкодясисны и командир, и боецьяс.

Но... 1945 вося июнь 10 лунө мөдөд Белорусскөй фронт расформируйтісны, управлениеыслы сетісны «Войскаяслөн Войвыв группа» выль ним. Офицер Калининлы водзө на ковмис служитны. Демобилизуйтісны Алексей Калининөс 1946 вося июнь төлысьын.

Гортас воөм бөрын Алексей Калинин уджаліс Пучкома сиктсөветын председательөн, а сэсся КПСС Коми обком бердысь курсьяс помалөм бөрын индісны Удораса МТС-ө директорөс вежысьөн. 1954 воын Алексей Даниловичөс мөдөдөны асланыс жө районса Выльгорт грездө кыпөдны кольччысь колхоз. Овмөснас юрнуөдіс көкъямыс во. Сэтчөс олысьясыс и өні на бурөн казтылөны председателынысө.

Алексей Данилович эз өтдортчыв сиктса общественно-политическөй уджысь, унаысь бөрылысны сійөс Удора райсөветса депутатөн. Вөлі и Коми АССР Верховнөй Сөветса депутатөн. Водзмөстчысь мортөс унаысь пасйылісны Почёт грамотаясөн.

Алексей Данилович да Раиса Алексеевна (олө Эжваын) быдтісны да велөдісны нель ныла-пияөс. Эмилия нылыс велөдө роч кыв да литература Эжваса 27 номера школаын. Лиза да Нина нывьясыс помавлісны Сыктывкарса медучилище. Лизаыс уджалө Помөсдінса больничаян, Нинаыс — Вөлөгдаын. Юрий пиыс олөуджалө Эжваын.

Алексей Даниловичлы эз мойви овны Великөй Победалөн 60 вося юбилейөдз, кувсьыліс 2000 воын. Но путшкымдінсаяс, гырысь и челядь, сійөс быть казтыштасны Победа лунө. Повтөм офицер Калининлөн Эмилия нылыс дасьтіс сиктса фронтовикьясөс казтылан фотоальбом да козьналіс сійөс чужан сиктса школаыслы.



Александр Иванович Щанов, пехота ротаса вöвлöм командир, дорйис Ленинград. Фронтвыкса подвигъясъс сійöс пасйöма Отечественной война I да II степеня, Красной Звезда орденъясöн да уна медальöн.

Александр ЩАНОВ

«Эг наградаяс вöсна...»

Война öзъян वोся арнас Емва вывса Катыдпом грездысь фронт вылö босьтисны арлыд сертиыс туяна медбörъя мужичöйсö — «Культура» колхозысь председательсö, и райисполкомса уполномоченной вайöдiс колхозö выль мортöс. Чукöртисны собрание, мед тöдмöдны йöзсö выль председателькöд. Но грездса нывбабаяс öтдортисны бокöвöй морттö:

«Агния Ивановна Старцеваöс бörъям... Ас пöвстысь. Верöсыс вöли пыдди пуктанаöн, фронт вылö босьтисны. Агния зэв уджач нывбаба, эскам сылы».

Старцеваöс и бөрйисны. Выль председатель видз-му удж бура тöдысь пöлькöд пырысьтöм-пыр кытшовтiс колхоз угодыöяс, лöсьöдiс локтан тулыс кешлö гöра-кöдза план. Медся водзмöстчысь анъясöс вöзйис бөрйыны правлениеö да кывкутана уджъяс вылö.

Зэв кывкутана удж ас вылас босьтiс шöр Россияысь комынöд воясö кулакалöм да Емва йылö мöдöдöм крестьянин Степан Васильевич Жуков. Уджалис мельникöн, но сяммылiс и вартан да тöлöдчан машинаяс дзоньтавны. Сійö жö и кузнеч.

Торъя кывкöртöд колхоз правление вылын вöчисны удж дисциплина кыпöдöм йылысь. Председатель ачыс некор эз сёрмывлы удж вылас и йöзыслы эз лэдз. Кöзйикалöн кö эз ваймыв пачыс, кусöдлiс ваöн, но му-видз вылö воывлiс некодысь кольччытöг, быдöнкöд öттшöтш.

Война пыр чорзис. Рытыввыв няня муяс немеч улын, а фронтлы ковмылiс пыр ыджыдджык отсöг и сёянöн, и кöм-паськöмöн. Ёна содiсны нянь, картофель, яй, йöв, вурун, кучик, шабдi поставкаяс. Видзöны семьяяс скöтöс либö оз, но быд аспом овмöслы быть колö вöли сдайтны государстволы нелямын килограмм яй. Скöттöм йöзыслы да уна челядя семьяяслы быд пöрийö отсавлiс колхоз: мынтiс на пыдди яй поставка.

Сьöкыда тырлiс вөр лэдзан план. А сійö вöли зэв ыджыд. Пöрöдчыны-кыскасьны медсясö мöдöдлiсны 15—16 арöса нывъясöс, кодъяс эз велöдчыны школаын, да челядьтöм либö öти-кык челядя нывбабаясöс, эм кö поснияссö гортас чередитысь пöч-пöль. Керсö кыскавны вöвъяссö колхоз жö мöдöдлiс. Катыдпом грездса том йöз пöвстысь быд тöv пöрöдчыны мöдöдлiсны Вера Щановаöс, Ольга Ключеваöс, Антонина Ключеваöс да уна мукöд нылöс. Страдна кадö найö жö вöлины медбур гöрысьясöн, ытш-кысьясöн, вундысьясöн.

«Культура» колхозлöн унджык видзьясыс Емва йылын, грезд-

сянныс уна дас верст сайын, и изъя-
коськъяса ю вывтї пуръясөн турун
кылөдөмыс уна төжд вайліс. Мед-
сясө өд нывбабаяс да челядь и
кылөдлісны турунсө — уджыс юр
пудъялөм кодъ.

Колхозса председательлөн, ов-
мөссыс кындзи, уна мукөд пөлөс
төжд на вөлі: школа, детсад колө
дзоньтавы, пескөн могмөдны. Ве-
сиг заёмъяс вылө гижөдалігөн Аг-
ния Ивановналы колө вөлі пример
петкөдлыны сьомөн и водзмөст-
чөмөн.

Отувъя овмөсөн веськөдлыс
Агния Старцева сямсө босьтис йөз-
көд отув му-видз вылын уджалігас
да сэк жө велөдчис лоны топыдөн,
идөраөн, кыв вылас зумыдөн, делө
вылас стрөгөн. Война кадө колхозъ-
яслөн тракторъяс эз вөвны. Став техникасө району вөлі чукөр-
төма МТС-ө. Сэтысянь и мөдөдлісны тракторъяссө гөрны да варт-
ны. МТС-лы колхоз мынтысьліс таысь няньөн. Урожайсьыс вель
ыджыд юкөн ковмыліс сетны. Но бокөвөй трактористлы коліс сө-
мын гектар лыд. Му вылас колявлісны телезнаяс, му помъясас,
пельөсьясас гөрыс эз и сибавлы. Татшөм уджыс ёна дөзмөдліс
Агния Ивановнаөс. Төвнас на нуөдіс правление, а сэссия чукөртліс
отувъя собрание да ачыс жө и панліс лэчыд сёрнисө:

«Ньылөм сорөн быдтам нянь, а МТС пайкө миянөс. Медбур
муяссө кызди сюрө парсалас тракторыс, телезнаяс коялас. План
сылөн тырөма, а миян муяс изгармөны. Убытка выв вайөдө ми-
янөс МТС, а таысь ми мынтысям няньөн. Асьным нө, бабаяс,
ог вермөй муяснымөс вөлөн гөрны? Вөлыд быд пельөсө сибавлө,
гөрөвтасыс — любө видзөдлыны, а тракторыд сөмын сөйсө лэптө».

«Асьным, ас вөвъясөн и кутам гөрны,— ошкисны председа-
тельсө колхозничаяс.— Вөвъяснымөс бур турунөн да зөрйөн вын-
сьөдыштам — гөрасны... А плуг воропыд миян кийсь и верөсьяс
дырйи эз усылы. Откажитчы, председатель, МТС отсөгсьыс».

Кокни шуны: откажитчы. Агния Ивановна вылө и сельсөвет-
сянь, и райисполкомсянь уськөдчисны:

«Гөра-көдза план кө индөм кад кежлө он тыртөй, ковмас кыв-
кутны военнөй кадся законъяс серти».

Личкис, дерт, и МТС. Өд «Культура» колхозыс уна дас пуд
быд ар босьтліс, а отсөгсө кө бөрынътасы, и нянныс налы сэтысь
оз вичмы.

«Вөвъясным тыртісны вөр петкөдан план. Көрым тырмө.
Шойччөдыштам дай муяс вылө петам, а тракторыд, кызди сюрө
муяс парсалыс да тшыкөдысьыд, миянлы оз ков»,— чорыда
кывкөрталіс председатель.

«Культура» колхоз ас кадө, некодысь кольччытөг, гөрис-кө-
дзис, быдтис бур урожай, да тшөтш и арнас вартны тракторсө
МТС-ыс эз корлы. Зарни кияса мельник Степан Жуков мельни-
ча көлесаас лөсьөдіс шкив, йитіс паськыд тасмаөн вартан машина



Агния Ивановна Старцева, Сергей выпусккөд
да Клавдия моньыскөд. 1972 во.

шкивкӧд, да трактортӧг, ва вынӧн и вартісны став урожайсӧ. МТС-лы эз ковмы мынтысьны да колхозничаяслы вичмис немын мешӧкӧн содтӧд нянь.

Фронт вылысь ме буретш тайӧ кадас инвалидӧн гортӧ вои. Госпитальясса хирургъяс уналаті вундалісны, вурлісны. Инвалид, но ӧд ловъя. Грездсаяс, дерт, виччысисны фронт вывсянь письмӧяс, но уна семьяӧ нин воліс и шог юӧр. 1943 вося августын, буретш нянь идралан кадӧ, курыд юӧрыс воис и Агния Ивановналы:

«...Ваш муж Иван Андреевич Старцев погиб смертью храбрых у Прохоровки на Курской дуге».

Татшӧм ыджыд шогсьыс нывбаба висьмытӧдз уси ловнас. Зинаида нылыс бӧрынджык казътывліс:

«Меным вӧлі сэки дас ӧти арӧс. Виталий вок меысь на ичӧтджык. Ёна полім мам кулӧмысь. Ичӧт чоя-вока колям пӧчкӧд да ковмас ёна тшыгъявны...»

Но Агния Ивановна веніс шогсӧ, висьӧмсӧ да нӧшта на зільджыка сюртчис колхоз уджӧ.

«Ставсӧ — фронтлы, ставсӧ — Победалы!» — Айму доръяна чукӧстӧмыс и председательлӧн, и колхозничаяслӧн лои быд лунъя медся ыджыд кӧсйӧмӧн да могӧн.

Менам мам, Анна Алексеевна, зэв нин пӧрысь вӧлі, но тулысын гӧрис и кӧдзис, гожӧмын отсаліс дасьтыны скӧтлы кӧрым, арын идраліс урожай. Гӧрбыля нин, мусӧ люкалӧ, а быд лун пӧтӧ ӧтувъя удж вылӧ.

1944 вося тулыс. «Культура» колхоз виччысис гӧра-кӧдза кад. Муяс вылӧ петкӧдӧма куйӧд. Удобрениеяс война кадӧ эз вайлыны, а куйӧдтӧм муыд оз чужты. Со и ковмыліс вӧвъясӧн петкӧдны куйӧдсӧ весиг медся ылі муяс вылӧ, медбӧръя доддьӧдзыс.

Лым сылӧм бӧрас колӧ вӧлі виччысьыштны муяс косьмӧмсӧ. Но виччысьтӧг воисны районысь уполномоченнойяс. Накӧд тшӧтш и ВКП(б) обкомысь координатор. Чукӧртісны колхозъясса председателысӧс. Дженъыд сёрни бӧрын — стрӧг индӧд: «Нюжмасьтӧг петны муяс вылӧ гӧрны! Кӧдзаясӧн эштӧдчыны май 20 лун кежлӧ!»

Председателыслы сеталісны гӧра-кӧдза графикъяс. Кодсюрӧ вӧліны паныд: «Муяс эз на косьмыны», — но найӧс уполномоченнойяс янӧдісны.

«Фронтлы колӧ нянь, а оз рапорт, — паныд сувтіс Агния Ивановна. — Кӧдзам шонавтӧм муас — урожайтӧг колям! Нӧшта кӧть вежон колӧ виччыштны...»

«Война кадӧ татшӧм сёрнияссьыс зэв чорыда мыждӧны», — дӧзмӧмӧн, скӧрысь орӧдіс Старцеваӧс карса координатор. — Гӧрны петны ковмас локтан лунсянь!»

Сельсӧветса председатель Иван Лазаревич Козлов, вежӧра мужик, сиктын чужлӧм морт, дерт, бура гӧгӧрвоис Агния Ивановнаӧс: кӧдзны оз на позь, но чӧв оліс. Сиктсӧветӧн веськӧдлысьӧс, сувтіс кӧ колхозъясса председателыс дор, збыльысь эськӧ кыскисны кывкутӧмӧ да судитісны на.

Май 20 лун помын Онежьеса нель колхоз юӧртіс Коми обкомӧ гӧра-кӧдза помалӧм йылысь. Нель председатель вӧчисны тшӧк-тӧмасӧ.

Гӧра-кӧдза индылӧм кад торкӧмысь Агния Ивановнаӧс чорыда

олёдісны. Но гөрны-көдзны пыр на эз позь. Муяс вылын көнсюрё ваыс вёлі гөпта на, и поводдяыс көдзыд.

Правлениеса членъяскөд сёрнитөм бёрын Агния Ивановна дзебсис.

«Юаласны кө, висьталёй, мый висьми, лэччи Княжпогост больничай. Мед сэтысь корсьёны. А менам индөдтөг муяс вылө мед эз вөв петөма... Шондодас — вежонөн став уджъяссө помалам».

«Культура» колхозса председатель «воши». Обкомса «координатор» топөдіс сельсоветса председательёс, мед пырысь-пыр жө корсясны Агния Старцеваёс.

«Княжпогост — абу грезд, кытысь сійёс корсян? — синсө мудера читкыралөмөн дорйысис Иван Козлов. — А сытөг, көть правлениесө ставнас арестуйтөй, гөрны-көдзны оз петны. Оласа нывбабаыс, овмөс вөжжисө зэлыд киясын кутө!»

Уполномоченнойяс эновтчисны сельсоветса председателысь: абу сійө «Культура» колхозса веськөдлысьыс. Могъясыс сылөн гырысьджыкөсь. Мунісны «Культура» колхоз правлениеё.

Кыптис видчана-грөзитчана сёрни. Бригадир Анна Попова петалис да вайөдіс отсөг вылө ыджыд опыта колхозник Григорий Щановёс. Уполномоченнойяс кутісны видны да янөдны тшөтш и пöрысь колхозникөс важ нога олөмысь. Но пöль, кыдз шуласны, төвйылөм пышкай:

«Пуксьылөй, дамочка, көдзыд ныйтас, а сэсся и вензьөй ме-көд, көкъямысдассө вуджөм пöлькөд. Пөдө көйдысыс көдзыд ныйтас! Мөдысь көдзны нинөмөн дай сёр нин лоө! Мыччыяс шондіыс — некутшөм индөд ог виччысьөй. Индөднас миян пыр на шондіыс вөлі».

И артмис дзик сідз, кыдз висьталіс пöль: петіс лун төв. Май 21, 22, 23 лунъясө шонді косьтіс мусө. Гөрөвтасын муыс онялө шоныдысла. Старцева пыр и «бурдіс», локтіс Княжпогостысь. Нель лунөн и помалісны гөра-көдзасө. Картопель да мукөд град выв пуктас шоньд муө жө веськаліс.

Ар. «Культура» колхоз район пасьятаас босьтіс медся ыджыд урожай. Государственной плансө вевтыртис. Тырмымөн локтан во кезлө дасьтісны сю, картопель да мукөд көйдыс. Колхозничаяс воддза вояс сертиыс няньсө унджык босьтісны трудовень вылас. Нöшта и мукөд колхозьяслы на вичмыштіс көйдыса отсөг, налы, кодьяс медводз эштөдісны гөра-көдза уджьяс, а няньыс чукөрмис этша.

1944 вося ноябрь 7 лунө, кыдзи и көсйысьліс председатель, «Культура» колхозын пасйисны «Урожай» лун. Сура, уна пöлөс сёяна татшөм праздниксө войнаөдз лөсьөдлісны быд арын. Война воясө тайө вөлі медводдза. Гөститчисны став грездыс — челядь, пöрысьяс, шөр арлыда колхозничаяс. Ыджыд урожайсө өд быдтісны дзик ставөн, отывив зільөмөн. Агния Ивановна аттьөалис видз-му вөдитысьясөс ыджыд урожайысь да пасйис:

«Вот помассяс война, овны кутам бурджыка, мөдам быдтыны ыджыд урожай да вузасьны сійөн райцентрын да тшөтш и Сык-тивкарын. Удждон вылө лоө унджык сьөм...»

1945 вося январын быд районысь медбур колхозса веськөдлысьсө корлісны Сыктивкарө. Вөлі сәні и «Культура» колхозысь председатель Агния Ивановна Старцева. Коми обкомса секретарь Тараненко Старцевалы козин (зарни часі) сетігас весиг чуймөма:

«Кыз нө артмө, мый районса колхозъяс пөвстысь медбур овмөсыс тайö ичөт мыгөра, видзөднысö нэриник аныслөн? А мукöдыс мыйла кольччöны?»

Колö чайтны, залас пукалис тшöтш и тувсов гөра-көдза öддзöдöм могысь Катыдпом грездö волысь аныс. Мый мөвпалис сийö тайö здукас?

...Да, вöли зэв сьöкыд, дзескыд олан кад, вöлины йöз, вöли помасьлытöм удж. Война кадö районса «Стахановец» газетын тшöкыда петавлісны Катыдпом грездса «Культура» колхоз да сэтчöс председатель Старцева йылысь ошкана юртöмъяс, статьяс да очеркъяс. Тöдісны водзын мунысь овмөс йылысь и «За новый Север» да «Вөрлэдзысь» республикаса газетъясысь корреспондентъяс. Агния Ивановна йылысь кывбур гижліс журналист могъясөн жö Онежьеö ветлывлысь поэт Серафим Попов.

Помассис война. Воис Победа йылысь нимкодь юöрыс и Онежьеö, а такöд тшöтш — бур олөм вылö лача да тшöтш и бурдытöм доя шоглун. Дас сизим мужичöй уины фронт вылын сöмын Катыдпом нейджыд грездысь. На лыдын: «Культура» колхозысь вöвлөм председатель Прокопий Семёнович Щанов; куим вок — Иван, Александр да Андрей Старцевъяс; кык вок, нималана вөр лэдзысь десятидесятничъяс Фёдор да Степан Щановъяс; кык вок, зонъяс на — Степан да Прокопий Щановъяс. Эз воны семья дінас вöвлөм нарсудья Андрей Александрович Щанов да колхозса вöвлөм председатель Александр Максимович Щанов. Уси Сталинград дорын нималана коми учёнöй — финно-угровед Георгий Афанасьевич Старцев. Усьöмаясöс «Казытылан Книгаын» ним-овыс — Шидьюсовъяслөн, Ключевъяслөн...

Дас квайт фронтовик воисны ёна доймалöмаөн.

Районса партийнöй да сöветскöй органъяс, Коми Республикаса юралысьяскөд сёрнитчөмөн, Победаö ыджыд пай пуктöмысь корисны пасйыны А.И.Старцеваöс медся ыджыд наградаөн — Ленин орденөн. Но 1945 вося тулысын Агния Ивановна, фронтовиклөн дөва, петіс верöс сайö сибиряк П.И.Никифоров сайö. Таöдз Пётр Иванович сизим во пукавлöма Воркутаын «политикаысь». Ичөт грамотаа рабочöй-кузнеч, вöвлөм гөрд партизан и ачыс эз тöд, мыйысь пуксьöдлісны. 1937 воас НКВД-лөн, буракö, «тшöтыс абу судзсьöма». Со и пуксьöдісны «гöгрöс» лыдö воöдчöм могысь рабочöйöс.

Наградной комиссия шуис: «Агния Старцева — народ враглөн гöтыр».

Таысь сійöс вöтлісны партияысь да эз пасйыны весиг «За доблестный труд в Великой Отечественной войне 1941—1945 гг.» медальөн, ог нин сёрнитöй Ленин орден йылысь!

Агния Ивановна дугöдчис колхозса председатель уджысь. Партияö мöдысь пырны сэсса эз жö кут, көть 50 воясö тайö корöмнасы ордö некымынысь воліс райкомса первой секретарь П.В.Фёдоров.

«Став сорсьылöмсö бөр лючки лöсьöдам, пырöй партияö». Но Агния Старцевалы, уна во кольöм бöрад, ставыс нин вöлі веськодь.

«Ставсö, мый вöлі вöчöма война воясö, ме вöчи сьöлөм тшöктöм серти, а эг ачымöс нимöдöм да наградаяс вöсна».

Кувсьытöдзыс некымын воөн водзджык (кувсис Сыктивкарын

1984 воӧ) Коми АССР Министръяс Сöветын сёрнитісны А.И.Старцевалы персональной пенсия йылысь. Коллегия вылас вайисны архивса материалъяс, важ газетъясысь статьяяс, очеркъяс. Но номенклатура чиновникъяс сувтісны паньд:

«А.И.Старцева эз уджавлы партийной да сöветской органъясын. А мукöд уджысь персональной пенсия оз сетсы».

«Но и мый?— дöзмöмпырысь чирьштіс лёкö вöйпысьясöс коллегияс председателялысь П.А.Безносов да чорыда содтіс:— Агния Ивановна эз зырт югыд да шоныд кабинетса улöс пыдöс, а вердіс и юкталіс мянöс война чöж, аслас уджөн матыстіс Победа!»

Стöча шуöма, татчö немтор содтыны.

Республикаса карта вылын абу нин Катыдпом грезд, көть сійö некымын сё во нимавліс уджач йöзöн, повтöм воинъясöн, сям вöралысьясöн да чери кыйысьясöн, быдтор вöчны кужысьясöн, колана войтырлы ылі туй индалысьясöн. Став сьöкыдлуныс прöйдитіс Емва йывса крестьяна вывті и кольöм нэмъясын, и Великой Отечественной война воясö. Киссис Катыдпом грезд сідзжö, кызди и мукöд сэтчöс сиктъяс да грездъяс. 50—70 воясö вермана йöзыс, медсясö томъяс, разöдчисны коді кытчö. И, дерт, олöмыслөн гугöн бергöдчöм вöсна ори вужйыс сикт-грездъясыслөн. Муяс эжсисны, видзяс тырисны ляк баддьöн, а сывтыръя пожöм керъясысь тшупöм стрöйбаясыс овтöгыд ропмунісны-сісьмисны, а мыйсюрö и пес вылö муніс.

Бöвлöм сэтчöс йöзыс, коркö кө волосны чужан местаясас, оз нин аддзыны грездсö, но местасö тöдасны. «Видзöны» сійöс куимнэль нэма кык пöрысь Ниа-Великан. Сулалöны Емвалөн кыркöтша крут берег вылын. Тöв ныр шыльöдö пуяслысь кудриа юръяссö. Пуяс лöня шувгöны-сьылöны важ олöм йывсьыс помасьлытöм сыланкыв либö казътылöны война дырйи «Культура» колхозöн юрнуöдысь нэриник, но вына нывбаба А.И.Старцеваöс, сылысь авъя пöдругаяссö — грездса колхозничаясöс. Помассис налөн олöмыс — кулі и грездыс. Лоис сійö некодлы ковтöмөн.



*Никон Кондратьевич Хатанзейскийлөн фронтөвöй туйясыс пан-
сисны Коймöд Белорусскöй фронт вылын. Бöрынджык тышкасис
Первой Прибалтийскöй, а сэсся — Первой Дальневосточнöй фронтъ-
яс вылын. Повтöм сержантöс пасйöма Слава III степеня, Отече-
ственной война I степеня орденъясөн, «За отвагу» да мукöд ме-
далясөн.*

Никон ХАТАНЗЕЙСКИЙ

Разведкаö көръясөн

Война воясас Карельскöй фронтса 14-öд армия чорыд косяяс нуöдiс Баренцево саридзбердса муяс вылын. Местаыс сэнi изъя, мылькъя-гöпта тундра, помтöм нюръяс да тыяс. Шондiыс гожöм-нас оз и сайöдчыв, төвнас — полярнöй вой. Оз сымда повзёöдлы көдзыдыс, мыйта чизыр вой төлыс. Турдöмысь мортöс вермас видзны сöмын малича либö пась. Турöб дырйи синтö ни вомтö он вермы восьтыны. Овлö, öти войö лымсö сы мында тэчас, мый машинаөн ни вöлөн некытчö он вермы мунны, а войнаöдз сэнi бур туйяс эз вöвлыны.

Нюръяса тундраын, төв көть гожöм, медбур транспортыс — көръяса додь. Көръяслы туйыс пыр восьса. Куим-нель көра да-дюлөн и ыджыд лым дырйи позё нуны 150—200 килограмм груз. Ранитчöм либö доймöм көр оз сет некутшöм шы: оз «вузав» ямщиксö враглы. Тайöс төд вылын кутöмөн, 1941 вося ноябрö 14-öд армияын вöли котыртöма көр транспорта куим батальон. Быд батальонын артавсис 800—900 көр да 130—150 боец, сэнi найöс шуисны каюръясөн. Көр видзсысьяссö (каюръяссö) да көръяссö вöли босьтöма Мурманск обласьтса овмöсьясысь.

Дерт, ыджыд армиялы көр транспорта куим батальоныд этша, мый вылö и тырмас. Содтöд көр транспорта батальонъяс котыр-тöм могысь көр видзсысьяссö да көръяссö вöли шуöма босьтны Кардор обласьтса Ненец национальнöй округыс да Коми АССР Изьва да Чилимдiн районъясса колхозъясысь.

1941 вося ноябрь 25 лунö ВКП(б) Изьва райкомлөн бюро вы-лын вынсьöдiсны индöд: дасьтыны Кардорса военнöй округлы көр упряжкаяс. Көр дадювъяса йöзöс армияö босьтöм да найöс Кардорлань нуöдöм могысь шуисны лöсьöдны көр транспорта кык отряд. Командиръяснас бюро вынсьöдiс Мокчойса МТС-ысь политотделса начальниклы отсасысь Василий Осипович Терентьев-öс да районса видз-му овмöс отделысь старшöй зоотехник Михаил Николаевич Ануфриевöс, политрукъяснас индiсны Няшабöжса судоверфысь техник Фёдор Фёдорович Терентьевöс да районса милиция отделысь начальникöс вежысь Иван Александрович Куз-нецовöс.

Бюро чукöртчылöмöдз некымын лунөн водзджык тундраö мö-дöдiсны уполномоченнöйясöс. На водзö вöли сувтöдöма мог: дже-ныйд кадөн бöрйыны вына ай көръясöс, медсясö сэтшöмъясöс,

кодъясöс велöдöма нин кыскавны груз тыра додъяс, йöза дадъяс. Уполномоченнойяс кывкутисны сідзжö и сы вöсна, медым көр видзан бригадайсь армияö босьтны колана мында пастукöс, а на местаö тундраö мөдöдны сиктясысь көр видзысьяслы выль отсасысьясöс. Сувтöдöм могъяссö медводз да тырвыйö олöмö пöртисны Сизябскысь «Трактор» да Бакурысь «Комсомолец» колхозъяс-са председателъяс Василий Александрович Артеев да Аким Никитич Вокуев, Кипиевоысь «Путь Ленина» колхозса председателъöс вежысь Василий Егорович Канев. Найö асьныс ветлісны көр бригадаясö отсасыны пастукъяслы. Дженъыд кадöн вöлі бöрйöма мөдöдны фронт вылö матö 2800 тундра пемöс.

Армияö босьтöм көр видзысьяслы Сизябск сиктын котыртлісны öкмыс лунся курсъяс. Новобранечьясöс велöдісны военкоматса, районной больницыса да ветеринарной станцияса специалистъяс. Изъваса промкомбинатын фронт вылö мунысьяслы брезентысь вурисны палаткаяс, дасьтисны узылан мешöкъяс, вöчалісны кысöн кышöм лямпаяс. Колхозъяс мунысьяслы дасьтисны тöвся шоныд паськöм: пыжик шапкаяс, тöбöкъяс, көр кысысь кузь гөленя унтыяс.

Сöмын 1941—1942 воясын Изъва район мөдöдіс Карельской фронт вылö 179 көр видзысьöс. На пыдди тундраö мунісны том нывбабаяс, олöма мужичöйяс, 13—14 арöса зонъяс.

1941 вося декабрын көр дадювъяса отрядъяс петісны туйö. Көр пастукъяскöд тшöтш фронт вылö мунісны Щельяюрса Затонысь речникъяс, Няшабöжса судоверфысь баржа стрöйтисьяс, Изъва сиктысь служащöйяс, уна овмöсысь колхозникъяс — 422 морт. Чилимдінсянь Кардорöдз көраяс мунісны важ, раскөн ёна нин тырöм тöвся туйöд. Сулалісны зэв көдзыд лунъяс. Суткинас дадюлаяс вуджлісны 60—80 километра вöлök. Сэні, көні эм көръяслы сёянін, лунйылісны. Кардорö отрядъяс матысмисны рöштво праздник лунъясö, вайöдісны матö 2700 көрöс. Вөр пöвстті мунігөн унакодь көр доймаліс, ковмис начкыны. Кык лунөн сёрнджык воис и Усть-Усинск районысь 310 морта, 1629 көра отряд.

Кардор бердын лöсьöдісны көр транспорта взводъяс, ротаяс, батальонъяс, быдын — урчитöм мында каюр да көр. Пастукъясöс (тані нин найö лоисны салдатъясöн) бара мыйкö дыра велöдыштисны... Январь помас көръясöс йөршиталісны вагонъясö, доддадъсö, мукöд эмбурсö сöвтисны платформаяс вылö. Кык сутки мысти көра батальонъяс воисны Карелия му вылö. Сэні найöс виччысисны дивизиясысь да бригадаясысь представителъяс.

Бакурысь С.М.Терентьевлөн казътылöмъясысь:

— 1941 во помланъыс миянöс, тундраса зооветучастокъясöн веськөдлысьясöс: А.Г.Артеевöс, М.Н.Артеевöс да менö, Изъва райвоенкомат мөдöдіс Кардорса военной округö. 1942 вося январь 7—10 лунъясö Кардор бердса вөръясö матыстчалісны көр транспорта отрядъяс. Куимнаннымöс индісны ветеринарной врачъясöн. 1943 воын некымын тöлысь ме öттшöтш вöлі и көр транспорт взвода командирён, и ветеринарной врачён. Боецъяскöд тшöтш тшöкыда ветлывлі и разведкаö.

Уна сьöкыдыс веськаліс вöвлöм көр пастукъяслы. Муртса пемдыштас — быд взводысь дас кымын дадюла веськөдчöны передной крайö, нуöны снаряжъяс, минаяс, сутшкасысь сутуга, кос паськöм, термосъясын пöсь сёян... Вайöдлісны сэтысь ранитчöм

либө усьом салдатъясөс, жугалом оружие, мукөдтор. Бөрсө батальон базаөдз быть колө вөлі воөдчыны югдытөдзыс на. Öд югдом бөрын паськыд эрдъяса тундраын пыр и лоан немеч лётчиклы кыянтөрийөн: аддзас выльөн на мунөм дадюлалысь туйсө, быть корсяс да лыйлас. Эрд вылад он дзебсьы! Крут кряжъяс вылысь лэччигөн тшөкыда жугласьлісны груз тыра дадыяс. Суис кө нин татшөм неминуचाыс — пырт көръяссө матысса вөрө, сайөд крут берег улө либө скала бердө, мед самолётсянь эз тыдавыны, да виччысь пемыдөдз. Отсöгыс сөмын сәки воас.

Гожомнас ёнджык көръяс тшөтш и мыш выланыс кыскалісны грузсө.

Степан Мартынович война вылысь локтіс Красной Звезда орденөн, «За боевые заслуги» кык медальөн. Война бөрас уджаліс колхозса председательсө вежысьөн, колхозса председательөн.

Зотей Канев (Бакурса жө) висьтавліс: «Öтчыд вайөда ранитчөм салдатсө. Туйын жугаліс даддьөй. Босьтчи дзоньтасыны. Виччысьтөг тыдовтчис враглөн самолёт, пулемётысь кузь öчередьөн уськөдіс куимнан көрөс. Самолёт вөчис ещё öти кытшов. Зэв уліті лэбө... Но, мися, и миянлы воис пом. Но бисө эз осьт. Патроныс, тыдалө, помасис.

Эрд вылын бурсө виччысьны некытысь. Орчачөді, крепиті лямпаяс, вольсалі пась, водтөді сы вылө доймөм салдатсө да ас вынөн лунтыр кыски сійсө. Рөмдыштөм бөрас нин көр даддя отсöгыс воис. Мудзи, муртса кок йылын сулала, но öд и боецыс, и ме ловъяөсь...»

Гамысь Ф.В.Чупровлөн казътылөмъясысь:

— Карельской фронт вылын ме вөлі олене-лыжной разведывательной батальонса боецөн. Босьтлісны сэтчө медсясө вөвлөм спортсменъясөс. 1942—1944 воясын көкъямысысь ветлі разведкаөн враг тылө лызьөн-көръясөн. Öти ветлігөн некымынысь ковмис байдөг моз лунйыны лым пиын. Войнас ветлөдлам, төдмалам, мый колө, а луннас пөтка моз репасө дзебсям. И вежон сідзи. Сөмын сизимөд лунас локтім частьө. Босьтім пленө да вайөдім кыз немечсө. Шуө вөлі асьсө егерөн. Быдторйыс веськавліс разведкаын.

1942 вося сёр арын миянөс куимөнөс мөдөдісны враг тылө. Первой войнас мунім 15 кымын километр, ёна изъяинті öдйө он мун. Муртса югдыштіс, аддзам: водзын 5 морта вражеской патруль локтө миянлань. Первойөн найө лыйисны, сьөкыда ранитісны старшинаөс, группаса командирөс. Ме тшөкті аслам ёрт Выучейскийлы (уджавлөма көр пастукөн Уса районса Нөвикбөж совхозын, шань да вына морт) босьтны, мыш вылас нуөдны старшинаөс, а ме автомат биөн кута видзны найөс мышсянныс. Тыдалө, кутшөмкө немечлы веськалісны менам пуляяс, и найө дугдісны вөтчыны миян бөрся. Неылөдз муныштөм бөрын вөчим нөсилка кодьсө да сідзи и вайөдім старшинатө частьөдз. Бөрсө локны ковмис кык сутки чөж. Ёна зэрис да, ёна жө и көтасим да кымим. Старшина колис ловйөн.

Полярной кытш району миян ни немечлөн сплошной оборона эз вөв, вөліны сөмын сідз шусяна опорной пунктъяс.

1943 вося декабрь 6 луно быдса ротаөн мөдөдчим враг тылө. Көръясөс пасьтөдім еджыд дөраөн, сөмын кокъясныс муртса тыдыштөны. Асьным автоматаөсь, снайпер винтовкааөсь, весиг руч-

нөй пулемётҕыас да нейджыд ротнөй миномётҕыас вөлісны. Карта ылө командирным пасҕяліс враглысь опорнөй пунктҕыас. Матө вежон ветлөдлім. Бөрсө локтігөн бырөдім враглысь вель ыджыд опорнөй пункт. Чорыд косын воштім жө нөль мортөс.

Фёдор Васильевичлысь морөссө мичмөдісны III степеня Слава орден, «За отвагу» да «За боевые заслуги» медальяс.

Чупров ылө донҕялө и Бакурысь Александр Терентьевөс, кодөс сідзжө наградитөма III степеня Слава орденөн.

Кипиевоысь И.И.Чупровлөн казтылөмҕясысь:

— Миян водзын враглөн ыджыдкодь опорнөй пункт. Сэтысянь, дзевбассянь, немечҕыас тшөкыда уськөдчывлісны миян ылө, виалісны либө аскөдныс нуөдлісны миянлысь салдатҕясөс. Опорнөй пунктсө бырөдөм могысь, а гашкө, и врагөс повзбөдөм могысь, корөмаөсь вайөдлыны гвардейскөй реактивнөй миномёт «Катюша». Машинасө сувтөдөмаөсь паскыд лызҕыас ылө. Батальонса командир тшөктіс меным вайөдны медся вына дас кык көр. Гезҕясөн домасим машинаас да көрҕяс кокниа и кыскисны миномётсө индөм местаөдз. Асҕя войнас бианьөвҕяс лэбзисны немечлөн опорнөй пункт ылө. Сэні ставыс кутіс сотчыны, а ми бергөдчим да көрҕяс котөрөн бөр петкөдісны «Катюшасө» тылө.

1944 вося январь помланьын враглөн самолётҕыас эз нин сэтшөм тшөкыда петкөдчывны миян весьтын. Позыны кутіс и лунын ветлөдлыны көрҕяса даддён да доддён. Некымынысь меным тшөктылісны нуөдны-вайөдны гырысь военнөй начальствоөс — полковникҕясөс да өтчыд весиг — генералөс. И налөн сьөлөмҕясныс ээв өна бурмылісны татшөм транспортсьыс.

«Тундраысь өтчыд аддзи лётчикөс,— висҕтасьө Иван Чупров.— Самолөтсө уськөдөмаөсь, а лызтөгыд коскөдзыд лымйөд ылөдз он мун. Аддзөма көрҕяса дадюв — ылісянь кутіс горзыны. Төдө: ас морт даддяс. Немечҕяслөн өд татшөм транспортыс эз вөв».

Война ылысь И.И.Чупров локтіс «За отвагу» кык медальөн. Пенсия ылас петтөдз юрнуөдіс көр видзан бригадаөн. Сылөн бригадаыс вөлі и көр пастукҕясөс дасҕтан «школаөн», а асьсө Иван Ивановичөс шуисны «тундраса академикөн».

Повтөм каюрҕясөн фронт ылын вөліны Кипиевоысь Порфирий Леонидович Хатанзейский, Николай Антипович Рочев, Герасим Антипович Рочев, Фёдор Сергеевич Хатанзейский да мукөд.

И.И.Чупровлөн корөм серти ме гижлі письмө Мурманскө С.П.Шерстобитовлы — взводса, а сэсся ротаса вөвлөм командирлы. Вочакывҕяс сійө гижис:

«Менам ротаын унджык боецыс вөліны Изьва да Печора бокса сиктҕясысь... Комияс. Ыджыд сямлуна, смел да бур сьөлөма воинҕяс. Ёртнысө некор оз кольны бедаын: көть асьныс пөгибнитасны, но быть локтасны отсөг ылө.

Өтчыд водохранилище вомөн вуджисны вит—сизим доддя нөль аргыш. Додҕясас быд сикас оружие, патронҕяс, сёян-юан. Ньөжйө мунысь аргышҕяссө вөтөдіс резервнөй көр стада (витсё саяс пемөс). Вөсньыд йиыс уналаті потласис, көрҕяс да додҕяс веськалісны ваө. Сержант Порфирий Хатанзейский, коді нуөдіс водзын мунысь аргышсө, эз шөйөвош, додь ылө сувтөмөн горөдіс ёртҕясыслы:

«Эн повзёй! Көръяс оз войны, найо кутасны вöйöмьсь и додьяссö! Сувтöй додьяс выланьд, смела вöтлö көръяссö водзö!»

Көръяс ваьсь чеччышталісны йи вылас, бöрсяньыс груз тыра додьяс мукöд көръяс. И збыль. Нёльнан аргышыс писькöдчисны сэтчö, көні йиыс вöлі крепыдджык. Грузсö лои мездöма, и каюръяс пиысь некод эз вöй.

1942 вося тулысын миянлысь көръяса взвод (ме вöлі сэн командирöн) мöдöдісны саридзса десантникъяслöн 12-öд бригадалы отсöг вылö. Йöзöс и пемöсьясöс пуксьöдісны саридзса корабляс да тендеръяс вылö. Апрель 28 лунö матыстчим Пикшуев нырд дорö. Саридзса пехота боецъяс чеччалісны морöсöдзныс ваö да пырисны нин врагкöд косьö, а көръяс пыр на сулалісны палуба вылын.

Вöтлам, йöткөмөн и кыскөмөн,— пыксёны. Полöны ваö лэдзöм ванъялысь трапъяс вылас тувчыны дай пом! Нöшта и зэв крута лэччö поскыс.

Сэки öти десантник и шыасис ме дінö:

— Командир ёрт, тшöктöй, мед көръяса додьяссö көртавласны öти бөрö мөдöс, сьöрсён-бöрсён, а воддзаясылы сюръяс гез көрталöй. Ми берегсяньыс кутам кыскыны. Некытчö лоö воштысьнысö, быть лэччасны. А воддза дадюв бöрсяыс и мукöдыс ваас чеччаласны. Ю вуджигөн Шöр Азияын ми ыж чукөр тадз жö вуджöдам. Козёлöс, нырщиксö, верзьöма вöлөн гез йылысь вуджöдам, а сы бöрысь сэсся и став отараыс повтöг нин вуджö.

Сідзи и вöчим. Öти бöрся мөд көръяса сизимдас вит дадюв здукөн нырд вылын лоисны. Көть саридзыс и ыджыд гыяса вöлі, ваö веськалöм көръяс кокниа уйисны береглань. Ми көлуй да патрон ящикъяса шлюпкаөн öдва вермим вöтчыны на бöрся. Кор враглөн самолётъяс тыдовтчисны нырд весьтын, груз тыра аргышъяс ылынöсь нин вöліны берегсяньыс, разöдчöмаöсь нырд пасьталаыс, а ми дасьöсь нин и сынöдсянь усьласьöмысь дорйысьны, и водзын, окопъясö дзёбсьöм фрицъясöс свинечөн гөститöдам.

Мен торйөн нин тшöкыда дум вылö усьлöны сержант Порфирий Хатанзейский да ефрейтор Иван Чупров. Сяма каюръяс фронт вылын вöліны и бур боец-разведчикъясөн».

Тöдчана отсöг 14-öд армиялы сетісны көр транспорта батальонъяс. 1941 вося сёр арсянь 1944 вося тулысöдз көра дадьясөн петкөдöма косьяс мунанінысь дас сюрс сё нелямын кык ранитчöм салдатöс да офицерöс, петкөдöма тундраысь аварияö веськалöм да уськөдöм сё квайтымын кык самолёт, мездöма уна лётчикöс, нуöма дас сизим сюрс сайö тонна быд сикас груз.

1942 воын Карельскöй фронт войвывладорын вöлі артмөдöма 19 номера армия, көні бара жö ыджыд отсöг сетісны көр транспорта батальонъяс.



«Саботажнича»

В И С Ъ Т

— Анна Алексеевна, фронт вылас абу вöвлöмныд, а снимок вылад — нель медаля?— альбомсö листала.

— Вöзйысьлім эськö пронт вылас Густя пöдругакöд, но эз босьтны. Дас сизим ар некоднаннымлы на эз тыр. Но нелямын öтиöд वोся арнас, октяб помын, кыкнаннымлы и воис повестка: «Габова Анна Алексеевна. Вы направляетесь на курсы трактористок в МТС с. Сторожевск. При себе: тёплая одежда. Сменное бельё. Недельный запас питания... В период учебы — трёхразовое питание».

Густя пöдруга дінö котöртлі, меным кодь жö гижöда бумага воöма: «Игушева Августа Васильевна...»

Гортын кольöны кык чой. Лена, ыджыдджык меысь, дас арöса Настя да мам, шöр арлыда. Öльöксей бать да Ёгор вок фронт вылынöсь. Густялөн фронт вылын батьыс да вокыс, но керкаыс пуста оз жö коль... Ыджыд семьяа овмöсьяс Висер ю йылын. Няня удж трактор вылад, да гортысь синватöг лэдзисны кыкнаннымöс.

«Велöдчöй, чой-вокнытö кок йылö сувтöдны отсалöй!»— та-тшöм и вöлі колльöдчöмыс.

Овмöдісны Шойнаты сиктса школаö дас кык нылös. Вель ыджыд жырыйн, кык судта пöвъя пöлатя наръяс вылын узылам. Кöдзыд. Пескыс быран выйын, а тöлыд кузы! Лэччöдісны багыръясөн, черпилаясөн Висер ю вылö. Гожöм пуксигас ляпкыдик, векни ю вылас кык ыджыд пур сибдöма.

Начальникным — мастер, вöвлöм тракторист Михаил Петрович.

— Вот, нывкаяс... Школаным пестöм. Ковмас йисö керавны, сутугасö разыны да керъяссö öти-öтиөн йи вылас багырөн лэптавны, а сэсса пöперечкаөн пилитны, даддьөн школа дорöдз кыскавны, поткöдлыны, тэчны чипасъясö — пескaöсь лоам тövбыд...

— Вины кöсьянный! Ме вөрö, бурджык, мöдöдча! Вöвнад, майбыр, сямма! Сортровка керъяс Висер ю берегö кута пармаысь петкöдны! Тані öд сювийös орданныд!— Ыджыдвидз сиктысь Агния тшöтъясö. Агниялы вомас чуньтö эн сюй, гырddзаöдзыд курччас (общежитиеын, бöрас, старöстаөн сійös и бөрйим... Вескыда шуа — комендант! Пусьысь вылын, и миян).

— Но, нывкаяс, мый шуанныд? Лэдзам Агния Мишаринасö «Вөр фронт» вылас?— шпыньмуніс Михаил Петрович.

Кыв некод эз шу. Öд збыль, и миянлы кöть пышйы! Локтім велöдчыны, а тшöктöны мырддыны Вакульыслысь йиөн дорöм, ва визувнас лыаөн джынвийö тыртöм кык ыджыд пур! Поткöдлöмнас — комын сыв пес! Измöмаöсь, сулалам.

— Лэдзам нывсö?— мöдысь юалö мастер.— Сэні — «Вөр фронт», а миян... велöдчанныд да — «Му выв фронт». Гитлеркöд верма-сысь армияслы и керйөн колö отсавны, и няньөн салдатъяссö вердны!

Ланьтöмаöсь. Мый татчö шуан?

— Ме օтнам ог жօ мун!— Агния чер бօсьтис, йи керавны лօсьօдчօ да меліа нин юалօ:— Но, Михаил Петрович! Шойнаты колхозас нօ вօлыс абу? Перъялам, пилитам, кыр йылօдзыс катлам, а сәсянь... нօшта верст... мед новлօны вօлօн... А школаса зонкаясы? Дас нель арօсаясыс?! Поткօдчынытօ миысь, нывъясысь, восьтерджыкօсь! Чипасад и школаса нывкаяс тәчасны!

— Збыль тай! Ставсօ кօ օтвив! Школаса завхозыс и катлас пессօ местаօдзыс... Сёрнитла директорыскօд... Нывъяснас руководитны тәнօ и инда, Агния!— кывкօрталіс Михаил Петрович.

Бесиг клопайтыштім.

— Но и бօсьтчим, сідзкօ, нывъяс! Мед шоныд лоас миян класс!— Агния нин командуйтօ.

Лунтыр йисօ кералім, багыръясօн керъяссօ йи вылօ ләпталім, лым вылын пилитчим, дадыасօн кыр йылօдзыс катлім. Школаса зонкаяс поткօдчисны.

— Посныда! Посныда поткօдлօй!— командуйтօ Агния.— Йизьօм плакатօ кор на Мороз-Пօльыс шупօдас? Быд асыв и рыт вит пач уборщицалы, да миянлы на тшօтш, ныас пуыштны, ковмас ломтыны плита пачтօ!

Агниялысь быть кывзысь! Кօть сартасօдз зонкаяс юкаласны, уджыс мօдօдчис да. Агния օд школаса мастерысь, завхозсысь, стрօгджык!

Михаил Петрович эз бара энօвтлы миянօс! Завтрак бօрын кօкъямыс час асывсянь ләччօдօ Висер ю вылօ. Медводз кутчысьօ чер-багырօ, кыткօ зоръялыштас и пыр велօдօ-индасьօ:

— Дзик вадорас эн матыстчօй! օні вот ут суйօй! Но-о-о! Тшукօдօй багыръястօ!.. Нетшыштім!.. Но, вот и пилитчысьяслы, и дадда нывкаяслы удж лоис! Вօла-морт воас... Лօлыштօй, нывъяс... Батъяс-вокъяс фашисткօд тышкасьօны, а ми нօ... коньօръяс?— сьօлօм сетօ.— Вермам тай! И гօра-кօдза вермам!

Пажынօдз йи улысь керъяс перъялам-пилитчам-кыскасям. Сёйыштны мастер нуօдлас. Ныасыс — картопеля шыд, но вердны мастер тшօктօ пօттօдз:

— Зәв сьօкыд удж бертам! Кодлы содтօд? Няныс лун кежлօ — квайтсօ грамм, а ныасыс — кынօм дундытօдз! Сәсся օд, и асьным пусылім. Быд субօта рытօ, велօдчօмсօ кօкъямысын мастер помалас,— гортօ ләдзօ. Пывсьыштны... Кодкօ и кօлօбъяс, ид нянь вайыштас, яйтор... Грездад օд мօс, кукань, Ен сетօ, ыжъяс... И яй, и йօвтор эмышт... Кыскысисны и миянօс, содтօд гортасяс вердыштісны.

— Кыдз кужанныд, нывкаяс, а выльлунօ... сизим час асылын мед вօлінныд школаын! Пуксьօдасны менօ пօтачкаысь!— мастер тадз стрօжитас.

Сёрнитчам, да ылысса грездасяс водз, асья войнас на и петам. Нывъяртъяс виччысьօны нин кильчօ дораныс, кор Густякօд Пас-ләччօмсянь увланьджык сикт-грездъясօдз котօрօн сорօн воам...

Бара удж... Завтрак бօрын пажынօдз керъяс йиа ваысь перъялам. Пажын бօрын вит час рытօдз пес жօ заптам. Кык ыджыд пурйыдлօн пыдօсыс, буди, абу?

Квайт час рытын ужин... И велօдчօм... Быд лун нель урок. Субօта рытօ гортօ ләдзлօны...

Ме օтягаджык вօлі, да уроксօ кывза... Синмօ куньсьօ жօ, но мыйкօ и кольօ юрօ, мыйкօ тетрадьօ пасйыштала, а Густя пօдругай — стынитօ-узьօ! Укшальмօма!

«Густя! Густя!» — шөпкөдә, гырдызаон тойыштла. — Эн узы! Вөтласны өд, нинөм кө он кут сяммыны висьтавыны! Вөрө и ковмас кайны! Но, садьмы, Густя, но? Трактористкаон лоан, а он кут кер дін йирны!»

— Ы-ы-ым! Аннуш! Ун личкө... От кыв немтор... Пельө оз кыв... Т-т, т-э-э... гиж... Аски висьтыштан... Тет...тет...сьыд лыддя... — и бара нин стынитө-узыө... Мый нө вывті, вывті мудз мортыс вермас...

Кык төлысь ноксим пескөн. Декаб помөдз...

Но Ен отсөгөн и пес заптан удж коркө помассис. Квайт час рытсаян жө велөдчим, но асывсяныыс... школаөдз Шойнаты МТС гаражын «Фордзон», американскөй тракторьяс разялам быд винт-частьөдз, карасинөн мыскалам... Туяна частьяссө бөр тэ-чам, а ёна кө зыртчөма ли жугалөма — токарлы либө кузь-нечлы нуам. Вильөс төчитасны-дорасны.

Мастер пыр миян дорын.

— Ноко, нывкаяс, кодлы тайө тракторыс? Ломзыөдөй сьөлөмсө!

Полөмөн матыстчан, мотор нырас крукыля завод ручкасө сюян, нетшыштан өтчыд-мөдысь — чужйө чукля көрт бедьнас.

— Оз ков мен тайө!

— Лёка зажиганиесө лөсьөдінныд! — ачыс лючки вөчас да коалө: — Ёні?

Заводитчө өд, көть тракторыс и «пөрысь» нин.

Луннас майөдз гаражын, практика, рытнас — школаын. Густя кань синма нин! Гаражас өд абу сьөкыд удж, оз ков йи улысь керьяс перьявны.

Мастер бур трактористкаясөдз быдтіс:

«А тайө кытчө? А тайөс кызди?» — юасьө. Он кууж — көть да-сысь, вежон юасяс. Спуск — некодлы!

Экзаменьяс бөрын, май шөрнас, миянөс колхозьясө, кодөс кытчө, гөрны мөдөдісны. Ме гортө, асланым колхозө веськалі. Муясыс абу на косьмөмаөсь, аминь сьөкыд гөрнысө. Куим плуг и кыскалө «Фордзоныс», но увтасінджык либө кыр воча — бук-суйтө, «кынөм» вылас пуксьө. Чер пыр сьөрысь, кабинаын. Кө-төрттла раскө, керала некымын бадь, кызд либө пипу, кыскала трактор дорөдз, чинтала, масьта бөрья көлесаяс улас, бөрынть-чышта, мынтөдча плугысь да сэсся и пета гиблөй гусьыс. Плугсө, косінөджык воа да, тросөн кыска. Шедліс мученньөыс, Ен сыкөд. Куим тулыс-ар гөри «Американеч» вылас. Арнас — көть сьыв, рудзөг улө август помын гөра, сэк муыс кос, оз буксуйт тракторыс.

Төвнас вартім. Комбайныс сэки быд колхозлөн нин вөлі, рыныш дорас, лэбулын сулаліс. Но ачыс оз варт, трактор колө.

МТС өти колхозө мөдөдлас вартны. Помассяс уджыс — мөд сиктө ыстөны. Казяла, төв кежлас трактор «мудзөма» нин. Асыв-нас радиаторас пөсь ва кисьта, мотор улас пестысьла, а мөда заводитны — моторыс сөмын несьялө да заводнөй вугнас бөрнид вурлө-кучкасьө.

Кызкө вартсис жө Сюзябын. Колө эськө МТС-ө лэччывны, но тшөктөмаөсь нөшта и Паслэччөм грездса колхозлысь урожайсө вартны. Гортын, дерт, мудзөм-кынмалөм бөрад паччөрын майбыр узыыштны, но трактор, гортө лэччигөн нин, куслі. Одва и заводит-ті, да грездөдз, гумла вылөдзыс, вои рытгоровнас нин.

Мөд лунө, югдігас на, председатель өдзөсө нин таркөдчө.

— Анна! Унтө веськөд, вартысьяс мөдөдчөны нин. Ладит трактортө комбайнас, да заводитөй вартны.

Водза-водз ковмис гумла вылө мунны.

Ноксьёмыс пöшти лунтыр лоис — трактор эз и заводитчы. Вартысясыс — пöчьяс. Кольта мыччалысясыс — посни зонкаяс, школаын велöдчысяс. Кольта көртöдсö чарлаөн вундалысяс да комбайн «вомас» разöдöмөн сюялысясыс... нельöд-витöд классын велöдчöны.

Председательным Паслэччöмын... фронт вылын морöсас мина торпыриг дзенгöма. Перйöмаöсь. Ловъя воис...

— Василей Петрович! Звöнитлы Шойнаты МТС-ас, мед ыстыласны мöд трактор! Оз уджав да!— кора.

— Но, мунöй, шойччöй!— нывбабаяслы да челядьлы шуис колхозса пред.— Аски... татчö жö... кортöг нин... И тэ, нылö, шойччышт, но эн сёрмы. Ылын-ö Шойнатыд! Воасны... Мöд трактор мед мöдöдасны, звöнитла...

Мудзи да сөйтöг и кайи паччөрö, усыртки... Шоньд! Паччöрад пöсь кирпичьясыс гөн перинаысь на небыдджыкöсь. Кыла: öдзöс чужъялöмөн жугöдöны. Син восьтi — муртса на лöзьюгид.

— Код крещеннöй?— пачводздорсянь ывла öдзöслань уськöдчис мам.— Сöмын на вöдитчи, скöтöс вердi-юкталi. Тöлыс тай восьтö да ортсы öдзöссö гурйывтö... Тасыштi сöмын.

Кыла: кильчö öдзöс восьтiс.

— Пырöй...

— Петкöдла ме тiянлы крещеннöй!— нöшта и матькыштiс пырысьыс.— Кöнi саботажничаыс?

Кыли мисьтöм сёрнисö, паччөрö каян приступ вылө нин кокъясöс лэдзи. Пырисны колхозса пред да шынеля-погона зэв скөр дядьö. Милиционер! Чур-чермунi: «Мыйла? Мыйла?»

— А-а-а! Тайö тэ саботажничаыс? Н-но-ко! Öдйö пасьтась! Вартны колö! Рöдиналы нянь колö, а тэ паччöрад!

— Вердышттöг нылöс удж вылө ог жö лэдз,...— мам зельöдчыштiс лёдвидзанын, бекар-лöшка сэтысь судзöдiс.— Пуксьылöй, тшайөн юктала...

— Некор! Война! Фронтлы нянь колö, а колхозыд вартнысö на эз босьтчыв!

— Сөйтöгыс нö кызди тшыг мортыс уджалас?

— Но! Мед тэрмасьö! Ме кильчö вылад куритчышта... Вердышт...

Кутшöм сөйöм... Киö нянь босьтлытöг панясьыштi, пасьтаси да гумла дорöдз медводзын, быттö конвой улын, усьла-чечча, котөрөн сорөн моз муна. А юрын öти мöвп: «Эськö мед заводитчас! Мед эськö заводитчас! Мынтöдча эськö тайö тшöгöм польöсьыс, заводитчас кö моторыс»,— Енлы нин мöвпөн кевмыся.

Мотор увсö биён шонтi, пöсь ва радиаторас кисьтi. Босьтчи мотор заведитан вугъяс. Джын кытшолөн öтчид, мöдысь... дасысь нетшыштi — мотор сöмын «несйыштас», весиг тшынтор оз петав.

— А-а! Саботажнича! Мыйла кругöвöйөн он гарт?— арыштчис погонъяса шынеляйд.

— Вынöй оз тырмы...

— А ноко, нöшта видлы! Лыя места вылад, он кö заведит! Аддзывлi тэ кодь саботажникъяссö! Эстөн — фронт, а тэ?!— нагансö кыкис:— Лыйла!

Нöшта кызъысь кымын нетшыштi мотор заведитан вугсö.

Трактор сөмын несъялө. Лигышмуні. Кокын ни сойясын — неку-тшөм вын. Уси.

Чургөдөм нагана киа дядьолөн чужөмыс кумач гөрд лоис:

— Лыйла места вылад!

— Ог вермы... Вынөй оз тырмы... А ноко, ачyd видлы...

Погона дядьөйд тойыштис менө, босьтчис кыкнан кинас мотор заведитан вугйө. Наганыс — киас...

Вердаса вына мортыд куимысь гөгөрпөв бергөдис мотор заведитан вугсө. Трактор пытшкын гораа клопмуні, а сэсса көрт вугйыд вурыштис бөрныд да дядьөйд веськыдыв воськов вит сайө тутис, наганыс юр вывтис код төдө кытчө жуньгис...

«Ой-ой-ой! Доймис мортыс!» — повзёмөн ли серам пырысь, пойгөны нывбабаяс.

Ме вылө уськөдчисны:

— И мыйла тэ, Аннуш, бур нылөй, вайөдін татчө тракторшойсө? Мыйла? Абу ли мый МТС-ад бурджыкыс?

— Сэнітө, дерт эм, но абу мөдөдөмаось да...

Сэк кості энкөвөдөшник кок йылас нин сувтис, кывліс нывбабаяслысь сійөс жалитана пойгөмсө, пыркөдчыштис гач-шынеляс көласьом няйтсыс да коньөр моз рама юалис:

— Пистолетөй? Көні менам пистолетөй? Корсьөй, бабаяс.

Нагансө, дерт, пон эз пышйөд, регыд и аддзисны...

— Вот мый, нылө, лэччылам менам машинаөн Сторожевскө...

— Арестуйтан? Мыйыськө?

— Мун, эн матькөд! МТС-ө лэччылам... Талун жө мед бөр тані вөлін! Медбур тракторсө тшөкта сетны!

Пуксьөдис машинаас орччөн. Скөрлуныс абу нин.

— Съөкыд трактор вылас? — бурысь нин туйын юасьө.

— Гөригөн — улисджык му вылын йөрмывлам, а сідзсө, тракторыс кө му вылас оз вөй, зэв позьө уджавны.

— Тшөктысьясыс ме вылын унаөн! Приказөн на мөдөдөны уджсө өддзөдны, подневольнөй. Планным пө орө...

— Эськө и лыйин? — туйын, палялі да, веськыда и юавсис.

— Э-эг! Ме шпанаясөс, гусясысьясөс куталысь...

МТС-ын погона дядьөйд эз нин наганась. Кык час мысти уджалан тракторөн петі. Сёр рытын гортө вои... Вартім... План тыртім... А сэсса — Воркутаө муні.

— Кыдз нө нин сы ылнаас Висер вожсянныс веськалін?

— Корасис асланым сиктса, гөтыртөм мужик. Воркутаас шахтаын уджаліс. Война помассян воас, төвнас, гортас вежон кезлө воліс. Ошйысис: деньгасө пө зэв уна мынтөны. Менө тшөтш көсйысис шахтаас инавны. Петі верөс сайө, мунім Воркутаас да сәні дас во шахтаас уджалі.

— Из шом перйин?

— Эг... Му выв, веркөс уджыс сәні зэв уна...

— Медальяссө мыйысь сетлісны?

— Ётиыс — война кадся уджысь, мөдыс — шахтасянь, а нөшта кыкыс — юбилейнөйяс. Но, позьө шуны, морөсө медальяссө эг өшөдлы. Кор бөръясө сетісны, сәки тай снимайтісны. Вөр посёлокад медалястө он аддзыв.



Культура да национальной политика Коми Республикаса министрство 2004 вося кос му (апрель) 1 лунсянь 2005 вося рака (март) 31 лунёдз нуёдіс дас—дас вит арёса велёдчысьяс пöвстын «Войнаён чишкалём олёмъяс» конкурс.

Конкурсис муніс кык пöрйö. Воддзаыс — каръясса да районъясса школаяс пöвстын.

Медбур уджъяссö — Сыктывкар, Ухта, Печора каръясысь, Изьва, Кöрткерёс, Сыктыв, Удора, Чилимдін, Луздор, Емдін районъясысь — сэтчöс библиотекаяс мöдöдісны челядьлөн С.Я.Маршак нима Коми Республикаса Национальнöй библиотекаö, республикаса конкурс вылö.

Жюри видлаліс-донъяліс нывка-зонкаяслысь быд удж.

I Литература юкöнын:

«Гран-при» вичмис Печора карса школаысь витöд класса велёдчысь Максим Новожиловы «Пöльлөн висът» гижöдысь.

Первой места сетöма Чилимдін районысь Окунев Нос сиктса велёдчысь Анна Истоминалы «Ермил» висътысь.

Мöд места босьтіс Луздор районысь Абъячойса шöр школаын велёдчысь Ксения Шучалина «Пöрысь баблөн висът-вöвлöмтор» гижöдысь.

Коймöд места вичмис Чилимдін районысь Окунев Нос шöр школаын велёдчысь Зоя Чупровалы «Чой» висътысь.

Республикаса конкурс вылö веськалём быд гижöд либö снимокъяса альбом дасьтысь авторъяслы сетісны козинъяс. Уджъяссö йöзöдасны торъя небöгөн.

Максимён нимтылöмаöсь. Меным дас арöс. Ола Печора карын. Велöдча витöд классын. Ыджыд война йылысь школаын, история урок вылын, учитель висътавлö, книгагасысь лыддя. Аслас челядьдыр кад йывсьыс пöль, Николай Фомич Любимов, гортын висътавлö. 1941 воас сылы вöлöма вит арöс, олöмаöсь Воронежын.

Максим НОВОЖИЛОВ

«Сёйны! Сёйны! Сёйны!»

ПÖЛЬЛӨН ВИСЪТ

Фашист Воронежлань матыстчö. Съод креста самолётъяс луннас некимынысь воласны, кар вылас бомбаяс шыблалöны. Пель чунöдана шыён потласьöны. Вит арöснад некутшöм полöм: котрала, кар сайöдзыс тшöтшъя зонкаяскöд вола, мам дінöдз. Уна-уна йöз сэнi кодйöны джуджыд канаваяс.

Нывбабаяс видöны миянöс ывлаын котралöмысь, полöны, медым бомба улö ог веськалöй. Муртса на кутас кывны сынöдын самолёт мотор шы, нывбабаяс миянöс турки-тарки канаваас йöт-каласны, пыдöсас тшöктöны пукавны. Асьныс сэтчö жö уткыртчасны.

Лун дас войтырыс кодйысисны, а сэсся öти рытö мам котөрөн гортö воис. Чукöртыштiс нопйö көлуй, сёянтор, пасьтöдіс менö да котөрөн жö көрт туй станцияö мунім. Пуксьöдісны вагонö.

Войбыд пукалім. Йёзыс! Мам ноп вылас пукалө, ме — пидзёс вылас.

Асывнас пырис шынеля-погона дядьö да юөртіс:

— Петöй! Разöдчöй гортаныд... Поезд некытчö оз мун. Туйсö бомбитöмаöсь...

Мам ки пöлөд гортö нуөдіс, вердыштіс да узыны водтөдіс. Войбыд öд син эг куньлöй. Кык лун мысти немеч Воронеж карö пырис. Карсö пушкаясось мян нин кутісны лыйлыны, мед врагсö бөр вөтлыны.

Фронт — водзö ни бөрö. Öтарсянь и мөдарсянь — би. Немечьяс карсьяс посни челядя нывбабаясö чукоөртісны да ичөт конвой улын нуөдісны рытыввылө. Сьöрысь мам босьтіс сöмын пыр новлан-вежсян көлуй, сёянтөр.

Кык лун мунім. Воим кутшөмкө сиктö. Пу керкаяс. Войнаыс сиктсö кытшовтöма, ни öти стрöйба абу жугалöма. Менö да мамöс овмөдісны олöма нин öтка нывбаба ордö.

— Олöй, төрам тай, майбыр — кык жыр. Пес төвйыны тырмас, ог кынмöй, — бурпырысь сёрнитö көзаякаыс. — Сёйны вот немтор. Картопель, нянь, скөт — ставсö нуисны. Слава бог, көть йөзсö эз вөрзьöдны.

Регыд кадөн төдмаси сиктса посни челядьыскөд. Ворсны пөтавлам, но тшыг кынөмнад дыр он котрав. Нопторным, кытчö мам, кузь туйö петөм водзвылас, кутшөмсюрö вөлöга, шыдөс, пызтор пуктыштліс, важөн кушмис, но меным, ичөт зонкалы, оз эскыссьы. Дулляла чуньöс да вурьсьясöдыс новлөдла, оз-ö мыйкө чунь помö көлась, а сөсся нюлышта.

Ветлөдлім посни челядь сиктгөгөрсä ыбьяс да видзьяс вивті, корсялім да нетшким сөрмөм нин гөне гум, шомкор, азыгум — ставсö, мый кынөм тыртö, ныас-шыд пуны поэö. Тшыгöсь!

Юрын öти мөвп: «Сёйны! Сёйны! Сёйны!» Лунтыр сёйөм йылысь мөвпала. Узигөн сёйөм йылысь вөтася...

Öтчыд немеч-пөвар вердіс салдатьясö, но мыйкө и кольыштöма на пөрт пыдөсас.

— Дан зю мир! Цюрюк! Киндер... Спеиз! — мян вылө видзөдігтыр горзö.

Немтор, рочьяс, ог гөгөрвоёй. Но пусьысьыд тасьті кыпөдліс, паньөн пөртьяс кучкалыштіс, кинас асланыс корö:

— Шнель, шнель, киндер! — мыйкө нөшта шуаліс.

Гөгөрвоим: мыйкө пөртьяс кольыштöма. Гашкө, и вердыштас. Но полөмпырысь матыстчам. Немеч созьясаным роктор дарйөн тэчышталіс.

Чөскыд! Нюлі да нюлі няйт киясöс, мед нин весиг рок көрыс вомкөтшö воис.

Тайö лунсяныс пажын кадö зонпосни быд лун кутім воылыны кухня дорас... Ылын сулалам. Немеч салдатьяс сёйöны, ми дуль нылалам. Налөн сёйсяс — пөвар мянөс чукоөстас:

— Ком, ком, киндер, шнель!

Көтөрөн пөрт дінö. Содзым быдөнлөн нин дась...

Тшыг көинысь на тшыгöсь. Төдім зонпосни: немечыс мянлысь карнымöс кисьтіс-жугліс.

Мам видö, мыйла ме сэтысь, фашистьясыслысь, нылышtmөн роктор виччыся. Но тшыглуныд тай! Рушкуыдлы веськодь, коді сиөдыштас:

«Коть весиг и фашист... Тшыглуныд оз тай юасы!»
Өтчүд сикт помас өтнам муні. Шомкор, гөне, гум няклялыш-
ті. Сёрми немечьяслөн пажын вылас. Зонпосни «содзтырсө»
нбылыштөмаось нин, разөдчөмаось. Немеч салдатъяс эжа вылын
куйлөмөн куригчөны.

Пөвар меным рокторто эз сет, да зэв өбиднө лои. Уськөдчи
эжа вылас, бөрда, чужъяся:

«Сейны! Сейны! Сейны!— сөмын и горза.— Кула тшыгла!»

Пөварыд гөгөрвоис — вида сійөс, да кузь воропа дарнас
ырыштчис. Горзөмнам сылысь пельсө сьөдмөді!

Сэки салдат чукөрысь чеччис мича погонъяса олөма нин не-
меч, матыстчис пөвар дорас да ас кыв вылас видчыштіс.

— Яволь!— сөмын и вочавидзис пөварыд, да менө пөттөдз
вердіс.

Воронежө бөрсө локтім 1943 вося тулысын. Кар помас ичөтик
пу керка местаын, көні овлім,— ыджыд гу. Ваөн тырөма. Суседъ-
яскөд өтвыв мам виль оланін кодйис. Эжисны жугласьом пөвъ-
ясөн... Сэні өтчукөрөн и олім.

Тшыглун! Война чөжсө ме вөтөн и вемөсөн сөмын и төдлі —
тшыглун!

Фронт вешйис рытывыввлань. Гырысьяс, тшөтш и мам, уджа-
лісны коді көні, а ми, зонпосни, котралім ыбъяс вивті, корсим
сёян. Бипур өзтылам... Кольөм снарядъяс, аддзам да, биас шыб-
лалам... Нимкодъ, кор потө. Унаөн доймавлісны... Менө, гашкө,
Енмыс видзис.

Ыджыдджык вок, ар дас нёля вөлі, немечьяс дырйи дзебся-
сис, мед Германияө оз нуөдны, а война помас вербуйгчис (сідз
сэк шулісны) Войвылө, Комиө. Недыр кад кольөм бөрын и мия-
нөс сэтчө корис.

— Мед бара, внукө, эн жө төдлы татшөм тшыглунсө,— по-
маліс шог висътасьомсө пөль.

Анна Истомина чужліс 1990 вося февраль 13 лунө Чилимдін районса
Окунев Нос сиктын. Велөдчө сэтчөс шөр школаын, өкмысөд классын.

Анна ИСТОМИНА

Ермил

ВИСЬТ

Война. Ермил во нин служитө Мурманскын, чери кыян фло-
тын. Армияөс чериөн вердө. Фронт вылө сійөс эз босьтны. Дой-
мыліс челядь дырйиыс. Но война кадө дзик бокө эз жө кольны...

Олөмыс ёна куснявліс Ермилөс.

Быд лун, котъ Баренцев саридз бушкала, чери кыйысьяс ичө-
тик судно вылын петөны тывъясны. Мужикъяс сюся видзөдөны
паныд локтысь ыджыд гыяс вылө, оз-ө сэні гөвкъяв фашистъясөн
ваө лэдзөм «козин» — кык сывтыръя сюра-пеля мина.

Ермил — варов морт, быдёнкөд лөсялө, но медбур ёртөн лыд-дис Волга бердса сиктын быдмылём матрос Алексейёс, паськыд пельпомъяса, шөркодъ тушаа, кушмыны нин мөдём юр чука дядьё-ёс. Алексей — вежөра морт. Некодкөд зыкө оз пыр, но, кор колө, шуас чорыд кыв — вурыштас!

Чери кыйысьяс олісны важ баракын. Пракмём вевтыс вияліс. Крысаяс өблөжка керъяссө, джоджсө, писькөдлөмаёс да жыръя-ясас, көть войбыд ломты,— көдзыд. Узылісны наръяс вылын фуфайкаяссө пөрччывтөг. Конюшня кодъ ыджыд жырйын сынө-дыс улис. Нырад чамгө чери дук, пөдтө табак тшын.

Ермил, Енлы важ ног эскыс, эз куритчы, но өд мукөдыс тшынасисны. Он көсйы ывлаын, зэр улын улыны — терпит... Но медся лёкыс, медыджыд тырмытөмторйыс, быд мортлөн быд лунъя төждыс — Мурманскын юан ваыс эз тырмы. Чукөрмыш-төм васө быд гураныс, канаваясыс кружкаөн гумлавлісны. Горшyd косьмө, а саридзсьыд курыд, сола васө он ю.

Няйт васыс унаөн гырк пытшкөснас майшасисны. Өти-мөд весиг кувсисны. Асывнас нинөм вылө некод оз норась, а рытнас кыптас жар... Отсавны нинөмөн...

Неминуча суёма и Ермиллыс медбур ёртсө — Алексейёс.

— Асывнас петім саридзө. Чериа местаө, көні каляяс лэбалө-ны, ваас сунласьёны, шыбитім тыв. Муныштім — кыз тросьясөн лебедкаяс кыпөдоны трал. Баренцев саридз зумыш. Корабл-нымөс сөмын и гөгльөдлө отарө-мөдарө. Нөшта и пожйыс моз кисьтө-зэрө, пемдіс, омөля и тыдалө. Тывсө лебедкаөн кыпөдігөн кораблнымөс ыджыд гы бокинътис. Менам ёрт, Алексей, эз удит некытчө кутчысьнысө, исковтіс палуба вывтi чаг моз, ша-шаритчис борт перилөас, а тыв лэптыс тросыс сылань жө нирыштчис да килутшсө быттө бритваөн вундіс.

Косялі дөрөмөс, төби доймөм кисө, көрталі — петө вирыс. Тывнас вель дыр ноксим, берегөдзыс ылын, карөдз регыдөн он во... Пыр эськө и колльөдім госпитальө доймөм мортсө, но асыв-нас нин сэтысянь воис шог юөр: «Кувсис... Вирсө уна воштөма».

Ермил быттө сирөтаөн колис. Рытгорув петас берег вылө, пуксяс из вылө. Баренцев саридз гыясыс дінөдзыс гөгыльтчы-лөны.

Сійө Мурманскын, а мөвпнас — гортас. Сёрнитө бать-мамыс-көд, челядыскөд. Зумыд сой вылас кутө кувсьыс гөтырыслыс юрсө.

Ермил перйис морөс зепсьыс уна пельө куснялём бумага пла-кат, веськөдліс, видзөдө — синваыс лэччө: Парасковья гөтырсө быттө аддзө...

Өтчыд мунө Ермил Мурманск уличаті. Аддзө бумага плакат: нывбаба морөс бердас топөдөма ичөтик нывкаёс. Плакат улас гижөд: «Гөрд Армияса воин, мезды!»

Ёкмуні сьөлөмыс Ермиллөн. Сувтіс. Дыр видзөдіс плакатыввса нывбаба вылас — дзик кувсьөм Парасковья гөтырыс кодъ өб-ликнас.

Парасковьялөн ни өти фотокарточка эз вөвлы. Абу снимайт-чылөма. Кежис улич вылыс керка стен дорас, нетшыштис пла-катсө, мичаа кусняліс да сыйис зептас гөтырсө казтылём вылө.

Сынөдын бөрддзөм кага моз кливкъялыштис каля. Ермил ча-төртліс юрсө, мөвпыштис:

«Майбыр тэныд, каля! Саридз весьтти лэбалан, чериён пөткөд-чан. Войнаыс, дерт, и тэнө повзёдлө, но тэ бордъя, лэбан, кытчө көсьян. Меным эськө тэнсьыд бордъястө! Төвзылі эськө гортө, аддзөдлі пöрысь бать-мамөс, муса челядьөс. Шудтөмөн лои, но коркө өд и шуда вөлі. Овмөсын — куим мөс, нель вөв...

Сельсөветө воёма бумага: «Кулак!» Этапөн мөдөдісны Чибьюё, йөршитісны тюрьмаё.

Өтчид пырис камераё мянөс видзысьыс, Мишка Сенькин, өти сиктысь сыкөд вөвлім. Пөрччис шапкасө да шуис:

— Землякъяс... Кывлі начальство вомысь: аски тіянөс лый-ласны... Төда, абу мыжаөсь, да ог көсйы ыджыд грек лов вылө босьтны. Жальөсь ті меным. Көсья отсыштны. Пышйөй... Нужник дораныд, пөвъяс улас, дзеби зыр да матка*. Кодйысьөй да өблөжнөй кер увтіыс пышйөй...

...Пөшти сутки сувтлытөг котөртасны. Полөны кутөмысь. Казялөмны аскинас пышйысьяссө да вөтчөны. Понъяслөн увтчөм кылө.

Көсьян кө ловйөн кольны — быть котөрт. Ваті, Чибью кузя, келісны, зыбуч нюръяс вуджисны — воштөмаөсь понъяс пышйысьяслысь кок туйсө.

Сэсса нин вөляникись кутөмаөсь пышйыны. Чери кыйыштасны, бипур дорын шойччөны. Аттьөалісны Михаил Сенькинөс ыджыд отсөгсьыс, смерть гыжйысь мездөмысь.

Колисны лунъяс, вежон дай мөд — воисны Чилим ю вылө, вуджисны Тобыш юывса кузь вөлөк да сәні и торйөдчисны.

Ермил овмөдчис Михаил Сенькинлөн вөр керкаө. Кыйис чери, вөраліс. Вөралысьяс пыр кутіс йитөд семьяыскөд. Мөдөдыштас гортас прөмыс — яй, чери, а сәтысянь — нянь. Ермил бур вөралысь вөвлі: пөткаяс вылө сиасяс, чөсьяс вөчалас, весиг йөра да ош кыйліс. Куим во пармаысь петавлытөг вөр керкаын оліс.

Өтчид, лэч туйсө кыялөм бөрын, рытгорув, бипур вылын ужын вылас тар пуө. Кылө, Тобысь мөдар берегас понъяс кутісны увтны. Видзөдліс — йөз чукөртчөмаөсь. Вуджисны юсө.

— Лыйөй менө, землякъяс, лыйөй! — горөдіс Ермил. — Вынөй быри өткөннас, дзебсясьөмнас та дырасө парма пыдөсын ош моз овны. Синмөй пемдіс тшына пывсянас...

Землякъясыс Ермилөс эз лыйлыны. Ёд мыйта кад колис. Законыс вежсис, небыдджык нин лоис. Вайөдісны гортас, но семьяыскөд весиг аддзөдчывны эз лэдзлыны. Сійө жө луннас лэччөдісны Шапкин сиктө. Воөн-джынйөн пукаліс лагерын.

Помассис коркө пукалан кадыс, воис гортас. Бара кутіс вөравны, кыйны чери, няр песіс (кучик вөчис) да бакилөяс вурліс, кыпөдіс семьясө, кыдзи сяммис-вермис.

Война өзйытөдз висьмис сьөкыд олөмсьыс гөтырыс да сись моз сылі. Ермил ки вылын и кусі олөмыс Парасковьяыслөн.

Ермиллы ковмис кок йылө сувтөдны тыр арлыдтөм на квайт челядьөс да вердны олөма нин бать-мамсө. Медся ичөт нылыслы, Таняыслы, арөсыс на эз вөв.

Война! Босьтісны фронт вылө, но доймыліс да веськаліс Мурманскө, чери кыян судно вылө. Салдатъясөс, матросъясөс чериён вердө...

* *Матка* — важ кадся компас.

Бара бӧрдан гӧлӧсӧн шыасис каля. Ермил видзчысьтӧмысла чурмунис, кимӧдзнас чышкыштис бандзиб вывтис визувтис син-ва войтсӧ. Шогсьӧ гортсаясыс понда. Письмӧ некымын тӧлысь нин эз волю. Оз тӧд, кыдзи-мый сәни олӧны, ловъяӧсь-ӧ?

...Война помассис, чери кыян суднойс фашист-бомбардировщик улӧ эз веськавлы. Гудыр поводдяыс, гашкӧ, унджыкысьсӧ видзис самолёт бомбаясысь. Мина вылӧ эз тшукны.

Кузола машинаӧн жуглӧм каръяс-сиктъяс пыр Ермил локтӧ гортас. Туй вылын паныдасьлысь нывбабаяс, пӧчъяс-пӧльяс видзӧдӧны салдатъяса машина кузовъясӧ, но автомобиль сувтлытӧг мунас сикт пырыс, ӧвтыштасны кинаныс да мӧдӧдчасны аслыныс колана туйӧд.

Ӗткымын грезд-сиктын «Ура» горзигтырйи зонкаяс локтысь салдатъясӧс паныдалӧны, но некод оз чеччы, да кольччасны. Уна сикт-грездын ни ӧти керка абу кольӧма. Сӧмын кымынкӧ сӧдӧдӧм пач трубаяс чурвидзӧны.

«Коді вот йӧз пӧвстсьыс ловйӧннас коли шойнаӧдз вайӧдӧм грездсьыс? Ловъяӧсь-ӧ гортсаяс?» — майшасьӧ Ермил.

Медбӧръя кузь вӧлӧк подӧн вуджӧм бӧрын Ермил восьлаліс сиктса улича вывтис. Зэв шоньд поводдя. Дзользьӧны лэбачъяс. Ермил матыстчис керка дорас, восьтіс кыз пӧвъяса-нарвиа сӧкыд ӧдзӧссӧ. Виччысьӧ: вот-вот котӧртасны сы дінӧ челядьыс, нюмӧн паныдаласны пӧрысь батъ-мамыс.

Но мый тайӧ? Керкаын чӧв-лӧнь. Ермиллӧн мыш кузяыс быттӧ кодзувкотъяс визлалыштисны:

«Кӧнӧсь нӧ? Сы мында олысь коркӧ вӧлі да?» — оз тӧд, мый и вӧчны.

Керкаас пырис суседкаыс, Марья пӧч.

— Но, воин, Ермил? Ме тәнӧ ӧшинь пыр ылісянь на аддзи... Лок ме ордӧ. Туй мортӧс кӧть вердышта. Мудзин ӧд кӧнкӧ и? Шойччыштны колӧ...

Марья унатор висьтавліс Ермиллы:

— Батъ-мамыд кувсьылісны... Мартинтӧ, Данилтӧ да Танятӧ детдомӧ босьтісны. Нывкаыд кувсьылӧма сәни. Фросятӧ, кузя нин нюжалӧма тушаыс да, детдомас эз босьтны. Мӧдӧдісны колхозӧ, Филиппов грездӧ. Данилыд Фрося чойыскӧд Филиппов грездас эз мун. Киссьӧм овмӧсад тшыгъявнытӧ, дерт, оз мун. Архангельскӧ, армияӧ муніс вӧзйысьмӧн.

— Ӗкулина! Кытчӧ нӧ ылалін? Туй мортыс тшыг, лӧсьӧд пызантӧ! — горӧдіс нылыслы Марья пӧч.

Марья чеччис пызан сайысь, муніс камод дорас да перйис сәтысь куим пельӧса письмӧ.

— Медыджыд пиыдлӧн ӧртыс гижӧ. Фронт вылӧ мӧдӧдӧмаӧсь Данилтӧ, усьӧма... Менам Ваня уси жӧ, дас ӧкмыс арӧсӧн... Пыр томӧн и кольӧны, шонъянъяс. — Марья баб бӧрддзис да тупкис синсӧ чышъян помнас... — Тайӧ письмӧсӧ Фросяыд сетіс...

«Батъ воас, да сет сылы», — шуис.

— Видзи камодын... Вермис жӧ виччысьны тәнӧ письмӧыс, воин со... Босьт сӧбрад.

Шогӧ уси Ермил:

«Мыйта вын менсьым нуис войнаыс!»

Ермиллысь мӧвпъяссӧ торкис жырйӧ пырысь Акулина. Тасьтӧн шыд вайис. Ермил видзӧдліс сы вылӧ да шемӧсмис:

«Сэтшөм мича нылыс! Стрөг чужома. Енэж кодь лөз синъяса, мича көсәә кыом русыд юрсиа, статя мыгөра».

Фрося гортас, батыс дінө эз лок, кольчис леспромхозас, петіс верөс сайө. Ермил гөтрасис Акулина вылө. Том гөтырыс чужтіс сылы нөшта сизим пиа-нылаөс. Кувсис Ермил квайтымын көкъямыс арөсөн. Көдзыд море вылас нель вося кымалөмыс мортыдлы мөрчөма жө. Радейтіс олөмсө, да лолыс петіс лөня.

Ксения Шучалина чужліс Луздор районса Абъячай сиктын. Велөдчө сэтчөс шөр школайн квайтөд классын. Конкурс вылө мөдөдөм «Пөрысь баблөн висът» уджсө дасътөма коми кыв вылын да тшөтш и рөчөдөма. Тавыс кындзи, Ксения рөч кыв вы-лын тэчөма «Сорок первый — сорок пятый» сьөлөмө йиджтысяна кывбур.

Ксения ШУЧАЛИНА

Пөрысь баблөн висът-вөвлөмтор

Ассьым пөрысь бабөс ме шулі «чоженьөн». Радейтлі сійөс зэв ёна. Пыр мелі да шань. Чойяскөд радейтлывлім дурыштны, но чожень вильшасьөмысь некор эз чырыштлы. Эз куз видчынысө. Мыйкө миянлы серамбанатор висъталас дай. Чужөмыс кө оз радлы да син дорас синва дзөвкнитас, пырысь-пыр төдлім: омөльтор вөчам, тадз оз позь. Дугдам.

Өтчид күтім дуритны, вакъявны-серавны, да видзөдам — чо-жень нитш чөв ланьтіс. Пуксьөма өшинь водзө да кытчөкө ылө видзөдө, чужөмыс жугыль. Ми повзим:

«Мыйкө нө огө сідз вөчө, чожень? Висътав вай мыйкө. Вай серөктөдышт миянөс, тэ вед кужан».

Чожень ещө на жугыльмис да шуө: «Война кад дум вылө воис. Ёна ме ог көйы, медем тиянлы сэтшөм олөмөдыс мунны. Радлө да дуритө. Тиян серамбана томлун вөсна миян уна мужичөй-зон война вылын усины».

«А мый нө миянлы война йывсьыс нинөм некор он висътав? Мыйкө со дум вылад усьөма, вай котөрөн и миянлы висътав, сәсся өд вунөдан кө...»

«...Мый нө эськө тиянлы? Война абу серамбана висът. А... колөкө, и пуксьөй мичаа да кывзөй. Пөльө йывсьыд висъталышта, кодөс ті эн и аддзылөй, он и төдөй».

«Висътав вай, чожень, кывзам», — пуксим чожень дінө матөджык.

Чоженьлөн висът

— Томөсь на ми вөлім. Радейтчөм сөмын на воис. Олөм кокөн эськө мунны да мунны, уджавны да радлыны, да эз тай артмы. Война ставсө дзугис. Мисътөм, сөвесьттөм йөз кольөмны на миян паськыд му вылын.

Фашистъяс ставнымёс көсиймны асланыс кок улё скойны.
Мый вочан — колё ас му вёсна да челядь вёсна юр индины —
мёд сямён овны эз позь.

Война йывсьыд юрсо кывлём бёрын мөдисны миян мужичёй-
яс чукөртчыны туйо. Тiян пöльо, менам радейтчан, нырас и
веськөдчис ас му вёсна тышкасьны. Ме муні колльөдны сійөс.
Бөрдны эг лысьт. Сідз нин омоль ставөнлы.

Воим чукөртчан местао. Ни öти чужом вылын радлун он ад-
дзы. Пуксим гозъя кер чукөр пом вылө, öта-мөдөс сывъялім да
сідзи и пукалім Öндрей мунтөдз. (Öндрейөн шулісны тiянлысь
пöльтө). Сэсся чукөстіс кодкө гораа. Сідзкө, колё нин мунны.
Сэки и бабаяслөн бөрдөм мөдис кывны. А ме суйи юрөс Öндрей-
лы купайка увтас, синва люзгыө-петө, нинөм ог куж шуны. Верө-
сөй сывъяліс менө да гөрддзасьом гөлөсөн тшөктіс виччысьны
сійөс да челядь бөрысь бура видзөдны.

— Тойыштам гаг чукөрсө да бөр гортө воам... Кодкө да воас.
А тэ, Ира, виччысь менө, эн бөрд, став купайкаос ваёсьтін синва-
над,— весиг шмонитыштіс.

Сэсся чукөртчисны мужичёйяс öтлаө, сувтісны салдат сямён
стройо да веськөдчисны туйо.

Дыр бабьяскөд видзөдім, кызд миян верөсьяс, ыджыд вокъяс,
гашкө, медбөръя туйо мунöны. Төдім — кокньыд олём öні дыр
оз ло. А ме видзөді аслам Öндрей вылө да гөгөрвои:

«Ог нин аддзысьлөй, радлунөй менам, көть и виччысьны кута
нэм чөж».

Сідз и артмис.

Война вывсьыд унаөн эз локны. И пöльыд тiян усис война
вылын. Ёна нин ме сійөс радейтлі, öнөдз на гажтөмтча, ог вунөд.
А усис сійө война вылын тiян бур олём вёсна, мед быдминныйд
да омөльторсө эн аддзылөй,— помаліс чожень висьтасьомсө да син-
васө чышкыштіс.

А ми пукалім, да нинөм эг лысьтөй шуны ни юавны. И сідз
ставыс гөгөрвоана.

Сорок первый — сорок пятый

Сорок первый — сорок пятый,
Годы той войны жестокой.
Годы страха, годы крови
Минули давным-давно.

Сорок первый — сорок пятый,
Годы эти не забыты.
И те, погибшие солдаты,
Что давно землөй накрыты.

Только мы их не забыли —
Тех, кто двери в мир открыли.
Тех, кто смерти не боялся,
С чёрной силой справлялся.

(Кывбурыс Ксения Шучалиналөн).

Зоя Чупрова чужліс Чилимдін районса Окунев Нос сиктын 1990 воын.
Велөдчө сэтчөс шөр школаын, өкмысөд классын.

Зоя ЧУПРОВА

Чой

В И С Ъ Т

Война воясö Зоя пöч менам арлыда на, дас вит арöса вöлöма.
— Госпитальсянь воис письмö,— висьтасьö Зоя пöч.— Абу
Глеб воклөн киподтуйыс. Менам синва чепöсйис, ог лысьт кон-
вертсö восьтны:

«Бать да ыджыд вок фронт вылын. Коднысöкö неминуца суö-
ма...»

Кызкö сэсса восьтi жö, синва пыр лыддя тöдтöм мортөн ги-
жöм дженьыдик юөр: «...Ваш сын Рожков Глеб Иванович тяжело
ранен, лежит в госпитале Вышнем Волочке... Хирург — кырым-
пас...»

Некымынысь лыдди письмöсö. Мам пукалö пызан пельöсын,
чышъян помнас синвасö чышкалö. Радейтöмөн кутлi мамöс сьылi
гөгöрыс:

— Муса мамук! Ме ветла Глеб вок дiнö. Бурдöдам да кыкөн
и локтам гортö. Эн майшась, эн шогав ме вöсна... Ставыс лоö
лючки!

Чукöртыштi, мый медъяна колö: аслым да воклы вежсян кö-
луйтор, сёянтор, воклы лекарствояс, бинт, туй вылö сьöм.

— Да кытчö нö тэ, дас вит арöсаыс, сэтшöм ылi туяс? Вошан
öд, вошан!— повзёма мам.

— Ог воштысь, эн пов! А Глебöс бурдöдам, да вайöда...

Зэв сьöкыдырысь судзöдi Вышней Волочокö билет. Вагонас
йöзыс! Пуксьыны места муртса сюри. Лун мунам, мöдöс. Тöдсаяс
абуöсь, сёрнитны некодкöд. Öшиньö, орöдчывтöг, он жö вермы
дзоргыны. Дай серпасыс сёр арнад лолöс оз кыпöд: зэрыштö,
пуяс кортöмöсь нин. Кор и туй помыс волас?— öти мöвп юрын.

— Нылö, тэ кытчö муна?— матыстчис да шыасис мясянь не-
ылын пукалысь ныв. Арлыднас пöшти тшöтшъяöсь, видзöда да.

— Вышней Волочокö. А тэ?

— Ме сэтчö жö. Госпиталяс... Чой сэнi медсестраөн уджалö.
Гижис: медсестраяс пö оз тырмыны... Отсасьны со муна...

— Ме öд госпиталяс жö... Ыджыд вок сэнi бурдöдчö...

— Öглаö, сiдзкö?.. Кыз нö нимыд?— водзö юасьö ныв.

— Зоя...

— Кутшöм мича ним! Дженьыд. Гора,— быттö жöник невес-
тасö, ошкö-донъялö.— А менö Любаөн шуöны.

— Зонъяслы нимыд зэв на и лöсялана — Люба... Любовь,..—
водзöссö ошкыштi виль тöдсаöс.

— Көнöсь öнi найö, зонъясыс? Дас сизим—дас кöкъямыс арö-
саясыс сиктын эз нин кольны.

— Войнаыс регыд помассяс... Воасны,— сьöлöм сета.

— Оз ставыс... Вот муна госпиталяс, мед унджыкөн бур-
дасны... Во велöдчи медицина училищеын. Мыйсюрöö велöдiс-

ны. Уджышта, а сэсся война бёрас муна врачё велёдчыны.

Кык сутки пёшти узытём. Вагонас жар, из шом дук кылё, ветлөдлөны отарё-мөдарё, сёрнитёны, кага бөрдём кывлас... Кутшөм нин узытём. Ойбыртла здук кезлө — бөр садьма.

— Поезд матыстчө Вышней Волочок станция дорё,— юөртис проводницаыс.

Карас петысь пассажиръяс гызисны, судзөдалёны пуклөс увсыныс чемоданъяс, мешөкъяс, нопъяс. Быттьө кодкө тэрмөдлө, и менам терпенньө быри: регыджык эськө станцияыс воис, медводдзаён пета перрон вылас дай которта госпиталяс, Глеб вок динё... Воим станцияас, петім перрон вылас.

Йөз пөвстас воши. Любакөд торъялім, но сійө менө ачыс корсис. Карса войтырыслысь юасьомён и госпитальсө аддзим.

Люба муніс медсестраяссө, врачсө корсьны, а ме котөрөн палатаясас. Отиө пырала, мөдө — некод оз торкась, оз сувтөд. Оз юав, кодөс корся.

Палатаясас йод да лекарство дукөн пөдтө. Ветлөдла крөвать дорысь крөвать дорё, видзөда куйлысьяслөн чужөмъяс вылас, корся төдсаөс.

И аддзи өд. Юрсө бинтөн төбөма, зэв кельыд чужөма, омөльтчөма. Матыстчи, кутлі радейтана вокөс, бөрддзи:

«Вокөй! Гле-е-еб! Зоя чойыд тэ динё локті... Мамыд гортө виччысьө. Кутчысь... Бурд регыджыкөн, да гортө нуода».

Миянөс окотапырысь и босьтисны уджавны госпиталяс. Еджыд халатъяс да еджыд чышъянъяс, юрси кутөд сетисны. Унаысь нин мыськывлөма, майтөг да больница дука...

Гортын олігөн радейтлі мичаджыка пасьтасьны, быдтылі кузь юрси. Мича, коскөдз көса вөлі, а тані некор ноксьыны юрсиөн. Көть и жаль, но ковмис көсаөс вундыны, юрси тшөтшөдны.

Глеб воккөд отлаын лоим да сы вөсна көть и төждыси, но эг нин майшась. Бурдөны дойясыс — регыд гортө.

Почтальонөс быд лун, терпенньө абу, виччыся. Оз-ө радейтана муса мортсянь, Олёксансянь, фронт вывсянь письмө вай. Лыддя воём письмөсө, гашкө, дасысь.

— Ловъя! Глеб вөсна, усьөм ёртъяс вөснаыс тышкасьө!

И фронтывса олөмыс, врагкөд косыс гөгөрвоанаджык лоө, серпасъясөн син водзө сувтө. Мыйсюрө и госпитальын куйлысьяс висьталёны. Но Олёксансянь воём письмөыслөн доныс абу:

«Мусаөй ловъя! Тышкасьө фашистъяскөд!»

Вөвлі, сьөкыда ранитчөм боецъясөс бурдөдны и ыджыд сяма врачяслөн выныс эз судзсьыв. Менам сой вылын кувсис том салдат, ар дас көкъямыса... Войбыд крөвать дінас, чечывтөг, пукалі, а асывнас мортыд кувсис. Бөрді, рөднөй вокөс быттьө вошті.

Матыстчис госпитальса главнөй врач Филипп Петрович, кутыштліс пельпомъясөд, топөдліс морөс бердас да шуис:

«Миянлы колө лоны вынаён. Быд лун раненөйясөс вайөдөны. Бурдөдалам, стройө бөр сувтөдам... Но ми абу енъяс».

Госпитальын менам уджалігөн тайө зонмыс вөлі медводдза кувсьысь боец. Бөрынджык, дерт, кулалісны жө... Сьөкыда ранитчөмаыс, кодлысь гырк пытшкөссө, морөс кудсө снаряд торпыриг быдсөннас пузувтөма...

Люба, отлаын воим да, медбур пөдругаён лоис. Ота-мөднымөс,

эз торйодны да, дежуритигөн вежлалам. Өтчүд ранитчөм салдатъяса поезд воис. Котралам нөсилкаясөн. Тэрмасым. Фашистъяслөн сьод креста самолётъяс юр весьтын кытш вөчисны, мөдысь матыстчөны. Кутисны «увтчыны» карса зениткаяс. Паровозыс мынтөдчис вагонъяссыс да тэрмасьомөн водзлань нетшыштчис. Вагонъяс сулалөны. Враг кутис бомбаяс шыблавны.

Мый водзө лоис, ог помнит. Садьми — куйла еджыд пододеяльника эшкын улын. Орччөн Люба пукалө.

«Садьмин, Зоя?— нимкодя шыасис пөдругаой.— Войбыд син эг куньлы. Бурд өдийджык. Фашистыс содтис уджнымос...»

Косья чеччыны.

«Куйлы, куйлы,— кисө морөс вылө пуктис Люба.— Эн чеччы. Дзик пыр санинструкторөс корла»,— петис палатаысь.

Главной врач пырис.

— Мый нө мекөд лоис, Филипп Петрович?— юала.— Лядьевйос быттьө дон көртөн дзижалөны.

— Бомба осколок веськалөма. Перйим, ранасө весалим... Вежон мысти йөктыны кутан. Куйлы, бурдөдчы...

Куим лун мысти кок йылө сувтi... Сэсса и Любалы отсасыны кутi. А кызди нө? Юрнысө, морөссө, коксө бинтөн төбөм-көртавлөм раненөйяс крөвать вывсьыс чеччыны оз вермыны, өтитор корөны, мөдтор... Люба быдөн динө оз вевъяв матыстчыны.

Бурдi, но сьолөм вылын зэв сьөкыд: Сашасянь төлысь письмө эз воы.

«Мыйкө, сiдзкө, ськөд лоис»,— майшася.

Коркө, рытгоров, медсестра вайис письмө. Төдтөм киподтуя шыпасъясыс. Восьтi конвертсө — Ольөксанлөн ёртыс гижөма. Разведкаө ветлөмаөсь. Локтигас Ольөксанлы морөсас автомат пуля веськалөма. Петкөдөмаөсь, эськө, асладорө. Но госпитальын кувсьөма. Вирсө уна воштөма...

Ёри войнасө... Од эз кө озтыны сийөс фашистъяс, Ольөксанкөд вермим лоны отлаын... Глеб эськө эз ранитчыв, а ме школаын челядьөс мөдi велөдны. Бөрда...

«Кутшөм шог суис? Мыйла бөрдан, сестра?»— юалө өти салдат. Юрсө и чужөмсө бинтуйтөма, синъясыс да вомыс сөмын тыдалө.

— Виисны! Виисны менсьым Ольөксанөс! Немортъяс!

«Эн усь ловнад, сестра,— сьолөм сетө салдатыс.— Мый вөчан? Война... Онi уналысь кодөскө да кодөскө виөны. Вот ме... Ёртъяс фашистъяскөд тышкасьөны, а куйла танi, косаа пөчөс виччыся...»

— Мый тэ, мый тэ! Тэныд овны на колө, том на... Бурдан!— повзьөдiс салдат, татшөм мөвп юрас кутө.— Дойясыд бурдөны...

«Ог бурд... Төда... Недыр нин коли овны... Фронт вылө колльөдигас радейтана нылөй шуис: «Виччысьны кута геройөн» да сьылис «Я на подвиг тебя провожала...» сьолөм озтана, но нор сьыланкыв. Сьылышт, кывъяссө кө төдан. Кывлi, зэв мыла гөлөсид...»

— Эн дөзмы, салдат, но ог көсйы тайө сьыланкывнас сьолөмтө нормөдны. Нөшта и аслам ыджыд шог. Мыйкө гажаджыкөс сьыла,— вочавидзи, а ас кежысь мөвпыштi:

«Эз подвиг вылө невестаыд тэнө мөдөд, а смерть вылө. Батьясөс, вокъясөс көртөн дөрөм гундырыслы паныд смерть вылө

мӧдӧдӧм!.. Кодӧ вот бӧрсӧ гортас воас, кор гундырыслысь сюрса лысӧ армияным чегас?»

Сылі: «...Верю я, мы разобьём врага и встретимся с тобою у крыльца...»

Раненӧйяс куйлісны вӧрзӧдчывтӧг, кывзісны. Чужӧмъясӧдыс синваныс лӧччис: гортас кольӧм бать-мамныс, гӧтыръясныс, челядьныс дум вылас уины.

«Бура сылін, сестра. Мед Енмыс сетас тэныд шуд»,— ошкисны бурдӧдчысь салдатъяс.

Вель кузь кад коли. Глеб бурдіс. Ывлаӧ пальӧдчыштны пелалас. Ас кокнас нин, кӧть и беддя, ёна чотӧ. Чужӧм вылас вирсермуніс, вом доръясас — нюм. Позьӧ и гортлань мӧдӧдчыны.

«Но, чойӧ, талун менӧ гортӧ лӧдзӧны. Татшӧм кокнас кутшӧм нин меысь вояка,— врачъяслӧн комиссия вылысь воӧм бӧрын юӧртӧс Глеб.— Мунан мекӧд али кольчылан на госпитальяс?»— юалӧ вок.

Котӧртӧ госпитальса начальник дінӧ:

«Филипп Петрович, бурдіс менам вокӧй. Ӧтлаын кӧсьям гортӧ мунны... Лӧдзанныд?»— юала.

«Кутны ме тӧнӧ ог вермы. Ас кӧсйӧмнад волін, абу штатын. Аттьӧ, отсасин, бур медсестра. Быдӧн тӧнӧ ошкӧны, пыдди пуктӧны, радейтӧны... Велӧдчы водзӧ, врачӧ. Фашистъясӧс налӧн позйын нин нӧйтӧны, регыд войнаыс помассяс, но миян профессияным — нэмъяс кезлӧ. Ӧні раненӧйясӧс госпитальын бурдӧдам, а война бӧрас больничанын кутам уджавны, висысьяслы отсӧг сетны».

Дыр эг нюжмасьӧй. Госпитальса бумага-документъяснад билетсӧ военнӧйяс кассаысь некутшӧм ӧчередтьӧг плацкорт вагонӧ сетісны. Пукалан и узан местаяса.

«Видза колян, Вышней Волочок,— видзӧда вагон ӧшиньӧд, мӧвпала.— Видза колянныд, госпитальса ӧртъяс, пӧдруга Люба, врач Филипп Петрович. Бать кодъ миянлы, дас вит—дас квайт арӧсаяслы, вӧлін»,— эг и тӧдлы, бандзиб кузя синва мольяс гӧгыльтчисны.

«Он-ӧ бӧрд?— пельпом вомӧн сывйыштӧс Глеб.— Гортӧ ӧд мунам!»

Мамлы нимкодълунсӧ вайим!

«Зоя нылӧ! Глеб пиӧ! Воинныд жӧ? Лыддя письмӧяссӧ Зоялысь. Ставыс лючки, гижӧ, Глеб бурдӧ. Регыд гортӧ воам, но оз эскыссы дай пом! Енлы быд лун кевмыся, радейтана нылӧс-пиӧс мед видзас-кранитас... Кыліс жӧ кевмысьӧмӧс...»

Зоя пӧч война бӧрас помавлӧма медицина училище. Вӧлӧма бур пельшарӧн. Чайта, эз сорсы профессиясӧ бӧрйӧмнас. Госпитальса уджыс зумыд оласногӧ, повтӧмлунӧ велӧдіс, вежӧрсӧ содтіс...



Коми литератураын кадпасъяс*

Ода кора төлысь — май

Ода кора — веж коръя
Пуксис гажа кад,
Ода кора — веж сыръя
Ошинь улын сад.
Льом пу улö петала —
Отаммö выль кор.
Ставлы дзоридз сетала,
Розйыс петас кор.
Рытыс лонь да ымралö,
Лэбö öтшöр гаг**.
Медводдзаысь гымалö
Ода кора яг.

Юрий Васютов.

1 — роч прозаик Анатолий Знаменскийлөн чужан лун (1923—1997).

1 — «Удораса пионеръяс» литкружок лосьöдысь да нуöдысь, поэт Владилен Крюковлөн память лун (1925—1993).

2 — кулис прозаик Андрей Тарабукин (1936—1977).

3 — кулис прозаик-юморист Леонид Огнев (1932—1991).

3 — прозаён гижысь Галина Лютоевалөн чужан лун (1982).

4 — Борис Палкинлөн чужан лун (1930—1992).

6 — Ёгуш—Георгий Лыткинлөн чужан лун (1835—1907).

7 — чужис Ёгор Рочев (1937).

8 — поэт, прозаик Кос Кабыр—геолог Иван Худяевлөн память лун (1902—1933). «История коми литературы» коймöд томын, 373 л.б., кулан кадсö индöма сора төлысь 29 лун — сэнi ылалö-маöсь.

8 — чужис роч поэт Анатолий Илларионов (1952).

9 — Александр Вежевлөн память лун (1911—1977).

10 — чужис рочён гижысь поэт Владимир Цивунин (1959).

10 — чужис критик, литературовед Татьяна Кузнецова (1959).

11 — прозаик да актриса Эмилия Поповалөн память лун (1946—2004).

12 — поэтесса Мария Лебедьлөн (М.И.Латкина) память лун (1917—1953).

13 — роч прозаик, журналист Юрий Коврижныхлөн память лун (1924—2004).

14 — поэт, публицист, журналист, Россияса IV Госдумаын депутат Дмитрий Поповлөн чужан лун (1863—1921).

15 — рочён гижысь поэт да художник Борис Шаховлөн чужан

* Пом. Заводитчö 2004 вося 6 номерын.

** Öтшöр гаг — майскöй жук.

лун (1920—1987). Тайё Сандрик Миколлөн пи, эн сорёй Б.Ф.Шаховкөд.

18 — поэт-фронтовик Николай Самаринлөн чужан лун (1923—1944).

18 — чужис поэт Евгений Козлов (1960).

19 — чужис прозаик Ганс Шуктомов (1929).

20 — Игонь Мёсшег—Игнатий Мошеговлөн чужан лун (1880—1965).

20 — поэт, драматург да актёр Степан Ермолинлөн паметь лун (1914—1961).

20 — роч поэт, журналист Анатолий Смирновлөн паметь лун (1938—1999).

22 — Сандрик Микол—Шаховлөн паметь лун (1898—1942).

23 — горной инженер, геолог, «Коми му» журналса медводдза редактор Иван Поповлөн чужан лун (1884—?).

24 — поэт да прозаик Тикён Ольёксан—А.Старцевлөн чужан лун (1908—1943).

24 — рочон гижысь поэт Дмитрий Фроловлөн чужан лун (1957—1995).

25 — чужис поэтесса Надежда Павлова (1966).

28 — чужис роч гижысь Борис Тарбаев (1929).

28 — Михаил Игнатовлөн чужан лун (1933—1999).

28 — чужис поэт да сылысь Александр Шебырев (1960).

29 — Жугыль—Николай Поповлөн паметь лун (1901—1971).

29 — публицист, кывөктөд-словарь лосьодысь Иван Размановлөн паметь лун (1902—1932).

31 — чужис поэт Иван Семенчин (1957).

* * *

3 (1923) — Сыктивдін карса нардом сцена вылын медводдзаясь ворсёмаось Жугыль—Н.Поповлысь «Коді мыжа?» драма.

6 (1919) — пыдди пуктан туйё шуёма (регистрауйтёма) Сыктивдін карса Кырулысь да Шошка сиктысь культпросветкружокъяс, кодъяс уна вöчисны коми сылан-лыддянтъясöн да пьеса-ясöн йöзсö тöдмөдöм могысь. Уездас лои 47 татшöм кружок.

7 (2003) — Сыктивкар муниципалитетса Сöвет шуис карса пыдди пуктана олысьöн народной гижысь Геннадий Юшковöс.

9 (1932) — ВКП(б) ЦК-лөн «Литературно-художественной организациясь выль ног лосьöдöм йылысь» шуöм серти Коми обкомлөн секретариат индiс комитет, кодлы вöли тшöктöма дась-тыны коми сöветской гижысьяслысь союз. Комитетас веськалісны М.Лебедев, И.Осипов (секретарь), Ф.Паршуков (председатель), Н.Попов, А.Рочев, З.Старцев, В.Чисталёв. 1934 вося рака тöлысь помöдз найö нуöдісны дасьтысян уджъяс.

9 (1942) — республикаса драмтеатрын медводдзаясь ворсёмаось Николай Дьяконовлысь да Степан Ермолинлысь «Домна Каликова» драма.

11 (1978) — Василий Лекановлы сетöма «РСФСР-са культура-ын заслуженной уджалысь» ним.

14 (1929) — ВКП(б) Коми обкомлөн агитпроп кывзiс Николай Попов-Жугыльлысь, кыдзи уджалö да кöсйö уджавны «Ордым» журнал редакция. Индöма, мый сійö омöля тöждысьö челядьлы

лыддьянторъяс вöсна, омöля паськöдö литературнöй критика, кыз-вын гижöдыс — важ коми сикт йылысь, а этша индустриализация да коллективизация йылысь.

14—15 (1992) — вöлі «Коми гижöдлы 620 во тырöм» пасъяна научнöй конференция. Республикаса национальнöй музей штэнö öшöдöма пермскöй анбур лöсьöдысь Перымса Стефанöс казтылан пöв.

15 (1954) — Коми драмтеатр медводдзаысь петкöдліс Василий Лекановлысь «Сиктса рытъяс» комедия, кодi сэсса рочöдöмön муніс страна пасьята.

15—20 (1989) — чужан лунсянныс 150 во тырöм водзвылын Иван Куратовöс нимöдан праздник вылö Алма-Атаö ветлісны коми гижысьяс: В.Кушманов, В.Лодыгин, В.Попов, В.Тимин.

16 (1922) — Сыктывдін карын, некымынысь нин босьтчылöм бöрын, лöсьöдісны Коми му тöдмалысь котыр (ОИКК). Нырцикъяснас вöліны учёнöй-педагогъяс А.Грен да А.Сидоров, партийнöй уджалысь Я.Потапов, сöветскöй уджалысь М.Молодцова, гижысь да книга лэдзысь Н.Шахов, мукöд.

18—23 (1959) — Москваын муніс СССР-са гижысьяслөн коймöд съезд. Коми гижысь котыр сэтчö ыстыліс Георгий Торлоповöс да Василий Юхнинöс.

20 (1919) — Сыктывдін карса нардомын ворсісны Нёбдінса Витторлысь медводдза драматическöй гижöд — «Ыджыд мыж». Бöрынджык авторыс эз зэв артавлы сійöс тырвыйö коми драмаön, но шусис коми театрлөн «пöявөн». Коми театр пö лоис сёрöнджык — 1919 во помын кымын, кор петіс менам пьеса.

20 (1976) — Москваын РСФСР-са гижысь котырлөн правление секретариат видлаліс М.Игнатовлысь, А.Лыжуровлысь, И.Тороповлысь да Г.Юшковлысь «Современник» издательствоын петöм небöгъяс. Заседаниесö нуöдісны Антонина Коптяева да Владимир Санги. Сёрнитісны тшöтш Владимир Дудинцев, Георгий Семёнов, юркарса критикъяс да коми критик Г.Беляев.

«История коми литературы» коймöд томын, 424 л.б., та йылысь юöрыс ылöдлана: тайö сёрниыс вöлі эз 1978 воö и эз СССР-са, а Россияса гижысьяслөн Союзын, эз правлениеыслөн заседание вылын, а секретариатас.

21 (1969) — СССР-са гижысьяс Союзö босьтісны Владимир Поповöс да Иван Тороповöс.

20—26 (1986) — Коми АССР-ын вöліны Москвалөн литература лунъяс. Гöстъяс волісны Сыктывкарö, Ухтаö да Сосногорскö, Сыктывдін, Сыктыв, Луздор, Кöрткерöс, Емдін да Княжпогост районъясö.

22 (1926) — «Коми сикт» газетын кутіс петны КАПП-лөн быд вежонся «Коми гижöм» лист бок, лэдзисны сійöс кызъысь, «Ордым» журнал вossытöдз. КАПП нимсянь лист боксö редактируйтіс В.Савин.

22—26 (1989) — Йошкар-Олаын вöлі финн-йöгра кывъя гижысьяслөн йöзкостса конференция (1993 восянь шусьö конгрессön), ветлісны сэтчö В.Тимин да Г.Юшков. Водзö тайö конгрессыс лои традиционнöйön: 1991 — Эспо кар, Финляндия; 1993 — Эгер кар, Венгрия; 1996 — Лохусалу, Эстония; 1998 — Сыктывкар; 2000 — Саранск, Мордовия; 2002 — Ижкар, Удмуртия; 2004 — Ханты-Мансийск.

22—27 (1967) — Москваын муні СССР-са гижысьяслөн нёльöд съезд. Комиысь делегатъясыс Н.Попов—Жугыль да Г.Фёдоров.

24 (1994) — журналист, критик Г.Беляевлы сетöма «Коми Республикаса культураын заслуженной уджалысь» ним.

25—27 (1935) — Кардорын вöлі Войвыв крайса сöветской гижысьяслөн медводдза съезд. Коми обласътысь ветлöмаöсь Михаил Доронин, Иван Изъюров, Николай Попов, Виктор Савин, Иван Симаков, Вениамин Чисталёв да Павел Шеболкин.

28 (1978) — Кебра сиктын, Иван Куратовлөн чужанінын, вöлі поэзиялөн ыджыд праздник. Чукöртчöм йöз водзын сёрнитісны да лыддисны кывбуръяс А.Ванеев, Н.Куратова, В.Мартынов, В.Попов, П.Шахов, Г.Юшков, сылісны да йöктісны артистъяс. Праздникыс лои быд вося.

Тайö тöлысяс:

— Н.А.Богословский водзмöстчöм серти комиён лöсьöдöмаöсь Н.В.Гогольысь «Женитьба» да петкöдлöмаöсь Сыктывкарын. (Илля Вась). Тайö вöлöма Сыктывдін карын медводдза коми спектакль (1917), а «совершенно невероятное событие» роч вылысь вуджöдöмаöсь либö некымынөн, либö öтнас юрист Николай Богословский. Сійö жö вöлöма режиссёр пыдди да ворсöма роль.

1924 воö шуöма осьтыны Москваын СССР-са народъяслысь шöр издательство (местаяс вылын омöлик типографияс эз вермыны лэдзны став коланасö, торйöн нин национальной школаяслы — ыджыд тиражөн). Центриздатын вöлі и Коми секция. Уджалис 1931 воöдз, а сэсся 1931 вося моз тöлысь 15 лунö ВКП(б) ЦК-лөн шуöм серти лои осьтöма партия ЦК бердын Партиздат, кöні бара жö лои Коми секция.

1929 воö вöчöмаöсь медбур коми гижöд вылö медводдза конкурсъясысь öтилы кывкöртöд. Конкурссö йöзöдлöмны öтвылысь «Ордым» журнал на «Югыд туй» газет. Жюри пасйöма премияён Нёбдінса Витторлысь «Кулöмдінса бунт» драма, Тима Веньлысь «Трипан Вась» да Ичöт Иванлысь «Ён тыш» висътыяс, Биа Öгырлысь «Сальö Микулай» мойд-поэма, Иливапыслысь «Семук» да «Калым» висътыяс. Сьöмсö конкурс вылö сетöма облысполком.

1931 воö «Ударниклөн» öкмысöд номерын (ода кора 1—15 лунъяс) петö Педь Генълөн «Зоновлөн воöмыс» гижöд. Тайö «Сиктса асыв» повестылөн панас. Редакция сетöма гижöдсö осьтана водзкыв кодйöс: «Педь Гень гижö ыджыд повесът «Сиктса асыв»... Сэсся сійö водзö петö журналлөн тайö жö вося 15—16 öтүвъя номерын аслас паськыда тöдса ним улын нин.

Дасьтіс Геннадий Беляев.



...И муөдз копыр Тіян водзын!

Видзёда ветеранъяс вылө да мөвпала: со тайö йöзыс — и коді воюйтлөма, и коді тылын мырсьöма-уджалöма — тöдлісны став сьöкыдсö, асьнысö видзтöг матыстісны Ыджыд Вермöм. Кызди налөн сьöлөмныс абу потöма, кызди ловныс абу чорзьöма!

Кымынöдысь нин со менам пöчö, Овчинникова Александра Лазаревна, лэптö важ сундуксьыс уна воён чусалöм кышöда фото-альбом, сэсся рытивбыд мойдö-висьтасьö — коді да көні фото-графируйтчылöмны, коді ловъя на да коді кувсьылöма нин, шонъянöй. Кымыныськö и бөрддзылö пöчö том пöрасö казътыліг!

Быд пöлөсыс, код тöдас кымын वोся фотояс. Со öти вылын куим томиник нывка. Пöчөлөн чужöмыс вежсьö: быттö югдыштö весиг, вирпас бандзиб вылас чепöсйö. Вöлөмкö, тайö ачыс пöчö медматыс пöдругаясыскöд, Иякöд да Лидакöд.

Ас кадö найö ёна ёртасьлöмаöсь. Ия пöдруганыс öні абу нин ловъя, неважөн кувсьыліс. А Лидаыс сьöкыд война кадсö фронт вылын вöлöма, дорйöма чужан мусö. Чöv олыштöм бöрын пöчö шуис: «Со код йылысь колö гижнытö. Не кө татшöм йöзыс, кызди Лида, олöмыс эськö ёна сьöкыджык вöлі. Сійö збыльысь герой!» И меным окота лои аддзысьлыны да юасьыштны Лидаыслысь, Доронина Лидия Фёдоровналысь.

Мырйöрöм грезд, Лидия Фёдоровналөн чужаніныс, кызди и уна мукöд ичöt сикт-грезд, олö медбөръя вояс. Сöмын некымын керкаын кольöма олысьыс, дай найö ставөн олöма войтыр. Регыд кусас Эжвалөн веськыдладор берегö, ёна жö нин мича местаö пуксьылöм грездыс. Кусас, кызди вочасөн кусöны, мунöны миян олöмысь ветеранъяс.

Некымын нэм олöмаöсь тані шань сьöлöма, уджач йöз. Комынöд воясö, кызди и мукöдлаын, öтув босьтчылöмаöсь кыпöдны выль олөм. И со — 1941 воö, шоныд гожея лунö, ставыс путкыльтчис...

Война медводдза лунъяссянныс Мырйöрöмысь, кызди и мукöд коми сикт-грездысь, мөдöдчасны фронт вылö верстьö мужичöйяс да том зонъяс. Лидалөн ыджыджык вокыс, Петя, регыд и усьöма. Поездөн вöлөм нуöны салдатъясöс Киев кар дорö, эшелонсö немецыд бомбитöма. Абу кокныдджык судьба вичмöма и мөд вокыслы, Колялы. Сійö веськавлöма пленö, а война помасьöм бöрас вöвлөм военнопленнöйöс судитöмаöсь тані нин, чужан му вылас. Медся забеднö Лидалы, мый лагеръясын вокыс воштöма дзоньвидзалунсö. Бөрнас ёна и висьöма. Лагерыд пö войнасьыд сё пöv лёкджык, шулöма сійö.

Война войнаөн, а кызкö колö вöлі овны, медым не кувны тылын, öд татчö колины сöмын нывбабаяс, челядь да олöма йöз. Ок и уна сьöкыдсö коvmöма бертны мужичöйястöгыд!

1943 во. Лидалы, 19 арöса нывкалы, воас повестка. Став ичөтик грезднас бөрдігтыр колльöдасны том нылös фронт вылö. Öд тöдісны, мый сәні делöясыс абу вывті бурösь. Та понда нöшта

сьёкыд ыстыны том мортто вир кись-танаинас. Лидалён мамыс нылыслы кокас кутчысьёмён да лывкйöдлөмөн гораа бёрдöма. Быттö водзвыв тöдöма, мый мама-ныла сэсся оз нин адзысьлыны. Дай кызди он бёрд, кор жаль тöдтöм войнаыс анылысь коймöд быдтасöс нин босьтö.

Сыктивкарын Лидаöс, кузь веж көсаа нылöс, мукöд мозыс жö дженыда шырасны, жебиник мортто пасьтöдасны ас сертиыс ёна ыджыд салдатскöй паськөмөн да сетасны важиник, чорыд кирза сапöг гоз. Öнi серам сорөн казътылö, а сэкитö пö бёрдны вöлi окота. Сэсся нуасны найöс Горький карö, шоперö велöдан курсъяс ыылö.

Коркö сэсся нывъясöс машинаөн нуöмны фронт ыылö. Нэм кежлас доя ранаөн кольöма Лидалён сьöлөмö тайö туйыс: «Со тай тэ, бёрдысь Рöдина-мамöй!» Киссьём-сотчöм кар-сиктъяс, петшөрөн да раскөн тырöм видз-му! Сьöлөмтö чепöльтö ойдысь дойысла!

Нуасны нывъясöс Прибалтика фронт ыылö. Öтчид матыстчасны көрт туй дорö, и на син водзын воссяс татшöм серпас: час-мöд сайын бомбитöмны эшелон. А вöлөм нуöны фронт ыылö салдатъясöс. Вермас мöй татшöмыс лоны, Енмöй? Взрывъясөн гугöдöм му, сотчöм шойяс. Ловйөн кольöмаясыс уялöны сэнi, ойзöны-бёрдöны. Сьöкыд адззыны да кывны — сьöлөмтö кырлана серпас.

Кызди том шоперлы, сетасны Лидалы важиник «полуторка». Сöмын Енмыс тöдö, мыйта синва лои кисьтöма тайö «көрт вöv» пондаыс: варччöм, доймалöм, көдзыдсьыс пыкталöм кияс... Пыр дзоньтасьём-вöчасьём: көть зэр, көть слöt, көть кын му — машина улад пырны колö. Лида унаысь и бёрдлöма — мыйта синва гусьөн ныылавлöма, забеднöйсла вом дорсö курччавлöма. Но фронт виччысьö отсöг, и бара колö ловзьöдны машинатö, бергöдлыны рычаг. Зато кор заведитчас «полуторкаыд», сьöлөмыд радлö.

Коркö сэсся Лидаöс вуджöдасны санчастьö. Öнөдз Лидия Фёдоровна оз вермы вунöдны öдва ловъя, дой ылын дой, коньör салдатъясöс. Кымынысь ачыс бёрдлöма, кор кувсьылöмаöсь томиник детинкаяс.

Коркö сэсся и асьсö ыджыд шог суöма: гортсьыс воöм письмöысь тöдмалöма, мый öта-мöд бёрсяыс кувсьöмны батыс и мамыс. Öглаö и гуалöмны пö, Виздiн шойна ыылö. 40 градуса көдзыд пондаыс батьсö ковмöма инавны мамыс дорö, абу вермöмны нывбаба да челядь чукөрнад кодйыны көрт кодъ кын мусö. Неуна паськөдыштöмаöсь öти гусö дай.

Вöйылысны Лидалы отпуск, но эз вөрзъы: гөгör бомбиталöны, гөгör сотчö... Кытчö мунан.

1945 вося август тöлысьöдз вöлöма армияс Лида, Берлинöдз волöма. Но медся нин сьöлөмсö кырлöма мöвп: виччысьö-ö кодкö



Лидия Фёдоровна Доронина.

гортас, Мырийөрөм грездас, коли-ө кодкө ловйөн? Котласөдз воёд-чөма поездон, сэсся пароходон Айкатылаөдз. Абу и лысьтөма мир туй вывтi локны, Эжва берег пөлөныс шог мөвпъяссө пальөдiгмоз воөдчөма. Матыстчөма чужан керка дораныс... Онөдз на, казь-тыштас да, синваыс тюрө. Көкъямысдас арөса пөчыс абу и төдө-ма: Лиданым пө өд мян война вылын усьөма, шуө. И ичөт чо-йыс, Нина, ёна и повзьөма салдат паськөма мортсьыд.

Грездса войтыр өдва и эскасны, мый войнаыслы пом воөма.

Унаыс на Лидалон сьөлөмыс топавлис чужанінсө аддзөм бөр-ын: гөгөр тырөм-эновтөм видз-му, нывбабаяс челядь котырнад абу вермөмны ставсө гөрны-көдзны, и война вылө ветлөм вой-тырсө виччысыны некодөс нин — унаөн юрсө пунктисны. А бөрсө бергөдчисны: кодi ки пөла, кодi коктөм. Кызди да кутшөм вынөн бөр кыпөдан-ловзьөдан этатшөм овмөссө?

Война помасьөм бөрас нин Лидия Фёдоровна вочаалөма ра-дейтана мортсө. Доронин Николай Полиектовичкөд орччөн вөлөм-ны фронт вылын, а аддзөмаөсь өта-мөдсө чужан му вылас, Коми-ын. Доронин гозъя сэсся чужтөмаөсь да быдтөмаөсь куим чоя-вокаөс. Но Николай Полиектович абу дыр олөма, ранаяс пондаыс нөрпалөмысь регыд мысти кувсьөма. Но и тайө шогыс абу чегөма Лидия Фёдоровнаөс. Грамотаяс да дипломъяс висьталөны бур удж йывсьыс. А нөшта сьлөн эм уна медаль да «Отечественной война» II степеня орден.

Видзөда тайө ичөтик, но ыджыд сьөлөма ань вылас: мелi синъяса, небыд гөлөса, сёрнитө лөня. Видзөда и оз эскыссы, кы-дзи сийө вермис аслас жебиник пельпомъяс вылын нуны татшөм сьөкыд олөмсө. Да, некутшөм «сьөд кырнышъяс» оз вермыны вен-ны мянсыным войтыртө, кор эм татшөм йөзыс, кызди Дорони-на Лидия Фёдоровна.

Аттё Тiянлы, войнаса ветеранъяс!

И муөдз копыр Тiян водзын!

Надежда Мацакова.

Емдiн сикт. 16 арөс, 10 кл.

ПЫДДИ ПУКТАНА АВТОРЪАС!

Редакцияö гижөдъяснытө ыстiгөн быть колө юөртны:

1. Ассыныд ним, вич, ов; кор да көнi чужлөмныд (лун, төлысь, во).
2. Паспорт юөръяс: номер, серия, кор да көнi сетiсны, гортса адрес (прописка серти).
3. Индивидуальной налогөвöй номер — ИНН (кодлөн эм).
4. Страховöй свидетельство номер.

Тайөс юөрттөг редакция гонорар оз вешты.

*Журналын йөзөдтөм гижөдъяс
редакция оз рецензируют и авторыслы найөс оз мөдөд.
Редакция оз век во öти кывйө авторъяскөд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982. ГСП-2, г. Сыктывкар, Дом печати, каб. 26.

Телефоны редакции: 24-47-52 (гл. редактор), 24-51-52 (общ. отд./факс).

E-mail: nordstar@kominet.ru Некоторые материалы размещаются также по адресу www.komi.com

Подписано к печати 11.05.2005. Формат 70x108¹/₁₆. Печать офсетная. Усл. печ. л. 7; усл. кр.-отт. 8,4; учетно-изд. л. 7,54. Тираж 925. Заказ № . Регистр. ПИ № 3-6843.

КОГУП «Кировская областная типография», 610000, г. Киров, проезд Динамо, 4.